

江西通志卷第六十九

人物四

南昌府四

明

曾鈞字廷和進賢人嘉靖進士授行人擢南京禮科給事中
 時四方銀場得不償費且為盜窟鈞奏罷之鈞剛廉疾俗
 首劾罷參贊尚書劉龍已劾翊國公郭勛禮部尚書嚴嵩
 未幾劾工部侍郎蔣淦延綏巡撫趙錦最後劾罷操江都
 御史柴經直聲震一時出為雲南副使兩司詣黔國公率
 廷謁鈞始正其禮且釐還所侵麗江民地遷四川參政黔
 寇亂撫定之屢遷河南左布政使以右副都御史總理河
 道徐邳等十七州縣連被水患帝憂之趣上方略鈞請濬



江西通志 卷六十一
劉伶臺至赤晏廟八十里築草灣老黃河口增高家堰長
堤繕新莊等舊插閱數月工成進工部右侍郎治河四年
改南京刑部右侍郎久之乞歸家居十餘年卒贈刑部尚
書謚恭肅 白志

按曾鈞事安志府志俱失載白志補入所著有前溪集
李逢字邦吉豐城人獻之曾孫逢之兄嘉靖進士授紹興府
推官有廉明譽擢兵科給事中大同叛卒據城逆命言者
以用兵激變歸罪總督劉源清下獄逢上疏申救源清乃
得免轉戶科有旨幸承天偕同列伏闕諫逮繫謫永福典
史稍遷歷知德安府為政以正綱紀重教化為先黷吏黠
民持法不少假禔身清肅境內凜然卒祀名宦 人物志

李遂字邦良豐城人嘉靖進士授行人歷刑部郎中錦衣衛
送盜十三人遂辨釋其餘抵一人罪調禮部忤宰臣夏言
因事劾之下詔獄謫湖州同知遷衢州知府擢蘇松兵備
副使遷廣東按察使進山東右布政使江洋多盜以右僉
都御史提督操江倭擾江北廷議請特設巡撫遂以故官
撫鳳陽四府時淮揚三創倭寇歲復大水遂請餉增兵恤
民節用次第畫戰守計明年四月倭數百艘寇海門遂語
諸將曰賊趨如臯其衆必合合則侵犯之路有三由泰州
逼天長鳳泗陵寢驚矣由黃橋逼瓜儀以搖南都運道梗
矣若從富安沿海東至廟灣則絕地也乃僉副使劉景韶
遊擊邱陞扼如臯而身馳泰州當其衝賊知如臯有備將
犯泰州遂急檄景韶陞過賊連戰丁堰海安通州皆捷賊
沿海東掠遂喜曰賊無能為矣令景韶陞尾之而致賊於

廟灣賊據險不出攻之月餘不克遂令景韶塞塹奪木壓壘陳火焚其舟賊乘夜雨潛遁江北倭悉平壘書獎勵賊駐崇明三沙者將犯揚州景韶戰連勝圍之劉莊會副總邱顯來援遂檄諸軍盡屬顯攻破其巢追奔白駒場時遂已遷南京兵部侍郎甫數月振武營軍變振武營者尚書張鏊募健兒以禦倭者也素驕悍以給餉踰期鼓譟圍督儲侍郎黃懋官署許犒十萬金乃稍定遂乃託病閉閣給免死券以慰安之而密諭營將掩捕首惡二十五人繫獄止誅叛卒三人餘戍邊衛未幾擢南京參贊尚書事奏調鎮武軍護陵寢一日散千人留都自是無患越四年以老致仕卒贈太子太保謚襄敏

白志

按尹洞山集所撰李遂墓志與此所紀小有異同又羅

念庵集載遂之父名萬平字惟衡以諸生終老所著有饑豹穴游桑榆諸藁今不傳

劉良弼字賚卿南昌人嘉靖進士授金壇知縣擢御史正色敢言不少阿附時巨璫馮保弄政首疏參劾謂其罪浮于劉瑾未幾而保敗巡按八閩畿輔凡所建白不屑細瑣上防邊六漸略數十萬言皆長算用忤相淹卿寺久之乃遷巡撫西粵尋卒

人物志

萬虞愷字懋卿南昌人嘉靖進士授無錫知縣治尚寬大擢南京兵科給事中數與守備內臣露章爭事謂營兵不當充私役又謂操江都御史故常與守備參贊列坐而後為權璫所抑設次西向非是及奏革宣成以來冒功陞襲者若干人歷山西左布政使累晉南京都察院右副都御史

總督漕儲除京商和買之困又上便宜六事軍民頌德立碑於中和橋以刑部右侍郎致仕 豫章書

按萬所著有楓潭詩鈔

魏良弼字師說新建人嘉靖進士授松陽知縣召拜刑科給事中張璉桂萼初罷相詔察其黨給事中劉世揚等議及良弼以吏部言得留尋命巡視京營劾罷提督五軍營保定侯梁永福太僕卿曾直罪武定侯郭勛家奴論團營兵政之弊直聲大著會南京御史馬敷等以劾吏部尚書王瓊被逮良弼請釋之帝怒并下詔獄論贖還職三遷至禮科都給事中十一年八月彗星見東井芒長丈餘良弼引占書言彗星晨見東方君臣爭明彗字出井姦臣在側大學士張孚敬專橫竊威福致妖星示 其亟宜罷黜孚敬奏

良弼挾私帝已疑孚敬兩疏皆報聞給事中秦鰲疏再入孚敬罷去踰月良弼復偕同官劾吏部尚書汪鋹帝方向鋹奪良弼俸鋹孚敬俱恨良弼明年元日副都御史王應鵬坐事下詔獄良弼言履端之始不宜以微過繫大臣帝怒再下詔獄卒訝曰公又來邪為垂涕尋復職奪俸時孚敬復起柄政與鋹修前卻以考察後命科道官互糾又奏上十一人不及良弼孚敬益怒擬旨切責令吏部再考鋹別糾二十六人而良弼及秦鰲葉洪皆前劾孚敬鋹者中外大駭良弼竟坐不謹削籍隆慶初詔起廢籍以年老即家拜太常少卿致仕卒天啓初追謚忠簡所著有水洲集 白志

辜用琥字子西南昌人嘉靖鄉舉知廣西府攜一僕自隨清

慎恬淡革土司常例省里甲夫馬靖盜息民豪猾斂跡莅政四載民無欺罔以終養乞歸

雲南通志

魏良政字師伊新建人王守仁撫江西與兄良弼弟良器良貴咸學焉提學副使邵銳巡按御史唐龍持論與守仁異戒諸生毋往謁諸生多畏避而良政兄弟獨不顧深為守仁所許良政功尤專孝友惇朴燕居無惰容嘗曰不尤人何人不可處不累事何事不可為舉鄉試第一而卒良弼嘗言吾夢見師伊輒汗浹背良貴官右副都御史守仁之學傳江西者多實踐自鄒守益歐陽德外皆以學行重云

白志

魏良器字師顏號藥湖洪都從學之後隨陽明至越時王龍溪畿為諸生落魄不羈每見往來講學者竊罵之居與陽

明鄰不見也良器多方誘之一日與同門友投壺雅歌龍溪過而見之曰腐儒亦為是邪良器答曰吾等為學未嘗擔板汝自不知耳龍溪於是稍相暱就已而有味乎其言遂北面陽明錢緒山臨事多滯則戒之曰心何不灑脫龍溪工夫懶散則戒之曰心何不嚴慄其不為姑息如此歸主白鹿洞生徒數百人皆知宗王門之學卒年四十二

明儒學案

萬廷言字以忠號思默南昌人虞愷子受業于陽明登進士第歷禮部郎中出為提學僉事罷官歸杜門三十餘年匿迹韜光研幾極深念庵之學得廷言而傳尤深于易三百八十四爻無非心體之流行不著爻象而又不離爻象自來說易者程傳而外未之或先也

同上

按人物志稱思默平生著述多所發明有學易齋前後集易原易說經世輯要共若干卷其書皆失傳惟約語中多格言觀學案中所摘數十條生平得力可知原跋

阮文中字用和南昌人嘉靖進士累官貴州巡撫時土官安國亨安智相訐殺前撫將坐以叛逆未決文中至訪得實平其事免軍興之擾巨寇者念擁兵僭號垂三十年有司不能制因不以聞文中請於朝發師討平之遷湖廣巡撫

貴州名宦志

鄧鏞豐城人家貧嗜學手不釋卷精于易中嘉靖鄉舉官教諭造士多成就知漢陽縣吏事精敏處置山陽荒賦裁減冗費民免于累凡所施設綽有成績湖廣名宦志

傅習進賢人由進士任大理評事以執法忤劉瑾謫理問怒

猶未釋復逮詔獄後歷官副使屢建軍功終副都御史克

定土官之亂分省人物考

李璣字邦在豐城人嘉靖乙未舉南宮廷試二甲第一改庶吉士授編修陞左中允署國子司業纂修會典成晉諭德歷祭酒轉吏部侍郎兼學士掌詹事府己未會試主考尋拜南京禮部尚書致仕平生樂易洞達不設崖岸人皆庇其德字焉有西野集人物志

熊汝達字德明進賢人嘉靖進士除刑部主事歷泉州知府歲己未倭逼泉州悉力捍禦與士卒為伍夜分披甲不釋相持月餘寇去泉人德之為立生祠遷四川副使歷廣東左布政擢右副都御史巡撫廣東改浙江轉工部右侍郎清約無改素風尋乞歸養時年已望六孺慕夔夔封君色

稍不和則長跽請不命之起不敢起析官橐以遺二弟又數年起刑部左侍郎尋遷右都御史掌南京都察院甫任復以事被劾歸所著有讀書劄記知警錄穀堂或問弋蟲集觀物橐同上

余禎字興邦奉新人正德進士授工部主事改武庫司嘉靖甲申議大禮禎與羣臣伏哭左順門下詔獄扑于闕廷時死杖下者十七人禎其一也隆慶改元贈光祿少卿白志

吳金字礪伯豐城舉人嘉靖間知建寧潮汀賊蠡起練鄉兵固守禦每戰輒斬獲奪回所擄男婦甚眾福建通志

魏時亮字工甫南昌人嘉靖進士授中書舍人選兵科給事中隆慶初副檢討許國使朝鮮故事王北面聽詔使者西面時亮爭之乃南面宣詔給事中十月初詔停

日講時亮率同列言天未沍寒不宜遽輟俄請以薛瑄陳獻章王守仁從祀文廟章下所司三年擢太僕少卿初徐階高拱相構時亮與朝臣攻去拱已而拱復入考察言官排異已者時亮及陳瓚張禎已擢京卿皆被斥時亮坐不謹落職萬曆十二年用薦起南京大理丞再遷太僕卿副都御史攝京營戎政歷刑部左右侍郎南京刑部尚書踰年卒官時亮初好交游負意氣嘗劾左都御史張永明為時論所非時亮亦悔之中遭挫抑潛心性理之學天啓中謚莊靖白志

按時亮晚年好會友講學輯周濂溪而下至王文成九先生語編曰大儒學粹與其奏議並行于時原跋雷禮字必進豐城人嘉靖進士授興化司理所讞獄多奇中

民頌之如神明尋晉吏部主事歷考功郎中坐持法失貴
臣意謫大名府通判累陞浙江提學副使擢南京太僕少
卿歷工部左侍郎午門樓工成加尚書督建三殿尋掌部
事晉太子太保至少傅隆慶初太監滕祥傳造器物禮抗
章劾祥并乞骸骨內批準致仕歸卒贈太保禮嗜學明習
朝典有大政記內閣行述列卿年表諸書行世 豫章書

按雷所著尚有鐔墟堂彙二十卷

楊薰字太和南昌人正德進士授主事謫潮州通判耿介特
立受俸薪猶恐自累遷知州去囊無銖積歷惠州府同知
嘉靖中陞四川兵備僉事改貴州致仕家居曳履徒行絕
無貴倨之色巡撫王守仁題清流臣子贈之 人物志

丁以忠字從一作崇義新建人嘉靖進士授刑部主事錦衣衛

捕劫盜四人奏下刑部以忠廉其贓僅有一油幣鈎得物
主審所繇而釋之錦衣亦服歷郎中陞知河間府治最時
熊尚書浹以直言得罪命官校督解以歸拳桎就道人畏
莫敢近至河間以忠獨郊勞如常且謂詔使曰熊公重臣
所坐非大譴向偶失上意耳何至是若不憂殺大臣耶即
有禍福某當之詔使悟遂破械聽具輿從以行卒護持無
恙陞山東按察副使累遷左布政使擢右副都御史巡撫
山東下令革冗卒裁其饜佐以贖鍰之羨大賑諸鄉落盜
多解散歸命一意拊恤甚得齊魯間心轉南京兵部右侍
郎未幾滿三品俸考績分宜相欲留之比謝弗應明年以
入賀至亟疏致政所著有世美堂彙孫此呂有至行父歿
割腴產以遺三庶弟舉進士授工部主事七歲不遷卒于

京邸貧無以為殯人共惜之

豫章書

熊汝器字國用南昌人嘉靖進士授上虞令陞蘇州府同知母喪服闋補松江同知禦倭有功賜金帛條陳備倭十事略見施行歷南禮部郎中湖州兗州二府陞陝西行太僕寺少卿山西行太僕寺正卿兼整飭寧武兵備副使入覲乞休還里居四年卒

人物志

李遷字子安新建人嘉靖進士授南京兵部主事歷武選郎中魏國公奏孫寧侵孝陵孺地為市肆株引甚眾下部偕法司窮竟尚書屬遷會鞫得從減論出株引者數十百人出知濟南府陞湖廣按察副使歷左布政使擢右副都御史巡撫真定久之晉兵部右侍郎兼僉都御史總督兩廣以廣東諸軍破倭斬鹵千計

兵平廣西古田擒巨

寇韋銀豹等置永寧州績聞陞南京刑部尚書致仕歸家居十餘歲卒篋無餘鏹諸子鬻產為斂嘉隆間南州士大夫談清節者必推李尚書云詩文醇雅有致其傳者鶯谷

山房集

同上

張鏊字濟甫南昌人嘉靖進士選庶吉士授禮部主事遷祠祭司郎中隆興寺火奉命同中人撤大善殿佛像中人欲收其寶幢珠玉以進鏊不可遂燬之出為浙江提學副使轉遼東苑馬卿比去遼人為立生祠歷廣東左布政使陞南京太常大理卿繇刑部侍郎超拜尚書掌南兵部致仕歸家居十三年卒生平清苦終始一節布衣蔬食四壁蕭然諸子至不能自給

豫章書

按濟甫所著有遷鶯館集

蔡國珍字汝聘奉新人嘉靖進士鄉人嚴嵩當國欲羅致門下國珍不應乞就南為刑部主事就改吏部進郎中出為福建提學副使以侍養歸遭母喪服除遂不出家居垂二十年起廢籍以故官莅福建遷湖廣右參政歷浙江左布政使以右僉都御史提督操江召為左副都御史歷吏部左右侍郎進吏部尚書三殿災率諸臣請修省倡廷臣詣文華門請舉皇長子冊立冠婚言必得請方退帝遣中官諭曰此大典稍需時耳何相挾若是乃頓首出稱疾累疏乞休國珍素以學行稱風力不及孫鑰陳有年而清操似之家居十三年卒年八十四贈太子太保謚恭靖白志

按蔡國珍人物志及安志俱失載

江治字舜卿進賢人十三補弟子員父玠以逋租逮治匍匐

以解父厄孫忠烈公召而試之大奇異授以館廩比忠烈殉宸濠難奔入會城縞素伏棺哭盡哀王陽明召見噐之語以學愈自奮舉嘉靖進士任刑部主事陞廣東按察僉事督學政得士為多擢南京尚寶司卿遷太常少卿署應天府歷鄉光祿太常拜南京工部右侍郎致仕歸顏其亭曰洗心田居騎一蹇驢挾小蒼頭與村父相慰勞值歲饑响糜自給意泊如也奉詔存問年九十二臨終戒諸子無以祭葬累縣官豫章書

江滙字東之進賢人嘉靖進士授兵部主事歷陞湖廣按察副使浙江按察使持法峻整有豪民坐殺人行千金求鬻獄拒之又屬柄相以請不聽竟論死轉河南右布政使以前事中齟齬歸家居田宅無贏有遊楚橐同上

李東華字景曉豐城人嘉靖進士授太常博士選工科給事中歷吏兵科嘗上疏言精考課四事又疏言釐時弊五事進禮科都給事中卒貧不能喪里官賻之始克殮

林志

齊譽字文實南昌人嘉靖進士以給事謫知永嘉律已廉正究悉民瘼編派里遞班次至今便之

浙江通志

張臬字正野進賢人嘉靖進士授刑部主事以事謫靈川縣丞稍遷寧國同知歷閩蜀秦楚藩臬拜右副都御史巡撫四川值五酋稱王自雄長謀陷敘州臬檄所部兵討之賊擁長矛披溼絮列巨牛為陳臬令揭竹為竿悉長二丈造無聲礮五百火箭千束飛擊之無不立斃者賊盡奔木頭寨臬又置樓櫓火箭焚其草舍改奔石

法寨世所稱鴉飛不到山也山博十餘里四隅壁立

自 未登者臬曰此

可計而取之也密令謀者誘一首阿黑官至則勞以酒食綵帛鼓吹旗蓋遨遊寨之麓以誘之賊相顧錯愕乃下令盜中能捕首目一人者得弗死有武生劉顯者南昌人能以一當百署為先鋒獲其土官安得祿盜眾悉降首惡阿焦林匿山後洞穴中十日不得臬時已拜南司寇佯言當縱小醜班師賊果急擒之入留都適倭寇張甚或傳將圍通州犯瓜潤留都大恐臬曰此綴兵法耳禍其在揚州乎已而果然初劉顯累建奇績臬言之大司馬張璠檄為南京水軍守備未幾以副總兵滅倭賊于長江識者推其將將之功焉擢兵部右侍郎提督廣西軍務大盜張璉稱號僭亂流毒三省臬同平江伯陳王謨討平之捷聞進都察院右都御史俄命總督閩廣軍務為言者所中歸老鍾陵

萬敏字欽夫南昌人嘉靖進士知太倉州崇明有大慝王秦
 沈三人利私嗾而猖獗海上敏單舸詣縣召沈至榻前款
 諭之且泣且受命王秦負險弗順將謀不利于敏亟浮海
 入州城會上命湯帥勦諸海寇敏午治樓櫓至夕三百艘
 畢具戰卒凡三千人牛酒之犒咄嗟而辦將士咸大悅會
 戰湯帥以巨艦六十乘風而進敏殿之瞬息達崇明捕斬
 無算敏慮其妄殺也矯中丞令大呼曰生擒者賞首級者
 弗論師中擒二千人械送至訊釋平民千八百餘人得劇
 盜百七十人置之法歷襄陽同知遷貴州僉事備兵畢節
 居三年御史疏其才陟貴藩少參致仕 同上

齊柯字文則南昌人嘉靖鄉舉署和州學正修州乘分校河

南鄉試遷瑞安知縣邑苦田賦不均柯至首建度田之議
 請于臺司若郡每都擇公正一人董其事已卽襄糧履畝
 握算而紀其籍民有訟者即於田間片言取平傍邑民間
 之爭請受筴當道檄令度平陽田旬月亦報竣無何奉例
 丈量二邑抱成筴以應皆柯力也徵入補大理評事擢臨
 安知府過里謂人曰度兩歲俸足償逋金吾將老焉其治
 郡以德化民如令瑞安狀小疾投劾去 府志

王希烈字子忠南昌人嘉靖進士改庶吉士授編修累官國
 子祭酒禮部侍郎改吏部兼侍講學士掌詹事府充經筵
 日講嘗攝宗伯事肅府中尉某陰規為嗣正色絕之萬曆
 甲戌典會試江陵子落第人服其不私卒贈禮部尚書謚
 文裕 人物志

余曰德初名應舉字德甫南昌人嘉靖進士授刑部主事歷福建按察副使在刑部時與李攀龍王世貞輩相倡和歸田後詩道益振尤善五七言近體有午渠集德甫詩集同邑按察副使諭邦相均時亦以文名著山居橐曰德有曾孫正崇禎己巳恩貢博雅能文著寒芳閣文橐昔邪園詩集行世 同上

黃國華字良寶豐城人嘉靖進士守龍安時郡新設賦繁重國華惟務節省以寬民力裁革殆盡萬曆初入覲卒於京卒之前一日猶議陳地方利病其盡心民事如此訃聞士

民祠祀之 四川通志

陳棟字隆之南昌人嘉靖乙丑會元廷試及第授編修隆慶間擢右贊善侍班東宮適見楮畫瑩汗正色而諫東宮為

霽容更書時謂有公權筆諫之風辛未校士拔同郡鄧以讚第一後為名臣世稱其鑑識未幾卒 府志

何祉字德徵進賢人嘉靖進士授行人擢戶科給事中西北諸省大饑奏請發內帑免徵輸以甦民困以母老乞便養改南京兵科條軍政四事馬政五事著為令甲與同臺會糾王太宰瓊以此見忌出為嘉興知府性方嚴不假人以嘖笑戢暴綏良修教勸學期月郡中大治坐蜚語罷民為立祠 分省人物考

朱憲章字良範進賢人嘉靖進士授行人擢兵科轉戶科時方造龍舟費至鉅萬憲章疏凡兩上遂停出為四川副使歷福建參政告歸與羅洪先唐順之往還論學晚更好易推本文繫之旨多所發明著訂頑隨筆雪里子集 人物志

萬恭字肅卿南昌人嘉靖進士授南京文選主事歷郎中就
 遷光祿少卿入改大理寇逼通州帝方急兵事以兵部右
 侍郎蔡汝楠協理戎政命恭代汝楠恭列上選兵議將諸
 事皆報可明年請劇邊自効命兼僉都御史巡撫山西甫
 至寇犯龍巖墩伏兵擊却之未幾寇五萬騎至朔州川恭
 與戰老高墓寇去事聞賚銀幣巡撫故無旗牌恭請得之
 濱河州縣患套寇東掠歲鑿冰以防恭為築牆四十里教
 人以耕及用水車法民大利之以內艱歸隆慶六年河決
 邳州運道大阻命恭以故官總理河道築長堤北自磨臍
 溝迄邳州直河南自離林迄宿遷小河口袤延三百七十
 里費帑金三萬六十日而成高寶諸湖夏秋汎濫歲議增
 堤而水益漲恭緣堤建平水閘二十餘以時洩蓄專令濬

湖不復增堤河遂無患恭彊毅敏達一時稱才臣治水三
 年言者劾其不職罷歸家居垂二十年卒孫燦有傳白志
 熊廷用豐城人嘉靖間為長樂典史時倭寇猖獗逼縣城廷
 用登陴守禦開門令老幼俱入城存活數千人修築濱湖
 民受其利 福建通志

吳桂芳字子實新建人嘉靖進士授刑部主事有崔鑑者年
 十三忿父妾凌母手刃之桂芳為著論擬赦尚書聞淵曰
 此董仲舒春秋斷獄柳子厚復讎議也鑑遂得宥及淵入
 吏部欲任以言職會聞繼母病遽請歸起補禮部歷遷揚
 州知府禦倭有功又建議增築外城揚有二城自桂芳始
 歷浙江布政使巡撫福建鄖陽進右副都御史總理河道
 未任兩廣總督張臬以非軍旅才被劾罷改桂芳兵部右

侍郎提督兩廣軍務潮州舊倭屯據鄒塘桂芳先討倭以降賊伍端為前驅官軍繼進一日夜克三巢焚斬四百餘人與南贛提督吳百朋乘勝滅賊而新倭寇福建者為戚繼光所敗方流入境桂芳百朋會調土漢兵乘其初至急擊之倭懼悉奔甲子崎沙奪漁舟入海暴風起皆覆溺死因建議海道副使轄東莞以西至瓊州領番夷市舶更設海防僉事巡東莞以東至惠潮專禦倭寇又進討亞元丹樓平之召為兵部右侍郎隆慶初以疾乞歸萬曆三年即家起故官總督漕運桂芳以淮揚洪潦奔流惟雲梯關一徑入海致海涌橫沙河流泛溢而興鹽高寶諸州縣所在受災請益開草灣及老黃河故道以廣入海之路修築高郵東西二堤以蓄湖水皆下所司議行未幾草灣河工告

成而河決曹縣徐州桃源其明年議塞崔鎮決口束水歸漕桂芳欲衝刷成河以為老黃河入海之道遂命兼理河漕進工部尚書未踰月卒贈太子少保

白志

王臣字公弼南昌人為諸生時從王文成學嘉靖進士知泰州以所學施之政歲饑發倉大賑請蠲米六萬餘石作諭民錄申明聖訓或以天倫構訟者勸誨懇到多感泣如初撤毀神廟改建尊經閣立胡安定祠時王艮以布衣倡道安豐延至州學令諸生盡師之一時里巷皆弦歌焉陞刑部員外轉浙江僉事為王文成撫孤不避嫌怨以廣東參議罷歸學者稱瑤湖先生

人物志

符鍾字伯聲新建人為諸生慨然慕聖賢之學以古禮為必可行丁內外艱俗用浮屠音樂悉屏絕之舉嘉靖鄉試卒

業南雍從湛若水遊除知道州賑荒歉撫峒猺治行稱最
卒于官所著有虛亭語錄同上

朱多燧字用晦瑞昌王府奉國將軍善為詩與里人余曰德
相倡和因介李于鱗王元美間數吟咏往還以此譽延海
內有芙蓉園彙時建安輔將軍拱樋亦以文雅知名著
瑞鶴堂詩集爽臺彙卷二志

涂紹燧字伯聚南昌人進士遠於理學督學四川公明並至
士無遺珠自後名科甲皆出其簡拔著四書兒訓士子賴
之蜀中督學推第一人四川名宦志

朱多燧字崇良瑞昌王府鎮國中尉父奉國將軍拱樞嘗以
議禮稱旨賜勅諭有聲貴遊間燧博雅好詩始與多燧齊
名晚益精進評者謂其沉著閑達有先進典刑云府志

萬思謙字益父南昌人聞玉伯安之學恍然有悟密探默契

歐陽文莊一見賞歎以為聖門心印必屬斯人嘉靖進士

知嘉定縣會倭患棘乃城嘉定以備陞刑部主事改光祿

寺丞秩滿謁吏部長揖而出坐奪一月俸出為四川參議

累遷福建左布政使藩司前有麗譙面五虎山門故從旁

出思謙至闢正中門改山名曰五福竟無害閩人壯之轉

南京太常卿致書江陵相稱維世以禮容人以量願開言

路自引咎語江陵相故同年生意不能無望故陽遜謝而

言者伺其頤指露章引懸車例遂得致仕歸年甫六十一

耳著大學迹古中庸述微平生粹行完操毫無愧怍所居

環堵壁立歿後十六年始克葬人物志

姜倣字君治南昌人嘉靖進士授宣城縣令陞浙江道監察

御史初奉命巡視光祿條陳七事稱旨出視長蘆鹽課繼巡按湖廣值歲侵民舍漂沒餓殍載道倣上流民圖多方賑救百姓乃得安業復巡視山東江浙閩廣所至聲望丕振擢翰林院侍講學士尋丁內艱起復冠帶閒居卒年七十五

淡溪姜氏事實

劉曰材字汝成南昌人嘉靖進士授韶州府推官峒人怨豪家收青殺七人尸于大澤雜治無驗曰材廉得其見知者鞫之辭窮獻狀囚亦皇遽伏竟獲七尸澤中獄上論報人驚以為神明遷刑部主事轉儀制司遷湖廣按察副使改貴州督學復為山西參政守徐溝會石州之變寇騎迫太原督兵乘城一謀者袒而華言以入輒斬以殉衆心乃安寇亦竟出塞去歷陝西左布政使入覲歿于臨潼傳舍曰

材性廉平自言三為刑官未嘗輕入人罪所至行李蕭然既歿而人思之

白志

李材字孟誠豐城人遂子嘉靖進士授刑部主事由兵部郎中遷廣東僉事羅旁賊猖獗材襲破之周高山設屯以守賊有三巢在新會境調副總兵梁守愚由恩平遊擊王瑞由德慶入身出肇慶中道夜半斬賊五百級毀廬舍千餘空其地募人田之亡何倭五千攻陷電白大掠而去材追破之石城設伏海口伺其遁而殲之奪還婦女三千餘錄功進副使萬曆初張居正柄國材遂引疾去居正卒起官山東以才調遼東開原尋遷雲南洱海參政備兵金騰金騰地接緬甸而孟養蠻莫兩土司介其間叛服不常緬部目曰大曩長曰散奪者率數千人據其地材謂不收兩土

司無以制緬遣人招兩司來歸而間討抗命夷阿坡居
頃之緬兵爭蠻莫材合兩司兵敗緬衆殺大曩長逐散
奪去緬帥莽應裏益兵至孟養復擊沉其舟斬其將一人
乃退以雲南事被訐遂獲重譴幽繫五年論救者五十餘
疏大學士申時行復為材申理皆不省亡何孟養使入貢
具言緬人侵軼天朝救援破敵有狀聞典兵者在獄衆皆
流涕而楚雄士民閻世祥等亦相率詣闕訟冤帝意乃稍
解戍鎮海衛材所至輒聚徒講學繫獄時就問者不絕至
戍所學徒益衆許孚遠方巡撫福建日相過從久之赦還
卒年七十九材學雖受之守益以上接王守仁然不循其
軌轍以大學知止知本為鵠標其宗旨曰止修學者稱見
羅先生 同上

按見羅所著有學古知本圖說數學錄經正錄觀我堂
彙共若干卷

葉修字克慎南昌人由進士任漢陽府司理性剛直不阿常
面拆人過藩臬皆憚之漢陽學廢賴以興復漢川賦為潞
藩奏割三之一民甚苦之修請以衡州有歲額解德安倉
者移抵漢川民為祠祀焉 湖廣名宦志

姜博字克約南昌人嘉靖進士授溧陽縣令擢刑部主事累
陞浙江僉事秉性剛直不阿附權貴解組歸居家四十餘
年卒年八十二祀鄉賢 淡溪姜氏事實

方孟縉武寧人早失父事母孝由進士授刑部主事時貴戚
張氏構大獄不決孟縉折斷平允理淮漕值江西吳城兌
運軍民交變孟縉一詢輸服議改就省兌至今民便之所

著有鴈里殘稟 分省人物考

劉顯字草堂南昌人生而膂力絕倫稍通文義家貧落魄之叢祠欲自經神護之不死間行入蜀為童子師已冒籍為武生嘉靖三十四年宜賓苗亂巡撫張臬討之顯從軍陷陣諸軍繼進賊盡平顯由是知名南京振武營初設用兵部尚書張整薦署都指揮僉事僉書浙江都司遷參將分守蘇松倭犯江北逼泗州整檄顯防浦口顯測賊將遁追擊至安東方暑披單衣率四騎誘賊伏精甲岡下伺賊出潛燬其舟賊敗走舟舟已焚死者無算尋遷副總兵協守江浙振武營兵變後諸將務姑息兵益驕給事中魏元吉薦顯署都督僉事一軍怙然廣東賊起詔顯充總兵官鎮守其地廣東故無總兵官至是始以顯為之會福建倭患

棘顯與參將戚繼光連破賊賊略盡錄功進先所廕世職二秩隆慶改元移鎮貴州拓地四百餘里得諸葛銅鼓九十三銅鐵鍋各一鍋狀如鼎大可函牛刻畫有文彩相傳諸葛亮以鼓鎮蠻鼓失則蠻運終矣錄功進顯都督同知已而勦餘孽復俘斬千一百有奇都掌蠻既滅顯引疾求去而以有司阻撓為言詔聽顯節制顯益行其志擊西川番沒舌丟骨人荒諸砦斬其首惡撫餘眾而還建昌傀儡厦洗馬諸番咸獻首惡西陲以寧九年冬卒官 白志

宋國華字崇樂奉新人嘉靖進士授休寧知縣貴溪張真人奉命有事于齊雲責供具苛甚國華詞其陰事欲發之張恐遜謝而去陞兵部主事歷職方郎中擢四川提學副使敷教以寬憐才若不及累遷雲南左布政使發黔國侵奪

事逮其左右戍邊者三人轉應天府尹抵家病卒

人物志

劉廷梅字與和南昌人天性孝謹父客死維揚廷梅迎喪以

歸涉江風惡幾覆舟抱棺而慟呼天請與俱溺尋濟嘉靖

進士知歙縣縣治故事供張令君甚設盡麾出之政令清

簡訟庭幾闕無人比奉徵書敝衣羸馬以行除南京兵部

主事歷知漢陽府擢廣東副使致仕

府志

衷貞吉字孔安南昌人嘉靖進士授刑部主事遷南禮部郎

中出知松江府吳淞江久塞侵濱河田出所節嗇金錢濬

之竣役而民無擾高新鄭釋憾於故相徐迎合者上下其

手郡中告密成風顧獨意無所附量徙陝西行太僕少卿

萬曆初改河南提學副使精品藻寬條約詳訓迪得人士

心歷浙江左布政使擢右副都御史巡撫河南比歲薦饑

請發帑金五萬兩米九萬餘石分部周賑名拜工部侍郎

左都御史河南人為立生祠卒贈太子太保謚簡肅

豫章

書

黃樞字翼卿南昌人嘉靖進士授嘉善知縣精嚴案牘發摘

無遺尤留心里甲役法均平猾胥為之斂手邑大潦禾盡

漂詣當道免冠頓首請括帑金以抵恒賦陞南京工部主

事歷武庫郎中遷知湖州府歲荒請蠲設賑不遺餘力卒

于官廉介終身不易祀湖州名宦

人物志

胡杰字子文豐城人嘉靖進士由庶吉士歷南祭酒陞太常

寺卿有劔西橐

明詩小序

雷夢麟字伯仁進賢人嘉靖進士授無為知州遷工部員外

郎復除刑部明法律善持平駙馬鄔景和失撰青詞且辭

賞忤旨坐劾屬夢麟論鄔不嫺文學罪在辭賞薄治足矣
讞上報可時震位未建有言御史佩復命誤用青表上怒
甚疑有譏訕下御史獄夢麟復佐尚書議當調外有旨切
責已僅免御史官嘗奏進所著讀律瑣言又條上罪囚永
戍者只以戍後生子代伍免行勾原籍議中格後竟行之
遷天津兵備副使歷陝西左參政

府志

李棡字孟敬豐城人遂長子嘉靖進士授魏縣知縣魏俗健
鬪尚鬼棡申明教化酌定禮條使民誦習又令無賽會無
釀緡錢以粟易之計其羨為社倉而規其息頃之獄訟衰
減鄉社困藏至八千餘石調肥鄉塞邯鄲鄆米二口衝堤
濬漳河故道灌田九里民祠祀焉拜監察御史萬曆初巡
按湖廣還以臺中久次協理大察竟外遷浙江副使上疏

致仕有困學纂言惜陰彙及緝論語外編

人物志

方來崇字士功新建人與弟來獻同中嘉靖乙卯鄉試登丙
辰進士授無為知州愛民潔已著有初政紀錄考選刑部
歷員外郎會方士詔獄執法忤旨挂冠歸林居四十載講
學著書與王元美李于鱗暨德甫用晦諸公為詞林伯仲
有元隱軒諸集行世

府志

喻南嶽字極夫新建人嘉靖進士授六安知州適倭寇起海
上改調通州歷兵部員外郎中遷廬州知府新安富人挾
重貲遊無為州州人某利其有拉殺之而匿其尸事已半
載嶽一日坐堂上問左右曰階之下披髮短裳而水淋漓
者誰邪左右無對嶽曰若有冤第為若理即沐浴禱于城
隍神明日呼左右一人來授以名居令往捕之一訊輒服

合郡駭服晉四川副使備兵建昌建昌故在蜀西徼為瀘水所隔備兵使者憚不敢渡遙制雅州獨閩帥鎮其中多專恣喜事失蠻心嶽叱馭趣渡瀘諸蠻望見車騎悉蒲伏迎道左嗣是閩帥凜凜自束不敢有所干犯諸蠻亦大喜尋以疾引歸番漢人挾轅泣送者數百里不絕同上

李瑞芳字時禎豐城人嘉靖鄉舉授武義知縣多善政以憂去縣人為之立碑補永興縣值大荒仿周禮弛役緩征嗇神殺禮積粟之法民賴之復除知華容歷承天府通判引疾歸所在俱祠名宦人物志

彭懋字汝德南昌人嘉靖鄉舉任順昌知縣庶事畢舉尤加意學校日進諸生親為析義校課歷工部郎中廣東按察僉事歸無長物年至九十四載延平志名宦同上

鄧漢字潔之豐城人少孤負殯父薄終身不忍華其衣居母喪數日水漿不進嘗拾遺金坐待失者舉還之由歲貢任休寧常熟訓導遷金山衛教授作人以明倫敦行為先致仕歸年至九十安志

熊登之新建人博學強記舉明經絕意仕進與同邑舒泰等闡明理學著有性理解聖學正宗行世事繼母徐至孝四方執贄者常數百人督學王宗沐極尊禮之未艾而歿門人私謚貞孝先生泰好學有質行母歿哀毀廬墓事繼母如所生推產以讓其弟直指採風以孝聞遽卒詔旌其閭同上

葉香豐城人痛父早亡有感輒號慟不止母性嚴竭力承順必得其歡心婦稍拂於母即同跪寢門外怒猶未釋輒遣

歸逾年母為娶妾受之竟不一御母問其繇泣曰顧婦尚
未可絕耳母感其意即日迎歸新建魏良弼稱之曰孝行
聞於朝野風表化諸鄉閭嘉靖間旌同上

袁坡字邦彛豐城人母死廬墓泣血三年與鄒謙之王汝止
諸先生講學遂棄制舉業結廬山中從遊之士雲集平生
不事產業晚歲家益薄讀書談道晏如也同上

按鄧漢熊登之葉香袁坡前志皆不載今采入安志孝
義傳尚有南昌章彬黃璉徐德明李溥錦新建崔琬鍾
文奎鄭山鍾鎮豐城劉靜徐濤進賢支黼饒用文陳相
靖安陳伯宣漆維縉黃廷輝羅汝德奉新熊金玉寧州
陳龍武寧黃咄陳仲賢並陳維晉均輔不詳何縣人俱
附錄姓名于此

劉建字懋中豐城人嘉靖鄉舉任汀州青州二府推官所至
讞決多所平反閩倭亂後承檄巡行泉州便宜賑恤全活
甚眾在山東殲顏神鎮劇盜均臨朐差役汀青兩郡俱立
生祠致政歸府志

李輔字子卿進賢人嘉靖進士授中書舍人選監察御史萬
曆初督學南直行部不攜胥史弊蠹一清復刷卷京畿會
江陵相遭父喪欲奪情言路伺指保留輔獨不預歷山東
巡撫工部尚書卒贈太子少保人物志

唐堯臣字士良少事王文成講學有才名嘉靖鄉舉授湖州
府通判遷桂林府首設方略擒土酋蕭公反赦而賚之令
稽首受約于麾下眾莫敢犯陞杭州府同知擢浙江按察
僉事備兵台嚴料理軍饟不絕倭至堯臣以戚繼光兵連

破之增俸級一等尋歸著雨餘閣筆二卷 府志

吳子金字維良南昌人為邑諸生從王文成學及文成歸越子金與魏良政徒步往從之三年充然有得而歸嘉靖乙酉同良政登鄉舉時嚴嵩方掌北雍延之訓子未幾輒謝去竟不仕以講學終著壁箴屏銘夜氣說諸篇邑人陳源受學于子金後師安福劉邦采而友南城羅汝芳造詣益進 人物志

按唐堯臣吳子金明儒學案俱不載

鄧以讚字汝德新建人隆慶五年舉會試第一廷試第三授編修萬曆初座主張居正榜國政以讚時有匡諫居正弗善也移疾歸久之補原官旋引退詔起中允至中途復以念母返再起南京祭酒就擢禮部右侍郎復轉吏部再疏

請建儲且力斥三王並封之非言中宮鍾愛元子願早正春宮視臣民尤切陛下以厚中宮而緩冊立殆未諒中宮心况信者國之大寶建儲一事屢示更移將使詔令不信于天下非所以重宗廟安社稷也會廷臣多諫者事竟寢尋召為吏部右侍郎力辭不拜以讚登第二十餘年在官僅滿一考居母憂不勝喪而卒贈禮部尚書謚文潔 白志 羅萬象字光大南昌人萬曆舉人令潛江會邑大侵飢民聚眾相奪勢不可止萬象取巨魁二人立斬之揭竿以示餘鳥散復建北關以固圉創教場以習騎散徵糧之法立連環票善政不可勝舉 湖廣通志

徐作字季儒南昌人嘉靖進士初任刑部主事歷藩臬轉京堂至工部左侍郎掌本部尚書事考績廕長子懋勛其後

復以奉勅提督黃河大工及督建乾清坤寧兩宮大工晉
都察院右都御史時爭冊立忤皇貴妃意冠帶關住迨神
宗晏駕光宗起擢工部尚書作即以是年攀龍顛而逝熹
宗登極其家人屢疏循例乞請五典奉旨下部議覆值魏
黨擅權停閣崇禎十六年部議題補廕謚會闖賊犯闕事
遂寢後祀鄉賢 人物志

鄧以誥字汝欽新建人嘉靖鄉舉年十九勵志學問與其弟
文潔公以讚家庭切劘授建陽教諭鳩工遷學費至數千
金未嘗煩有司陞廣東博羅知縣邑恒燠民多病癩傳染
誥下車適七里驛有山勢甚磅礴積屍三百人羣聚其間
男子擔負至者輒搶女子至一
之誥震怒曰癩本
天刑不悔過又公然以
碎邪令諸遇癩者

任持長槍刀直拒之瘡見所懸示猶不為意以誥乃佯募
壯夫約日驅縛三百人盡沉之江於是癩一夕遁去奏最
遷刑部主事誥曰此王文成論學之署敢以聽斷而忘夙
夜自考乎是時有投匿名言鄭貴妃危太子事題曰續憂
危弘議輔臣一貫誣少宗伯郭正域為之連及部郎于玉
立禍不測誥密言于司寇曰妖書所坐無左證欲以莫須
有殺天下士非法之平也言甚迫切竟得從末減擢衡州
守柳大饑饑民萬餘人闌入礦山為盜格殺官兵鄒參知
學柱議大舉進勦誥曰此愚民為救饑計非敢為亂也當
一面持檄招安俟其解散徐賑之賊得檄果如約解散俄
常寧又大饑黠徒誘饑民數萬復入礦為盜參知欲以前
所治柳盜策治之誥曰事安可膠柱饑民所以敢於復盜

者度吾又必招安之也乃遣揮使率銳卒出其不意直趣至寧凡七閱月罪人斯得梟首惡三十輩餘黨悉散於是流亡麇集乃大發倉賑之寧境以平在衡三年報政遂上疏引疾致仕歸田垂數十年著衡州府志會心編澹臺祠講章及遺藁一卷同上

鄧子龍豐城人貌魁梧驍健絕倫兼通翰墨嘉靖中江西賊起掠樟樹鎮子龍應有司辟破平之萬曆初從大帥張元勳討平巨盜遷銅鼓石守備尋擢署都指揮僉事掌浙江都司會麻陽苗金道侶等作亂擢參將討之賊解散其黨五開衛卒胡若盧等火監司行署靖州銅鼓龍里諸苗咸響應為亂子龍火其東門以致賊而潛兵入北門賊遂滅十一年閏二月緬甸犯雲南詔移子龍於永昌木邦部耿馬

有姦人罕虔與岳鳳同為逆子龍急戰攀枝樹下陣斬虔虔子招罕招色奔三尖山自謂得天險令叔罕老率蒲人藥弩手五百阻要害子龍盡知賊間道乃命裨將鄧勇等提北勝浪渠諸番兵直搗賊巢夜半上而預伏兵山後夾擊火器競發生擒招罕招色罕老及其黨百三十餘人尖山巢空會劉綎亦俘岳鳳以獻進子龍副總兵永昌騰衝夙號樂土自岳罕倡亂始議募兵所募多亡命乃立騰衝姚安兩營劉綎將騰軍子龍將姚軍不相能致軍鬪帝以兩將皆有功置不問既而綎罷劉天俸代天俸被逮遂以子龍兼統之子龍右姚兵每工作輒虐騰兵及用師隴川子龍故低昂兩營兵騰兵大不堪欲去副使姜忻令他將轄之乃定而姚兵久驕因索餉作亂由永昌大理抵會城

所過剽掠諸兵夾擊之俘四百餘人亂始靖子龍坐褫官
下吏十八年孟養賊思箇叛子龍方對簿巡撫吳定請令
立功自贖無何丁改十寨賊普應春霸生等作亂勢張甚
定大徵漢上軍令子龍軍其右游擊楊威軍其左大破之
斬首一千二百級招降六千六百人帝為告謝郊廟宣捷
受賀復子龍副總兵署金山參將事先是猛廣土官思仁
烝其嫂甘線姑欲得之弗克偕其黨丙測叛歸緬數導入
寇二十年攻孟養犯蠻莫土同知思紀奔等練山子龍擊
敗之乃去子龍尋被劾罷歸二十七年朝鮮用師詔以故
官領水軍從陳璘東征倭將渡海遁璘遣子龍偕朝鮮統
制使李舜臣督水軍千人駕三巨艦為前鋒邀之釜山南
海子龍素慷慨年踰七十意氣益壯欲得首功急攜壯士

二百人躍上朝鮮舟直前奮擊賊死傷無算忽他舟擲火
器誤入子龍舟舟中火焚賊乘勢擊子龍戰死舜臣赴救

亦死事聞贈都督僉事世廕一子廟祀朝鮮 白志

涂杰字汝高新建人隆慶進士授龍游知縣擢廣西道御史
請告起河南道陞光祿少卿萬曆癸巳值有三王並封之
旨杰上疏語殊激切遂削職歸子紹燿已未進士官廣西

左布政使 人物志

張位字明成新建人隆慶進士改庶吉士授編修預修世宗
實錄位以前代皆起居注而本朝獨無疏言史官充位無
以自効宜日分數人入直凡詔旨起居朝端政務皆據見
聞書之待內閣裁定為他年實錄之助張居正善其議奏
行焉後以救吳中行趙用賢忤居正意謫徐州同知用薦

擢南京尚寶丞俄召為左中允管司業事進祭酒疏陳六事多議行以禮部右侍郎教習庶吉士引疾歸詔起故官協理詹事府辭不赴久之以申時行薦拜吏部左侍郎兼東閣大學士王錫爵還朝帝適降諭三王並封假待嫡為辭而位遽請帝篤修交泰早兆高禱議者竊哂之錫爵去趙志臯為首輔位與志臯相厚善志臯以位精悍敢任政事多所裁決進禮部尚書改文淵閣以甘肅破賊敘功加太子太保復以延鎮功進少保吏部尚書改武英殿位初官翰林聲望甚重朝士冀其大用及入政府素望漸衰主事丁應泰劾楊鎬喪師言位與鎬密書往來朋黨欺罔鎬拔擢由賄位得之帝怒下廷議遂奪職閒住除名為民位有才果於自用任氣好矜其敗也廷臣莫之救天啓中復

官贈太保謚文端著有開雲館集叢桂山房彙白志

張偲字士忠南昌人隆慶進士歷官廉介布衣蔬食與諸生無異繇福建布政使至御史巡撫貴州卒于任家居城南敞廬不蔽風雨人志

范謙字含虛豐城人隆慶戊辰進士歷官禮部尚書謚文恪有雙柏堂集府志

劉昞字瞻華南昌人萬曆舉人崇安教諭陞廣西永康令調繁藤縣以撫安猺獞功陞潯州府同知歷任多有實政篤志孝友年三十八以養母乞休著有說夢集廣西名宦志

李啓美字應成豐城人萬曆進士改庶吉士授檢討國儲未建會有三王並封之旨言者多獲譴責啓美上書政府謂東宮原無待嫡之條元子舊無分封之例豈惟失天下人

心恐天地祖宗亦復悵然于此舉矣時論壯之是歲值萬壽聖節又上疏陳時政并獻四箴時爭傳誦比于前代陸敬輿著有李太史稟三卷 白志

李光祖字繩伯南昌人萬曆進士授溧陽知縣邑有圩塍為積滂所齧發帑金築之治賦第設鋸筭聽民自為委輸民不苦賦賦亦不通行道人以暴疾仆于市門無賴者借以誣市中人一訊立雪而官為殫死者遷南京吏部主事卒溧陽人請祀于名宦祠 府志

樊良樞字尚植進賢人萬曆進士令仁和與人推誠無隱徵比不事鞭扑水災議蠲賑悉心籌畫全活無算遷浙江提學以不作魏瑞祠碑文解印綬歸著有易解 浙江名宦志

羅憲凱字元甫豐城人萬曆進士人嘗以清介絕倫人莫能干以私嘗捐俸修復寺宇 書院以勤勞卒官所著有金陵北征入計諸草 府志

李瑄豐城人由進士授 吏遷福建僉事奉表入都列首輔申時行十罪語 王錫爵削籍家居三十年不復出 白志

按李瑄 安志 多載 白志 補

劉曰寧字雲嶠南昌人少博學多才志識弘達毅然以天下為任萬曆進士改庶吉士與陶望齡焦竑黃輝董其昌才名相先後授編修奉母假歸性至孝痛父失養母時年七十餘入問寢與依依無異童子時復奉母入長安會纂修正史凡為公卿名臣傳紀三百三十有六陞右中允充東朝講讀官權採議起中貴四出海內騷動南康守吳寶秀

忤湖口稅璫李道逮治詔獄曰寧發憤上書請撤礦稅諸使宥寶秀疏入留中曰寧遂奉母南歸尋起右諭德掌南京翰林院事由大司成晉少詹學士禮部侍郎改吏部卒予祭葬贈禮部尚書謚文簡

人物志

按劉曰寧所著有雲嶠集

丁此呂字右武新建人萬曆進士自漳州推官歷湖廣參政所至皆著政績權貴以計典修怨謫戍粵東尋以薦起天津海防贊畫未赴卒

丁氏世美集

吳銓文字行甫更名遇南昌人萬曆壬午鄉舉為漢陽推官有鄉猾以畝鬻富生蕭某紹生值而實無畝生往按宿他莊猾偵其僕舊私莊婦夜羣擊殺婦質明執生誣構屬銓文訊狀文曰生嫗媪復怒殺媪邪推輕而後鞫者竟

入生坐償會御史慮獄生梏拳候鞫其僕苴履赭衣懷刃詣直指前一手拔刃一手挾冤狀大號曰殺莊婦者我也語畢立自引決直指愕甚閱牘得銓文所著讞語遂直生而出之自是疑獄悉下銓文咸質神矢公以聽適楚宗以羸呂事構王而賺趙中丞可懷為王所倚一日多宗白事復抵梧遂攘臂格中丞至死銓文時在黃聞變曰非撫莫靖迺夜馳省諭諸宗以朝廷優養德意會御史按安陸銓文率諸李官往謁御史曰當以及聞衆嘿然銓文曰殺重臣誠不法幸猶未斬關掠藏也脫不解毋迺驅使速叛邪御史用其言不月餘事定陞雲南安州知州題改興國州入覲卒

人物志

萬國欽字二愚新建人萬曆進士授婺源知縣徵拜御史言

事慷慨不避權貴尚書董份大學士申時行王錫爵座主也屬浙江巡按御史奏請存問國欽言份諂事嚴嵩及削職歸吞噬鄉里無狀不宜加隆禮事遂寢初吏部員外趙南星戶部主事姜士昌疏斥政府私人給事中李春開以出位糾南星士昌而其黨陳與郊為助刑部主事吳正志上疏言春開與郊媚政府干清議且論御史林祖述保留大臣之非於是御史赫瀛集諸御史於朝堂議合疏糾正志以臺體為辭國欽與周孔教獨不署名曰冠薦冠服薦服乃日以保留大臣傾善類為事我不能苟同瀛氣奪疏不果上火落赤諸部頻犯臨洮鞏昌帝召見時行等於皇極門咨以方略時行以款貢足恃為言未幾警報狎至乃推鄭洛為經略行邊實用以主款議也國欽抗疏因列上

時行納賄數事帝謂其淆亂國事誣汙大臣謫劍州判官吏部尚書陸光祖擬量移國欽為建寧推官帝以特貶不宜遷切責光祖而盡罷文選郎中王教等大學士趙志臯疏救亦蒙譙責國欽後歷南京刑部郎中卒

白志

按國欽字安志府志俱作和甫

黎道炤字明中南昌人萬曆進士知桐城縣擢諫垣歷禮科右給事中神宗時冊立未定大臣多阿匿陰陽上下相持不決道炤每疏即言他事必為連類摘發歲甲午有旨皇長子出閣講學預令採買金珠等物費三十餘萬而部臣疏請儀仗侍衛拜賀禮持不下且責言者道炤歎曰此吾死諫日也即草疏約略千餘言一無避忌疏入上震怒株連臺省各降革有差道炤為民若而年冊立既定恩復冠

帶厥後諸羽翼者多召用至大官而道焘已不待光宗遺
詔議卹始贈光祿寺少卿尋用子元寬仕晉階中憲大夫
崇祀鄉賢 人物志

章邦翰字公佐南昌人萬曆進士知潮陽縣拜監察御史巡
鹽兩浙疏陳鹺政利弊伸枉獄絕請謁用例轉衡永僉事
時議開銀礦政府致書屬察所屬有礦處歎曰言利豈人
臣事君之義且擾民不復政府書五年不得調既防粵海
簡練軍伍飭舟楫謹扞擷設方略多捕生倭及首功其闌
出中土物悉籍之以佐軍需轉參政督儲山東陞雲南布
政使未任請告歸卒東粵人祀之名宦 同上

陳道亨字孟起新建人萬曆進士除刑部主事歷南京吏部
郎中同里鄧以讚袁貞吉亦官南都人號江右三清遭母

喪家燬於火僦屋以居窮冬無幃妻子拾遺薪爇以禦寒
或有贈遺拒弗受由湖廣參政遷山東按察使右布政使
轉福建為左所至不私一錢以右副都御史提督操江光
宗立進工部右侍郎總理河道妖賊徐鴻儒作亂道亨守
濟寧扼諸要害以衛漕舟事平增俸尋拜南京兵部尚書
參贊機務楊漣等羣擊魏忠賢被譙責道亨憤偕九卿上
言高皇帝定令內臣止供掃除不得典兵預政陛下徒念
忠賢微勞舉魁柄授之恣所欲為舉朝忠諫皆不納何重
視宦豎輕天下士大夫至此疏入不納道亨遂求去歸踰
年卒道亨貞亮有守自參政至尚書不以家累自隨一蒼
頭執爨而已崇禎初贈太子少保謚清襄 白志

饒景暉字廷奎進賢人萬曆戊子與二兄景暘五弟景暉同

舉時謂三饒而景暉以連第筮仕部曹出守順慶轉福建
提學副使考滿有聲復以參政視學科歲試凡再周蓋異
數是時公四弟景曜督學兩浙同日命下朝野榮之歷陞
四川巡撫清寬厚重撫御有方屬賴以安尋推兵部侍郎
理南京戎政會有忌者拂袖歸卒贈尚書子祭葬

人物志

萬建崑字季瑜南昌人虞愷之孫廷言之子萬曆進士除荆
州府推官人以年少易之及視事習爰書精讞決雖老吏
不如時江陵相籍貲產株連滋蔓建崑歎曰奈何以朽骨
示威稜請一切弛之嘗核長沙郡牘有以贖鍰故淹罪人
子孫者具狀請豁臺允之檄贖十金以下勿復追十五郡
俱得視此以卓異徵故事未三十不與給事御史之選當
軸者重建崑才謂增年可得要地建崑持不可乃授禮部

儀制司主事教習駙馬益勤職業嘗曰溢而倖職以外靡
而竊職以內兩無取焉時以為名言會廷臣請預建太子
建崑亦侃侃具疏宵人作蜚語揭之通衢金吾上其事神
宗震怒治言者建崑謫武岡尉歸而從其父講學注易所
造益深家食二十餘年臺使銓部交薦皆留中不下光宗
登極擢南京尚寶司卿不數月而歿侍御陸師贄及同里
宦游者資其含斂乃以喪歸建崑三世登顯仕而田宅不
踰中人里中言清白吏者首稱焉

同上

劉定國初名是字去非南昌人浹之次子萬曆辛丑會魁改
名定國初授全椒知縣以能調江都行取兵部主事歷尚
寶少卿尋陞太僕寺少卿光祿寺正卿遷兵部侍郎以修
理皇陵功陞南京工部尚書致政歸所著有奏疏學易劄

記鴻雪館集行世

同上

熊維寬字仲舒南昌人太僕卿瑞之仲子績學著書萬曆中豫章飛雲社制藝矜式宇內維寬主壇坫焉由博士入太學所著有寤堂集大雅堂集子曰馮崇禎壬午鄉薦有卧雲堂集孫一瀟別有傳

同上

涂宗濬字鏡源南昌人萬曆進士由知縣擢山東道御史巡按廣西河南山西順天陞大理寺丞歷延綏巡撫加陞副都御史兵部右侍郎總督宣大山西尋陞右都御史兼兵部右侍郎晉兵部尚書加太子太保以順義王就封功廕錦衣千戶世襲乙卯乞休歸及已老復起原官不得辭力疾輿櫬以赴甫數日卒贈少傅謚恭襄

同上

徐即登豐城人萬曆進士師事同邑都御史李材當材官滇

南時奏緬捷中蘇御史之讒逮繫獄即登為禮部官暇即獄中受業淹郎署垂十年始遷福建提學副使閩舊為徽國教化之地即登崇聖學正文體與諸生窮性命指歸士風丕變由福建參政晉河南按察使辛丑考察調用既歸杜門謝賓客弟子益進著儒宗要輯儒範正學堂彙來益堂彙易書詩春秋禮記說遜國諸臣錄詩文若干卷撫按薦章凡數十上天啓六年卒年八十有二

府志

章潢字本清南昌人十三歲見鄉人負債縲絏者惻然為之代償與萬思默同舉業已而同問學有問先生近日談經不似前日之煩者潢曰昔讀書如以物磨鏡磨久而鏡得明今讀書如以鏡照物鏡明而物自見構洗堂於東湖聚徒講學聘主白鹿洞書院御史吳安節疏薦少宰楊止菴

奏授順天儒學訓導年八十二卒所著圖書編百二十七卷論止修則近於李見羅論歸寂則近於聶雙江而其最諦當者無如辨氣質之非性離氣質又不可覓性則與戢山先生之言若合符節矣

明儒學案

按人物志本清所著圖書編之外尚有書原始春秋竊義禮記劄言論語約言諸書

胡汝寧號似山南昌人萬曆進士授潮陽知縣擢禮科給事中神宗末年國本有搖動之意汝寧引經執義草疏以上事遂寢尋請告歸里南贛巡撫洪瞻祖乃其門下士也嘗登堂見其數椽不葺諷之出山汝寧仰視不答瞻祖歎息而出所著有掖垣奏議若干卷

安志

按饒伸以論太倉相下詔獄汝寧與陸夢龍等復交章

劾伸以媚執政其生平可知矣人物志削而不載當以

此姑從安志存之

原跋

高煒字闇卿南昌人生而值父暮年家道日落至無以為養日課蒙計其所入充衣帛食肉之資勉勵發憤補弟子員父沒事母孝愈篤遇寢疾必同婦籲天願減已算延旦夕萬曆丙午歲貢授浮梁訓導矜式多士惟以躬行實踐為本却貧生入庠之贄甚貧者助以金遷吉水諭教思不倦如浮梁時鄒忠介倡道東南晉接必施隆禮歿廿餘年兩邑弟子員請祀名宦

人物志

劉一焜字元丙萬曆進士授行人擢吏部主事歷考功郎中佐侍郎楊時喬典京察盡斥執政私人已改文選遷太常少卿以憂去久之擢右僉都御史巡撫浙江會遣中官曹

奉建鎮海寺於普陀山一焜偕巡撫李邦華爭不可弗聽
織造中官劉成卒一焜慮遣代屢疏止之已得請矣有呂
貴者奉命護成遺裝姦人因請留貴督織造疏直達禁中
一焜與邦華極論其非帝卒命貴代之貴既任條行十事
多所侵擾一焜疏駁且禁治其爪牙貴為斂威一焜以暇
築龕山海塘千二百丈濬復餘杭南湖民賴其利講陽明
之學於虎林外郡小邑皆增學田御史沈珣誣訐其賊私
一焜自引去卒贈工部右侍郎 白志

按一焜安志府志俱失載白志補入所著有石閭山房
集

劉一燿字著泉南昌人萬曆乙未進士是科劉氏同第者五
人一為太府廷柱一為太僕洪謨而燿與駕部一煜人傳

一燿復為同堂昆弟海內稱科名盛事筮仕祁門令邑狹
民不足於食仰他郡之轉輸一燿勸民出穀置社倉準朱
紫陽法鄉各建倉凶荒得不告匱丁內艱服闋補上海縣
苦逋賦追呼漠不肯應一燿親自挾格寬單民而先官戶
民健訟隙起睚眦則網澤中遺骸為訟端廉得其實特嚴
反坐之條七保為往來孔道遊民日繇浦中與風波爭命
一燿疏其故道建閘以時蓄洩至今利賴之尋選授兵科
給事中疾終於京邸子斯陞字士雲制藝盛行海內是時
臨汝有陳艾章羅稱四家豫章有劉余鄧三子劉即斯陞
余名正垣鄧名履古 人物志

趙邦佐字勉吾新建人少穎異諸經子史目過即成誦長補
郡庠益下帷攻苦遇試輒高等士林爭相引重力行善事

敦倫勸學守謙好施識者謂邦佐厚種德必大顯子繼武亦能嗜古好學後邦佐以孫曰冕貴贈通議大夫

同上

丁永祚字爾錫南昌人弱冠試儒童第一遂舉於鄉六上公車不利謁選授德化令德化僻小庠士多他邑人永祚爲作南門以疏風氣邑始有科第調福清縣城險且庠薄屢議增拓而以費鉅莫敢任永祚力肩其役民不告擾且刻石頌功以治行異等除知太倉州補禹州擢刑部員外奉命讞江南獄豁免大辟謫戍數百擢知寶慶府晉秩按察副使仍理郡事未幾實補雲南糧鹽道抗疏乞休以參政致事

府志

熊劍化字神阿豐城人萬曆進士授增城令調繁華亭自奉簡約如寒素一切讌集餽遺悉謝却月俸外一介不苟取

赴名辭境垂橐糲然兩蒼頭敝衣如故父老嘆曰世安知華亭宰廉介有是耶擢侍御史旋以假歸所著雲間集數卷燬於兵

人物志

李鼎字長卿新建人天資瑰異援毫風雨馳驟咄嗟數千萬言歲庚寅扯力克火落赤擁衆入據陝西莽刺川洮河大震鼎方在京師草安邊策六篇籌扯火二酋事甚悉相國王錫爵許國見而奇之適鄭洛以大司馬經略西邊二相國具言鼎才俾贊畫幕府鼎於盛暑中間關七塞幾萬餘里所過自督撫大將軍而下莫不握手交懽鼎益極論諸關塞得失靡有避忌卒佐鄭司馬功成檄諭扯力克東歸而革火落赤市賞遂令遠徙者鼎之力也無何日本酋平秀吉將謀篡國逐朝鮮王李昞大司馬石星聞於上一時

競議東征鼎又著海策六篇合前安邊策六篇草疏上之
下大司馬議覆當是時鼎以布衣獻書輦下君相咸虛懷
採納名大噪於海內鼎治春秋如服虔氏治詩如鄭康成
所著經詁二卷簡而確質而古博士弟子皆傳誦之同上
彭坂字仲升南昌人爲諸生時况彭在賣藥燕市偶與羣鬪
一人病發死下在於獄坂急鬻衣裘器具充路費奔赴辨
白留滯五年覓館穀供橐餽值熱審在暴疾坂身代桎梏
囚首庭階極辨得白歲月既久郡削其弟子籍入成均萬
曆庚子中順天鄉試以親老就漳平縣令調繁上杭縣有
富人陳昌書者殺人應死或欲翫法而旁移其罪坂力爭
不可諸所秉正執法多此類秩滿遷毘陵郡丞未半載解
組歸家無擔石初刻有畸人集繼刻有匡山九子社集九

子者樊良樞戴九元余槩張超張儲胡欽華余欽燿李泉
也子份萬曆戊午舉人官至副使任永平知府府志

胡欽相字南渚南昌人萬曆甲午鄉舉居家篤踐履嚴氣介
性爲時所敬憚未及仕而歿子鴻漸順治甲午舉人同上

喻致知字無知新建人萬曆進士授宜興令值歲大侵請賑
上官不待報而發廩民賴以濟邑有兩沈盤互常鎮其民
阻險易爲盜賊致知略用鈛筭法間他陰伏以相參考往
往得其主名衆遂解散而湖渡無警考選南京工科給事
中上用人起廢疏極言壬午丙戌以來諸臣或以忤觸或
以誑誤放擯如鄒元標趙南星王德完輩皆所謂國之楨
幹人之典刑何可不及時予環其他名對勤政之請諫止
蘆田之封收撤礦稅之使糾參馮尚寶之姦理學易名之

議禁止私鑄之弊蠲租賑饑之告安邊保泰之奏前後凡數十上以親老乞終養不得請抑鬱成疾卒

同上

朱多炆字貞吉弋陽王多煌之弟穎敏絕人善詩歌兼工繪事見古人墨蹟一再臨摹如出其手尺牘小札日可百函語皆有致嘗輕裝出遊變姓名為來相如遠遊山水蹤跡徧吳楚之間嘗偕吳明卿入吳訪王伯穀於金陵王元美於弇山歸而掩關却掃以倦遊名其詩臨終操筆作帖命子謀揮以白幘鶴氅斂櫬側並鐫勒銘識弟子私謚曰清

敏先生

人物志

朱統鐵字佛大樂安靖莊王裔授封鎮國中尉究心古文詞賦著有適園詩集面壁齋文集鐵賦性至孝父奉國將軍謀澄博極羣書當神廟初宗憲日繁祿日匱用相國李廷

機議責令親支檢舉宗弊澄遂訐奏族宗謀墜以婢產冒濫奉旨削墜爵省祿可萬金嗣王銜之中澄以奇禍被逮鐵痛父冤叩閤上書奉旨復澄爵秩如初通國稱鐵為純孝子議泚議沌俱明經議汴中癸未進士

同上

汪應婁字漢章新建人少負雋才萬曆己酉舉鄉公車不第益好為古文辭與相國張洪陽及里中耆宿為匡山社龍光社逃禪寄酒徜徉山水間以二親年高就浮梁教諭壬戌以母艱歸里結廬墓左未及服闋病卒所著有隸事評及栖約齋玉毫庵黃山雲居天都諸遊草

同上

樂繼同字于楚新建人萬曆丙子鄉舉初授湖廣通城縣教諭陞榮縣知縣值番酋倡亂郡邑望風解紐繼同慷慨請纓卒奏蕩平之効陞岳州府丞時久雨水漲膏壤淪沒繼

同竭誠拜禱歲以有秋用薦擢本府知府請告歸卒

唐大章字伯和豐城人萬曆進士由庶常進編修歷南祭酒會逆璫魏忠賢亂政有請建逆祠於國學傍者大章發憤抗言力持不可議遂寢竟以此忤璫意奪職崇禎戊辰起南禮侍尋轉吏侍擢禮部尚書教習庶吉士纂修神宗熹宗實錄旋充經筵講官改南禮部尚書卒於家享年八十遣官祭葬贈太子少保大章沒而俎豆於鄉賢輿論允愜皓首請老六子三十六孫繞膝一時所未有也文集若干

卷藏於家 人物志

饒伸字抑之進賢人萬曆進士授工部主事十六年庶子黃洪憲典順天試大學士王錫爵子衡為舉首申時行壻李鴻亦預選禮部主事于孔兼疑舉人屠大壯及鴻有私郎

中高桂遂摘可疑者八人并及衡衡實有才名錫爵大憤疏辯與時行並乞罷去時行之命禮部覆試侍郎于慎行以大壯文獨劣擬入罪御史吳時來不肯桂力爭乃如慎行議列甲乙以行錫爵調旨盡免黜且奪桂俸二月伸乃抗疏劾時行附權蔑紀請與錫爵洪憲俱賜罷錫爵時行杜門求去帝皆慰留而下伸詔獄給事胡汝寧陸夢龍楊文煥御史林祖述管九臬毛在浚交章詆伸以媚執政由是伸廷杖削籍桂貶三秩調邊方伸既斥朝論多咎錫爵錫爵內不自安屢請敘用起伸南工部主事改南吏部引疾歸天啓初起南光祿少卿累官刑部侍郎魏璫亂政請告歸所輯學海六百餘卷時稱其浩博兄位字廷立累官工部侍郎母劉年百歲與伸先後以侍養歸先是任

邱劉元震元霖兄弟俱官九列以母年近百歲俱乞養親歸與伸兄弟相類一時皆以為榮

白志

喻三元字少極豐城人萬曆中知平涼府沈義廉靜勇於任事初至郡值敵犯靜固悉心防禦頒布保障條約遠邇戒嚴居民恃以無恐首禁宗藩請託諭令修禮義以重廉隅條議獎賢宗以勵不肖宗姓悉斂避不敢犯創行條鞭以蘇民困裁冗費冗役當事者或稱不便三元謂裁省非立異取怨以要譽當官如理家視有無為豐嗇食人食者分人事止知封殖視民若路人如朝廷官人之意何一時臺省監司咸重之斷疑獄懲豪橫免贖鍰崇禮讓即漢循良無多讓者

陝西名宦志

饒景曜字廷獻進賢人萬曆進士筮仕刑部會鑛稅中使四

出多以抗旨劾奏守令輒逮治景曜讞決多所匡持歷官河南少參浙東分巡所至有聲尋改督兩浙學政備兵金衢時值鑛賊竊發設方略禽渠領撫按上其功晉河北參政旋陞浙江按察司轉四川右布政使未任而卒宦橐蕭然豫章論清操者以為最

人物志

羅朝國字維禎新建人萬曆癸未會魁授清浦知縣泖湖水衝蕩廬舍禾稼捐貲築堤勸農課士弭盜止訟以治最行取銓部歷尚寶卿通政使晉操江副都御史所建堅悉關安危至計其最著者如皖城立操礮練水師申明沿江防禦之法備載章奏中特拔技勇潘可大題授中權後勦流寇死難晉南京工部侍郎旋擢刑部尚書歸里門雍容論學講義一夕無疾而逝贈少保予祭葬如例

縣志

江西通志卷第六十九

江西通志卷第七十

人物

南昌府

明

劉一燦字季晦南昌人萬曆十六年一燦與兄一焜一煜並
 舉於鄉越七年又與一煜並舉進士改庶吉士授檢討一
 焜為考功郎掌京察大學士沈一貫欲庇其私人錢夢臯
 鍾兆斗屬一燦為請謝不可由是忤一貫意尋晉贊善歷
 祭酒詹事掌翰林院事四十五年春京察宵人用事謀逐
 孫承宗繆昌期錢謙益一燦力保持得免故事掌院無滿
 歲不遷者一燦居四年始遷禮部右侍郎光宗即位擢禮
 部尚書兼東閣大學士偕韓爌並命時內閣止方從哲一

人一燬燬甫拜命帝已得疾偕諸臣召見乾清宮有小豎
附帝耳語帝搖首俄一朱衣婦人從帝前挽皇長子入復
推之出皇長子見帝忸怩曰欲封后耳諸臣愕然既退一
燬語吏部尚書周嘉謨曰上顧念大臣不已若不欲委身
婦寺者朱衣人何無畏憚若是朱衣人者即選侍李氏也
明日帝崩諸臣入臨畢一燬詰羣奄皇長子當柩前即位
今不在何也羣奄東西走不對獨東宮伴讀王安前曰爲
李選侍所匿耳一燬大聲言誰敢匿新天子者安曰徐之
公等慎勿退遂趨入白選侍不出皇長子諸大臣不肯退
第出即返選侍頷之復中悔挽皇長子裾安直前擁抱疾
趨出一燬見之急趨前呼萬歲捧皇長子左手英國公張
惟賢捧右手掖升輦及門宮中厲聲呼哥兒却還使使追

躡者三輩一燬傍輦疾行翼升文華殿即東宮位羣臣叩
頭呼萬歲事稍定選侍方居乾清猶趨駕還宮一燬曰不
可宜暫居慈慶皇長子心憚選侍然之一燬語安曰主上
冲年無母后外庭有事吾受過宮中起居公等不得辭責
明日嘉謨及左光斗疏請移宮首輔從哲徘徊其間若無
預已事者既又欲緩移宮期一燬曰本朝故事仁聖嫡母
也移慈慶慈聖生母也移慈寧今何日可姑緩耶乃於初
五日偕同官請即日降旨竚立宮門以俟選侍不得已移
噦鸞宮天子復還乾清事始大定帝既踐祚從哲被劾在
告一燬遂當國與燬相得甚歡念內廷惟王安力衛新天
子乃引與共事安亦傾心嚮之所奏請無不從明年天啓
改元邊事棘廷臣多請復用熊廷弼一燬亦言廷弼守邊

一載殘疆晏然不知何故翦除致有今日事尋有詔盡謫前排廷弼者姚宗文等官言路多怨一燬初選侍將移宮其內豎李進忠劉朝田詔等盜內府祕藏過乾清門仆金寶墮地帝憾選侍甚必欲誅盜奄王安為司禮亦惡之法司已擬大辟矣諸奄百方救不得久而帝漸忘前事安亦為魏忠賢排死諸盜奄乃厚賄忠賢為地先是有李文盛者具本辨冤疏未發內傳忽免朝詔死而下其疏於法司一燬執奏詔等議誅久無可雪疏直下部前無此制帝不得已下其疏於閣一燬復言此疏外不由通政司內不由會極門例不當擬旨謹封還原疏由是忠賢輩大恨定陵工成忠賢攘以為功一燬援故事內臣非司禮掌印及提督陵工不得濫廕止擬加恩三等諸言官論客氏被謫者

一燬皆疏救又請出客氏於外及言官交章論沈灌灌疑一燬主之與忠賢客氏等比而齟一燬又密窺魏客等漸用事一燬勢孤是年四月候補御史劉重慶遂力詆一燬不可用給事中侯震暘御史陳九疇復劾之并刺其結納王安於是一燬四疏乞歸堅臥不起疏凡十二上乃令乘傳歸已而忠賢大熾矯旨責一燬誤用廷弼削官追奪誥命勒令養馬崇禎改元詔復官一燬在位累加少傅太子太傅吏部尚書中極殿大學士八年卒贈少師福王時追謚文端

曰志

徐良彥字季良新建人萬曆進士初令婺源力折大璫礦稅新安一郡賴之起復補溧水令值大璫查馬場復力阻之擢河南道御史抗疏福王當之國異已者指為門戶外轉

福建參議至則擒海盜王四等八十餘人尋分守青州會
白蓮盜起齊魯之間無寧宇以計弭之渠魁如張道人唐
道人一呼皆至故齊魯騷動而青州雞犬無驚尋晉尚寶
大理丞左通政歷仕途凡二十八年始命巡撫宣府在事
僅一月白言台吉毛乞炭等犯邊皆鞭箠使之會魏忠賢
蓄志叵測以宣雲密邇京師使其客說通往來如是四三
終不應而崔呈秀疏劾至矣疏中謂宣府巡撫何以取之
如寄云為趙南星之黨也時得旨降調崔魏意不愜復以
汪文言獄羅織餽文言贖論戍附近而大司馬迎忠賢意
與戍清浪蓋清浪與楚附近其實隸貴州也得旨之日買
舟入黔著書賦詩若不知為負罪行者忠賢時布置伺察
往來黔楚道間亦不為懼崇禎初錄用貶竄諸臣起大理

寺卿陞南京工部侍郎 人物志

舒曰敬字元直南昌人萬曆進士授泰興知縣六閱月城修
政舉以杖斃巨窩張耀忤太守吳秀意中之於齶使士民
冤之赴闕訟令無罪時值柄政者修釁僅下部議而曰敬
解綬行矣裝不具銷所束帶百姓貯帶於庫爭餽薪米構
祠祀像名遺帶亭曰敬歸未幾左遷徽州府儒學教授致
仕紫陽山白鹿洞諸社皆臨以講席一時名公鉅卿多出
其門前後撫按暨南北臺省奏薦凡三十一次崇禎間尚
書沈演復崑疏薦用奉旨條陳時務因上七策十論進覽
採納敕部議用未赴山居幾五十年貧約如諸生門人分
俸即均於弟姪併族人鄉人之鰥寡者所著有隻立軒前
集續集四書易經講意詩經臆解時務要畧諸書行於世

享年七十有九門人萬時華等私謚文侃先生

同上

胡良機字省之南昌人萬曆進士歷知臨淄益都二縣天啓初擢御史疏論乳媪中涓又請停內操楊漣擊魏忠賢良機亦上疏言忠賢之惡不減汪直劉瑾陛下過優容而閣臣不據法爭豈真所謂門生宰相耶忠賢及魏廣微深憾以年例遷廣東參議良機方按貴州不候代而去遂斥爲民崇禎元年起故官按宣大二鎮年滿當代褒以敏練令復巡一年尋爲中官王坤劾罷久之起光祿典簿終南京吏部主事

白志

涂喬遷字伯友南昌人萬曆進士令合肥擢山東道御史適有三王並封之旨朱維京王如堅痛哭爭之疏上兩人俱遣戍喬遷抗章力爭已長安雷火地震喬遷申言災不虛

生皆因國本未建語甚切直尋降典史光廟改元特起勲丞陞太僕少卿改南太僕卿適范濟世爲操江都御史思詭言南鹽馬諸庫藏積鏹百餘萬非內臣搜括不可得魏璫喜遣其養子胡良輔等至索所稱百餘萬運使運同暨揚州前後守下至胥役俱以追賠收逮復坐索二十六萬於太僕喬遷曰虛派以殺人吾不忍良輔恚曰如若言何以復厥公是時方有建祠之事良輔曰曷建厥公祠於關山以畢斯舉喬遷曰吾頭可斷祠不可建也良輔以其語聞逆璫未幾指爲門戶削奪喬遷始終伉直然居鄉和易近人無大小偃僕接之崇禎中復原官議起用卒

府志

周著字誠子南昌人萬曆進士繇推官歷太守藩臬皆以廉明稱庚申任四川右布政使天啓辛酉科臣明時舉捧檄

起土司兵應調援遼永寧酋長奢崇明令土目將兵一萬詣重慶聽撫臣徐可求點視可求杖其土目又欲盡黥土兵之面以別記驗於是土兵洶洶思亂統領人樊龍樊虎振臂一呼皆響應立殺可求遂陷重慶進逼成都左布政使朱燮元攝軍務事分遣諸將領兵據隘而與諸藩臬畫地城守著自署西城賊稔知西城勢易拔終日夕攻不去置雲樓高與城等著出兵亟擾賊營別遣卒持火具焚其雲樓賊益夜縱炬千餘集火門著復取水如瀑布下澆之賊引退終不能下明年正月忽城外大譟而至視之有物如舟高城丈許長五百尺樓數重上板屋如平地中載賊數千人各挾機弩毒矢以牛數百頭運石轂行之俯視城中著曰此呂公車也乃用巨木為杆柱置軸柱間挽索運

杆取巨石重千鈞者發之飛擊如彈丸又夜繼敢死士於城下載大銃擊賊賊遁去成都復全自十月甲申至壬戌正月乙丑抗守者百二十日事定燮元進副都御史巡撫四川著代燮元為左布政使後入覲歸以勞瘁疾作卒於家崇禎初贈大理寺卿同上

熊宇奇字正子新建人萬曆進士筮仕刑曹京師有冤獄淹繫三年宇奇一訊而決時國本尚搖新建張文端當國與宇奇肺腑親二上章愆息之文端深採其言戚畹鄭養性賂通款誠揮其使時宇奇部俸十年自以姻婭引嫌力求補外乃以僉憲督學湖廣參蜀藩討播軍興宇奇督理糧餉烈日乘馬會水溢馬斃徒步草鞞艱苦萬狀捷奏晉一秩尋改浙江副使歷湖廣按察使晉右布政天啓二年中

璫浸用事遂挂冠歸未幾魏忠賢逆祠遍興江西撫臣楊邦憲使斂費作祠宇奇正色厲言江右水旱頻仍豈宜困以土木且魏功德於江右何有中丞意不可回議徹周程祠爲祠址宇奇與諸紳議安有毀先賢祠爲璫祠者詣當事力爭會璫敗逆祠中格宇奇之力也

人物志

傅宗臯字直甫豐城人萬曆進士知將樂縣行取爲南京監察御史時鹽政壞操院以宗臯聲望隆題請督理鹽政及督京倉請改折一十七萬去官攢守候之苦庚申八月營軍譁宗臯帶管京營以法戢之陞南尚寶卿尋以忤璫奪職歸里於地方利弊知無不言楊比部疏減遼餉宗臯力佐之邑父老至今能道其事後起大鴻臚固辭

縣志

萬燝字闇夫南昌人兵部侍郎恭孫也少好學砥礪名行萬

曆進士授刑部主事嘗疏論刑獄天和天啓初元兵事棘工部需才調燝工部營繕主事督治九門垣墉市銅江南皆勤於其職遷虞衡員外郎司鼓鑄時慶陵大工未竣費不貲燝知內府廢銅山積可發以助鑄移牒內官監言之魏忠賢怒不發燝遂具疏以請忠賢益怒假中旨詰責燝旋督陵務其時忠賢益肆廷臣楊漣等交擊率被嚴旨燝憤抗章極論略言忠賢性狡而貪胆麤而大口銜天憲手握王爵廕子弟則一世再世賚廩養則千金萬金毒痛士庶斃百餘人威加縉紳空十數署一切生殺予奪之權盡爲忠賢所竊內廷外朝止知有忠賢不知有陛下尚可一日留左右耶疏入忠賢大怒矯旨廷杖一百斤爲民執政言官論救皆不聽當是時忠賢怒廷臣交章劾已無所發

江南通志 卷七十一
忽思借燦立威乃命羣奄至燦邸摔而毆之比至闕下氣息纔屬杖已絕而復甦羣奄更肆蹴踏越四日卒忠賢憾猶不置誣以贓賄三百燦廉吏破產乃竣崇禎初贈光祿寺卿福王時賜諡忠貞 白志

晏文輝號懷泉南昌人萬曆進士授浙江太平知縣調繁武進正士習清賦役決冤獄建先賢祠修武進縣志行取刑部主事提牢燭姦考選南禮科給事中叅代藩叅織造叅方面貪劣官三十人疏請兩監廣額宗室開科獨署九印六管京營知時事不可爲請告歸 縣志

李繼周字汝輔南昌人萬曆進士授上海令陞刑部主事讞訊明允尋奉命審決河北以內艱歸服闋補員外歷郎中出守黃州擢川東副使至達州會奢崇明奉援邊之檄率

部下抵重慶中丞徐可求移書繼周促其面計封疆事甫抵重慶崇明部下煽亂遂遇害一時文武臣僚身殉者十餘人獨繼周以局外蒙難事聞贈光祿卿達州舊有四忠臣皆功德被於此土者州守黃立言請以繼周增入而道臣孫好古與繼周同遇害遂並列爲六忠祠云 人物志

熊明遇字良孺進賢人萬曆進士授長興知縣擢兵科給事上疏極陳時弊言今春以來天鼓兩震於晉地流星晝隕於清豐地震二十八天火九石首雨菽河內女妖遼東兵端吐火即春秋二百四十年間未有稠於今日者且山東大侵人相食黃河水稽天兼向者太白經天輔星湛沒熒惑襲月金星愆行或日光無芒或日月同暈或爲恒風爲枯旱天譴愈深而陛下所爲皆誣天拂經之事此誠禽息

碎首賈生痛哭之時也敢以八憂五漸三無之說進又雜引天文書以證時事凡數千言皆極危切忝詩教輩以明遇與東林通出爲福建僉事遷寧夏參議天啓初進太僕少卿尋提督操江魏忠賢黨謀盡逐東林以明遇嘗救御史游士任給事中薛國觀遂劾其黨庇徇私忠賢矯旨革職坐汪文言獄追贓千二百金謫戍貴州平溪衛崇禎初釋還起兵部右侍郎南京刑部尚書改兵部疏陳四司宿弊悉見採納山東叛將李九成等陷登州明遇信巡撫余大成言力主撫議久不就撫乃調關外軍討定之是時宣府兵警甚急巡撫沈際與中官王坤等遣使議和餽金帛酒牢諸物邊警即解事聞帝惡際專擅召對明遇等於平臺明遇力爲際解帝不悅逮際下吏於是給事中力詆明

遇際交關誤國明遇再疏乞罷命解任候勘尋以故官致仕用薦起南京兵部尚書改工部引疾歸卒所著有綠雲樓集中樞集子人麟崇禎進士

白志

劉綖都督顯子勇敢有父風用廕爲指揮使萬曆初從顯討九絲蠻遷雲南迤東守備緬甸犯永昌騰越巡撫劉世曾擢綖遊擊將軍署騰衝守備事緬甸自其酋莽瑞體以兵服諸番勢遂強江西人岳鳳者驍桀多智率象兵數十萬分道內侵綖至鳳懼乃令妻子及部曲來降綖責令獻金牌印符及蠻莫猛密地乃以送鳳妻子還隴川爲名分兵趨沙木籠山據其險而已馳入隴川境鳳度四面皆兵遂詣軍門降綖復兵進緬甸將先遁留少兵隴川綖攻之鳳子曩烏亦降綖乃携鳳父子往攻蠻莫雲南平獻俘於朝

縉進副總兵縉將家子父顯故部曲多健兒縉擁以自雄
征緬之役勒兵金沙江築將臺於王驥故址威名甚盛然
性貪御下無法有詔革任以遊擊候調無何羅雄變起會
縉解官至霑益世曾喜令與裨將劉紹桂萬整分道進討
縉直擣赤龍山拔之獲其妻妾連克三砦賊盡平止首功
五十餘級而撫降者萬餘人論者稱其不妄殺歷陞五軍
三營叅將會朝鮮用師詔以副總兵從征及班師進都督
同知世廕千戶屬播酋楊應龍作亂擢四川總兵官移師
征之應龍熟縉才頗懼益兵守要害三峒絕險縉分兵攻
其三面生擒其魁乘勢克三關盡克三峒踰十餘日克後
水固營於冠子山會諸軍共平賊錄功進左都督世廕指
揮使縉爲將數被黜抑性驕恣如故以軍政拾遺罷歸四

十六年召爲左府僉書明年二月經畧楊鎬令縉及杜松
李如柏馬林四路出師縉兵四萬由寬奠道險遠重岡疊
嶺馬不能成列次深河連克牛毛家二砦已深入三百里
杜松軍覆猶不知復整衆進登阿布達里岡力戰不支遂
死養子劉招孫最驍勇見縉死突圍中格鬪亦死事聞遣
中使祭陣亡將士恤縉家縉於諸將中最驍勇平緬寇平
羅雄平朝鮮倭平播酋平猓大小數百戰威名震海內天
啓初贈少保世廕指揮僉事立祠曰表忠 同上

胡海定字聖占南昌人萬曆舉人署樂平教諭善造士如王
綱許琮皆以經術節義名一時巡按邢紹德特薦崇禎年
間詔舉賢良方正副使張有譽以名聞遷汜水令賊壘壓
境鼓諸生王璧等決死戰斬馘頗多廉得煽亂爲賊囊橐

者數十人計擒斬之亂遂定歲飢設賑存活萬人以不奉
催科檄投劾去甲申聞京師陷慟哭不食累日歸葬其父
移其母去所居海口四十里走樂平聯絡鄉勇復乞師黃
道周道周壯之執手謂白君以致仕令家居能仗節倡義
如此引滿酌之立爲發師引戰不勝被執死於婺源旣受
刃僵立不仆婺源人隕涕曰江西真有人

邱邦士集

按明末江西多死節士而海定最先前志未載今采補
姜曰廣字居之新建人萬曆進士授庶吉士進編修天啓六
年使朝鮮力却贈遺還陳海外情形有裨軍國者八事多
議行魏璫惡之削籍崇禎初起右中允積官至吏部右侍
郎尋左遷十五年用薦起詹事掌南翰林院已而在南京
改禮部尚書兼東閣大學士時史可法督師揚州曰廣與

高弘圖協心輔政阮大鍼謀進用力阻之馬士英挾擁戴
功謀擅朝權深忌二人嗾劉澤清假諸鎮公疏力攻劉宗
周并及曰廣以三案舊事及迎立異議爲言曰廣屢疏乞
休歸後盡節俟家池

白志

李曰輔字元卿南昌人萬曆舉人天啓初爲成都推官巡撫
朱爕元倚以兵事偕諸將攻復重慶崇禎四年擢南京御
史時遣中官出鎮曰輔疏諫曰邇者一日遣內臣四尋又
遣用者五非兵機則要地也假專擅之權駭中外之聽啓
水火之隙開依附之門灰任事之心藉委卸之口小臣不
敏實爲寒心陛下踐祚盡撤內臣中外稱聖昔何以撤今
何以遣天下多故擇將爲先陛下不築黃金臺勤招頗牧
乃急急內臣是遣曾何補理亂之數哉疏上鐫三級爲廣

東布政司照磨歸隱西山香城寺潛心理學攜一僕與居
尋遣還與僧共晨夕而已山居十餘年卒

同上

鄒元忠字時効新建舉人萬曆中知增城縣勤政愛人力持
古道築號舍數十於學宮之東與諸生講學請廣科試額
遂爲例丙申大饑發倉捐俸賑濟全活以萬計又於城東
四十里築隄三千一百尺以除水患民賴有秋擢延平同
知不就歸增之人士俎豆不衰

廣東名宦志

夏以賓字于王新建人萬曆己酉舉人授延平推官八閩大
獄輒令按鞫多所平反轉寧波同知計擒通番巨猾獲賊
千餘緡以助餉未幾海寇竊發承檄勒兵渡海進屯龍王
嶺設伏制勝遂以孤軍挫賊數萬兩臺舉卓異遭讒左遷
拂衣歸著有奚囊蠹餘理閩讞錄藏於家

新建縣志

宋應昇字元孔奉新人吏部尚書景之曾孫也萬曆乙卯與
弟應星並魁其經時有二宋之目五上公車不第謁選得
湘鄉知縣復補恩平歷高州同知陞廣州知府所至有慈
惠聲家居孝友恭謹親族困乏必勉賑之自廣州請告歸
未幾卒所著有方玉堂集

人物志

劉洪謨字惟後南昌人進賢籍萬曆進士授建德知縣調仁
和皆有惠政陞南工部主事禮部郎中尋知承天府抗陵
監不肯下調真定陞易州兵備歷漳南參政晉光祿少卿
太僕少卿魏璫燄灼三疏告休得旨歸里居講學隨時問
答多所啓發撰大學續衍義十八卷洪謨恬淡簡重與顧
文憲趙高邑論學而雅不立幟所著書五十種晚作夕惕
內照篇以自敘

同上

劉仕瞻字淡峯南昌人萬曆進士知宣城縣兼有神君慈母之稱擢兵科給事中嘗爭國本忤旨其後以軍政考選有霍文炳者以緝捕功自副千戶陞指揮僉事內坐以市恩降雜職屢薦不起卒天啓二年贈光祿寺少卿初仕瞻治宣城與黎桐城涂合肥名成鼎足其在言路亦然在錮籍又然時人謂之歲寒三友同上

按黎名道烱涂名喬遷皆南昌人各有傳

吳羽文字長卿南昌人萬曆進士擢吏部因事乞歸至崇禎六年始復出歷考功文選郎中帝亦積疑吏部有私選郎十一人譴黜大半遷者三人而已羽文痛絕諸弊數與溫體仁牴牾賊毀皇陵有詔肆赦體仁令刑部尚書馮英以逆案入詔內羽文執止之而議起錢龍惕李邦華等偵事

者誣羽文納二人賂下獄羽文用高鳳翔為大名知府鳳翔故嘗坐小事言者復謂其徇私坐謫戍侍郎吳姓等交薦復官未赴卒白志

按羽文初擢吏部時高邑趙南星為冢宰謂江右名區宜用兩銓曹乃以新昌鄒維璉與羽文並用忌趙者或激羽文告歸為驅趙計羽文因乞歸養奉有吳羽文鄒維璉既皆賢俱著留用之旨既而攻趙者益力羽文乃堅請歸通籍三十年居銓僅一載在獄在戍共八載此段本傳不詳今據人物志補錄原跋

羅汝元字懋先南昌人萬曆進士授行人擢御史出按雲南值安邦彥狂逞與奢崇明相應汝元同都御史閔洪學戡定之黔國沐昌祚怙寵而驕侵士庶膏腴廣其莊田又抗

不納賦乃以黃白物詭白米四十石黃米二十石來饋汝
元峻詞却去疏請田歸黔國徵收歸有司又偵知其左右
肆虐者八人置之法民皆手額懽呼號曰羅鐵面爲建却
金救民亭滇士苦公車費括所積俸給之於是三十七人
咸踴躍就道滇士本年計偕自汝元始陞太僕少卿適魏
忠賢專政削奪歸里崇禎初起廢籍歷通政擢僉都御史
巡撫浙江浙之當國者中以蜚語落職歸汝元官至九列
兩尊人猶健飯無恙綵衣承歡戚里侈爲盛事云 府志

鄒復宣字用晦新建人萬曆進士授上虞令調金華值歲旱
露禱甘霖立注擢御史會邊事急合請徵募廷臣具復宣
名以上奉命予餉三十萬聽便宜從事復宣核蠹懲濫加
意撙節用不滿六萬金簡戰士數千皆投石超距一可當

百大司馬倚賴之壬戌復宣再視城務卒贈光祿寺少卿
祀鄉賢子正偉生子度珙順治戊戌進士官翰林檢討正
修生子度鏞康熙癸卯解元丁未進士 人物志

魏時應南昌人萬曆進士初任建陽知縣擢工部主事調吏
部歷考功文選員外郎特疏請簡用鄒元標趙南星以副
當世之望銓故弊數疏立四季考察法有受賕犯律者得
參送法司如五部例旨下著爲令轉驗封郎中給假奉母
還里林居十餘年會東林議起以時應前疏薦元標南星
故出爲閩藩左參歷按察使天啓中晉光祿寺卿羣小方
共斥鄒趙改時應爲南通政旋冠帶閒住崇禎初卒於家
著春秋質疑等書行世 府志

劉曰梧字陽生南昌人萬曆進士授中書擢御史適巡中城

奉旨僉商供薪炭不終朝竣事有力者不及請出按三吳
稅事方起璫計竭民膏自金陵至皖城計程不旬日輒立
七廠曰梧檄令併一廠永以為規已而刷卷南畿歸會九
載考績即家起南常少祀高皇寢園徘徊東陵感愴遜國
事重傷孝康皇帝之已謚而復去也因上瞻顧陵寢一疏
得賜廟謚識者偉之以右僉都御史撫薊州上疏請除夙
弊寬文網拔孫顯祖於行間天啓間方引疾歸尋起少司
馬抵京匝月於相國一燂稱宗親璫頗有意銜之遂拂衣
歸里年八十二卒崇祀鄉賢同上

余樞字謹叔新建人萬曆鄉舉令江浦邑有張史二圩齧於
江水額賦五百餘石累通縣百餘年樞至急行周視躬率
民修築不避暑雨堤成而享無窮之利巡鹺使者按臨諸

賈持茶例銀以進約萬餘金樞峻却之遷興國知州有傳
偽漢遺孽柯陳兩姓謀不軌於境上者方伯熊宇奇檄樞
往反復諭以人言籍籍當慎舉動以保田廬家室開導懇
至兩姓感泣環拜竟消亂萌崇禎間歿祀鄉賢人物志

朱試字以功南昌人在童子中即端嚴不苟顰笑受學於章
布衣潢晝討夕論多獨得之悟撰時習錄就正篇諸書晚
益深於易有所論著未竟天啓中御史田珍薦試於朝未
及授官而卒府志

朱謀瑋字明父一字鬱儀寧獻王七世孫封鎮國中尉萬曆
辛卯給諫葉初春以學行薦於朝巡撫邊維垣巡按陳倣
交相推轂得旨俾綰通侯之章理石城王府事公族有所
紛競無不請質瑋片言剖決皆屈服而去生而天資穎異

目所流覽終身不忘以先儒譚易尚理而置象不能獲文周孔子立言之旨作易象通八卷以晦翁詩註於比興微詞妙旨多鬱而未章乃原本小序酌諸家得失作詩故十卷疾緯候之亂三五典墳也作邃古記八卷以糾正圖識之尤謬疾李斯之變壞頡誦舊文也作古文奇字輯解追述先聖之制作以鍼砭漢世訓詁之沈疴他若書禮春秋魯論大戴各有箋疏又著金海百二十卷異林十有六卷駢雅二卷六書本原一卷說文舉要水經注箋四十卷豫章耆舊傳二卷藩獻記一卷晚成古今通歷用其法推左傳僖五年正月辛亥冬至昭二十年二月己丑朔冬至以爲魯史所用皆周正故經書春王正月明非夏商之正也於時諸侯僭竊天下衰微鮮行頒朔之禮晉楚大國或用

夏正未能齊一魯秉周禮獨不敢變故孟獻子稱正月日至可祀上帝是已其論醫則有取於張子和論壬遁則有取於祝泌論陽九百六則有取於王希明悉鑿鑿見於徵驗而於堪輿之說尤精嘗言祖墓病水以語諸父兄弟咸弗信會羣從暴卒者十餘輩塋不能忍遂自發之墓中果積水若溪澗諸父始遜謝自咎別移吉壤太史焦竑嘗曰鬱儀制作精微宏博一依六經莫可簡選湖廣李維禎山東邢侗福建曹學佺屈指江右人物輒首及之子統銓崇禎丁丑進士詩澹遠高古藁燬於兵不傳

人物志

按鬱儀所著尚有枳園近藁

楊繩武字昌倩南昌人萬曆鄉薦授臨安知縣有調繁之檄適丁外艱服除補四川綿竹綿多盜案繩武以一讞示精

敏荏符頓息鄰邑有燒香會號召數千人撫軍檄諸州縣議合勦繩武持之曰此愚民奚煩斧鉞哉緩之自解耳撫軍納其言即委繩武撫諭之亂遂定量移信陽知州左遷衡水陞延平同知投効歸同上

楊惟相字無技豐城人萬曆甲午鄉舉授延慶州知州延慶古雲中地邊外僅隔一牆時順義未封數擁衆入寇相密授機畧擒獲奸謀敵驚以爲神適久雨南山邊牆半傾敵乘勢盡拆毀之前此屢修屢壞州守獲罪者十餘人惟相抵任微服步出邊見沙漠草茅相結如窩諸部落素寢匿於中因火之敵自是無所棲止不敢窺邊始得一意趣工修牆一萬一千九百八十餘丈節省萬餘金臺使交上其事奏最以邊例晉刑部員外先是滇有逆賊阿克之變至

破城劫印顯皇帝震怒逮訊失事撫鎮及白推官京師權貴多爲囑求寬解相閉門謝客奏請九卿科道會問據法成辟諸權貴竟以私怨中之請養歸田再補官卒著周易蒙訓禮經管見論語膚義行於世府志

夏時化字宣子新建人萬曆丙午鄉舉授永豐縣教諭造士得人科名繼盛陞太平知縣清節惠政士民戴之崇禎戊辰值流寇作難攻城月餘多方捍禦食盡死守卒殲寇全城事平道府設凱宴時化遽歿於公宴之堂巡撫朱燮元疏請優卹特給以死勤事扁額人物志

杜彥卿字六人新建人以例入太學試得別駕彥卿不願仕請歸養生平不苟言笑樂善好施而不信因果酷嗜書購求不遺餘力長子果順治丁亥進士改庶吉士授江南道

御史贈彥卿如其官

同上

吳廷謨字孟嘉南昌人萬曆丙午鄉舉少厭帖括博綜羣書欲以古文詞名家與山人羅治相切劘謂明文規倣多而獨運寡比辭屬事斷自秦漢而止尤工於為論抑揚頓挫而要歸至當臨川丘兆麟陳際泰皆亟稱之嘗策蹇驢發薊門由魯道謁闕里睇岱涉濟泛黃河得詩歌若干授南城教諭遷安慶望江知縣望江古雷州邑巖而小廷謨政尚清靜四境以寧亡何病痿謝事著鷓園詩草二卷文章論章各二卷讀古擷餘二卷續草佚草各一卷而羅治亦有大有月山人集

府志

章允儒字珍甫南昌人方伯邦翰子萬曆進士授華亭令方邊事孔棘詔天下計畝加賦華歲額六十萬加至七十有餘允儒搜成賦可省者折抵如數再加則設法盡抵之先後計免三萬七千餘兩允儒於讞決尤稱神明上官往往以旁郡獄屬之有子殺父妾亡何父暴卒言以藥弑者允儒曰人命應檢償其父固郡守烏得輕議檢耶坐殺父妾足以斃逆子矣武弁鳩殺同官弁強有力且善辯時有使過代請者或曰職官當從減允儒曰大辟無可贖之法干戶無議貴之條竟擬如律邑之金家街有橫尸一老者哭曰吾子也訴之令賊弗得或榜片紙道傍曰薛某殺人又從薛所得死者所弄二錢允儒詰其地審視曰得之矣縛庫樓獨居一佻達子至曰汝殺人立服蓋死者為孌童誘狎不遂因殺之而以弄錢嫁禍於薛諸發奸摘伏多此類用治行異等擢吏科給事中熹廟初逆璫魏忠賢漸擅威

江西通志 卷之十一
福織造大監李實尤賸削於東南借違忤上供參知府張宗衡等奪俸允儒抗疏駁之疏入璫以阻撓龍袍矯旨予杖仍謫戍會上御經筵首輔葉向高從容陳說意稍解俄以天變修省從薄譴奪俸一年璫自是深銜之允儒遂請假歸居吏垣六月凡所爭三案爭封疆暨籌邊惜餉疏十餘上皆言人不敢言鐫級調外既去仍削奪崇禎改元起吏科都給事未幾枚卜命下適允儒以首垣主議所推舉皆人望惟烏程溫體仁不與遂發難言廷推不公竟以削籍出國門

人物志

樊尚璟進賢人萬曆丙辰進士天啓中忤璫家居

府志

鍾師薦字維坤南昌人大僕寺卿沂之孫禮部郎允復之子少負異才試棘闈十有三次不得志乃著治平十議詣闕

上陳嗣以保舉除泰州同知甲申之後挂冠歸隱二十餘年教授生徒著有四書詒尚書詒易經詒蝶園制義遊吳草蜨園詩草續草樹瓢鳴家訓十則壽八十有六

白志

饒元瑄字彥昭進賢人邑增廣生性孝友七歲居父喪哀毀骨立儼然成人事母曲盡愛敬四十年如一日精研理學課子之外塵事不涉里中數椽悉讓弟姪居止乃獨僑寓孺子宅旁潛修密證經史性理諸書貫穿馳騁多有獨契所著五經疏義經濟彙編良知指歸若干卷藁焚於兵以子宇栻貴累贈中憲大夫

人物志

萬尚烈字思文新建人諸生時即以正學為己任師事章聘君潢萬曆辛卯舉於鄉授建昌教諭歷擢邵武同知捐俸刻潢所集圖書編晉比部郎擢平越知府致仕歸杜門却

掃益肆力於性命之學中丞解學龍督學陸之祺蔡懋德皆請主澹臺祠太史金聲請主新安還古書院年九十五卒所著有四書測易贊測詩述傳測聞學雜記白志

王時熙南昌人萬曆進士官御史歷太僕寺卿天啓中名在東林子猷定自有傳同上

張神武本姓陳新建人萬曆中舉武會試第一授四川都司僉書永寧宣撫以掠擒奢崇明之母奢世續其部目閻宗傳怒以求主母為名大掠永寧赤水普市摩泥事聞神武論死用經畧袁應泰薦命從征神武率親丁二百四十餘人疾馳廣寧前至河遇逃卒十餘萬神武激其帥曰以此衆戰誰禦且雖死不失忠義乃鼠竄偷生乎帥不從神武遂獨率所部以進渡河抵首山竟歿於陣所部俱戰死存

十四人負重傷還監軍御史方震儒繪神武像率將士羅拜為文祭之詔贈都督僉事立祠奉祀同上

李頴字弘明中丞材之子巡按某劾材擊緬冒功逮刑部詔獄論死頴始婚於家聞變草屨囚服詣獄乞代寢處於赭衣蟣蝨之間者六載得減死論戍於漳之鎮海衛頴隨侍戍所十三年萬曆丙午鄉舉天啓改元頴伏闕訴父枉狀部選授閩鄉教諭竟繳憑歸杜門却掃所著有中庸叅論語測或問臆說四書捷鏡同求錄年代紀要共若干卷頴中鄉試第九名父材伯父棡皆鄉試第九棡亦以前丙午中式事尤奇府志

帥衆奉新人萬曆甲午舉人知淳安調金華皆有善政擢御史抗疏指陳時事忤逆璫調外鄒元標同九卿力為申奏

賜還巡視西寧茶馬秩滿晉太僕卿遷副都御史以母艱歸老於家

奉新邑志

徐文璉奉新人漢高士孺子裔萬曆丁酉舉人歷臨漳崇仁教職撫按交薦推叙州同知當奢酋蹂躪之後奉檄經畧永寧請建城於大壩及古蘭州控扼險阻又改土為流丈田起科於是荒徼土田盡入版圖矣

同上

陳譚字清庵新建人由貢知孝感縣峻風節政尚慈和巡按令查各屬倉糧絕苞苴剔奸蠹殆盡邑大侵出倉粟貸民全活甚衆尤明決能斷疑獄邑人有拯涸轍饑民辨池中冤骨之譽卒祀名宦

府志

陳良訓進賢人萬曆癸丑進士授行人擢戶科給事疏論魏璫鐫級歸戊辰起原官出為台紹兵備海防有功歷陞陝

西布政於流寇充斥中全活飢民甚衆秦人立祠祀之丙子撫鄖陽鄖界秦蜀楚豫之交賊出沒盤踞良訓簡練將卒以計殲劇盜郭三海等捷聞賜蟒幣銀紵有差

府志

傅應期字愧石進賢人幼有至性祖母吳病侍湯藥不少懈祖母憐之至為忍痛萬曆戊午鄉舉詩書之外無他好嘗曰敦五倫乃為實學舍一貫皆是邪說知順昌日與士民講孝弟會楚王造錢具啓力爭以忤藩歸撫按連章薦起原官歷仕罔鄉尋致政嘗銘其座曰大道一貫曰忠曰恕君子持已必敬必恭其學如此

邑志

王介慶字受茲奉新人崇禎中以選貢知泰順才幹明敏課士作人建講堂設射圃修文天祥塔畫定丁口照人輸納稱良吏內擢虞衡司主事

浙江名宦志

謚吉臣字仲貞南昌人父應華萬曆時以叅將援朝鮮戰歿吉臣由舉人爲雲夢知縣李自成陷襄陽其黨賀一龍陷德安安陸知縣濮有容一門十九人皆死吉臣遣孥歸身効死弗去城陷被執不食賊驅上馬曰我失守封疆當死更安往乃遇害崇禎十七年贈太僕寺丞廕一子白志

楊惟休字叔度豐城人以貢授保定通判管宣府赤城事所著泰昌日錄僅載元年庚申八月事然萬曆末暨天啓初元諸大政悉隱括其中其記挺擊紅丸移宮三案顛末甚悉大抵是王之案而褒劉一燝周嘉謨楊漣等之忠魏忠賢大怒其黨霍維華疏指一燝等朋比并劾惟休以草莽而記注朝廷起居且稱述舛錯奉旨追燬日錄褫革衣巾時惟休已之宣府訛傳屢至竟暴卒旣卒忠賢嗾劉志選

再劾之未幾三朝典要興所掎擊必日錄所是所嘉與必日錄所非者幸惟休已卒獲免於詔獄之慘死也惟休著述甚富遭兵燬遂無全帙五經宗義二十卷僅存易論六篇辨禮一篇歷代長帙七十四卷僅存戰國之齊楚系南北朝之十八家閩外春秋數卷天文四卷僅存日行月行日觸月觸星緯辰論大衍歲差霾論暈論數篇衡邊要畧一卷僅存博塞一篇宣雲二篇東事客對一篇他如大冶錄二十卷武略十卷古詩評選十二卷焚餘四卷芒書十卷舒嘯堂雜劇十卷博古一卷地輿一卷佛宗一卷樂府一卷皆失傳同上

傅崇中字壹饒南昌人萬曆丙午中應天鄉試在成均時大司成引問孔鄭箋疏五經同異間及天人之概治安之畧

酬對如響初授崇安令擢刑部主事奉敕恤刑粵西尋晉
懷慶太守方流寇肆毒軍書旁午徵兵索餉檄若雨下崇
中應之裕如悉捐俸入以饗將士人皆樂為效死藩儲某
驕恣不法天子下鎮撫以問郡守崇中先按其佐從而隸
之法以次詰責其悖戾狀不少屈時有密謀存爵與求襲
者皆持萬金為餽崇中正色拒之寅僚有誤軍機坐辟屬
令有點簞簞逮繫皆以片言獲免各致千金為報力却之
九載報績竟以藩案被謗解組歸年至九十卒同上

萬時華字茂先南昌人父民命馬湖太守時華生而穎異諸
經子史無不歷覽成誦冢宰李長庚任江西布政時合十
三郡能文者為豫章社於南昌首時華與萬曰桂喻全襍
時華尤為所推服工詩暨古今詞自萬曆間古近體率競

聲響亡性情公安袁宏道力矯之一變為長吉而蹇澀無
餘味竟陵譚元春又力矯之一變而劉長卿為寒胸儉腹
借口時華曰詩豈可如是耶乃益取陶謝李杜諸家而寢
食之不襲前人不循近派格惟其高語惟其淡遠古文權
衡於柳子厚而雜以永叔曰子厚能奇峭不能敘事永叔
能敘事也一時以碑版誌銘傳記序錄請者無虛日負海
內重名幾四十年卒艱於一第崇禎中保舉守令詔下布
政使朱之臣列其品行聞於朝應徵北上抵維揚輒病竟
不起生平事父孝友於弟與人無疾言遽色廉讓節儉退
然若不勝衣於古今得失國家是非時政利害識始慮終
議論之所及節槩之所操持雖賁育慶忌不能奪也學使
侯峒曾稱之曰真儒舉而祀之學宮所著漑園初集漑園

二集園居田居東湖集又有詩經偶箋習毛鄭者宗之
人物志

萬一之字不二南昌人讀書務解大意喜酒好客酒後耳熱
抵掌論前人興廢事鑿鑿有據人有善必詡之有過面諍
不撓不佞佛不媚權豪事父母至孝天啓乙丑子元吉登
第逢熹廟皇嗣慶成許進士榮其所生寓書馳封於祖然
按會典款例不合意鬱鬱是秋疾革諄諄以父歿未葬母
老失養為憾又遺命勿厚葬當視大父其死不忘親如此
同上

朱健字子強進賢人天啓辛酉鄉舉博聞強記與弟給事徽
晨夕淬勵期以著作名當世鍾陵二朱一時比之機雲軾
轍著蒼崖子又著古今治平畧凡禮樂兵農賦役河漕諸

大政錯綜數千載間纍纍如貫珠識者以為鄭漁仲馬貴
與堪稱鼎足授邵武推官靖九都賊以申太守吳文禕棄
城奔逃事反為所中冤死
府志

游允達字兼之豐城人天啓鄉舉授獲鹿令歲大飢稱貸賑
濟存活無算各邑輸納恒苦火耗允達令里甲自封投櫃
吏胥不得經手邑當山右要衝往來供億浩繁錙銖不擾
民間捐貲創建礮臺度賊所必經處棊布之孤城屹若金
湯屢登薦剡覩國事可憂力以病請臺使為具題允以病
痊起用蓋郡邑之異數也離任士民立去思碑
人物志

萬元吉字吉人南昌人天啓進士授潮州推官補歸德崇禎
初以大計謫官用曾櫻薦以永州檢校署推官事居二年
督師楊嗣昌薦其才改大理右評事軍前監紀嗣昌倚若

左右手諸將亦悅服嗣昌卒元吉丁內艱歸起南京職方
 主事進郎中時高傑與黃得功劉澤清方爭揚州奉詔宣
 諭元吉與得功書令共獎王室得功報書如元吉指乃錄
 其藁示澤清傑嫌漸解廷議以元吉能輯諸鎮擢太僕少
 卿監視河北軍務奏請修建文實錄復其尊稱并還懿文
 追尊故號而速褒靖難死事諸臣及近日北都四方殉難
 者以作忠義之氣從之後以兵部右侍郎兼右副都御史
 總督江西湖廣諸軍兼巡撫代楊廷麟守吉安旋入贛城
 破赴水死年四十有四 白志

按同時職官死節者龔芬楊廷麟郭維經楊文薦于斯
 昌素從諤彭期生周湖王明汲萬發祥林琦王其宐王
 其窩黎遂球柳昂霄魯嗣宗錢益亨劉孟鞫劉應泗吳

國球郭寧登胡縝林逢春二十三人紳士死者盧象觀
 月世光謝讚楊萬言孫經世徐餘慶郭其昌聶邦晟董
 纘謝明登馮復京陽麗天余孝義金之杰十餘人 原跋

萬敬宗南昌人崇禎中知光化縣時張獻忠破襄陽敬宗到
 官以死自誓賊薄城遂自盡賊義之引去城獲全 府志

朱謀晉字公退初字康侯獻王七世孫也少英敏讀書修辭
 結廬蛟溪在龍沙之北躬畊賦詩郊居耕釣之作詞指婉
 約才名蔚起後寓居金陵 列朝詩傳

按謀晉所著有羔雁淹留蕪城中車四集

朱統鑽南昌人系出瑞昌郡王孫某為鎮國將軍當宸濠反
 時將軍不從後濠敗誅而將軍封世不絕五傳至謀圭統
 鑽父也統鑽始棄爵為諸生崇禎十年成進士選知江夏

縣在任四年以守禦為急江夏城廣周三十餘里鎖為增修蓋計賊窺城必先窺江而沿江數百里可竊渡者興國則富池黃陂口大冶則西塞山武昌則道士洲馬橋二江口樊口江夏則白澣鎮八吉堡青山砦縣東則劉家嘴東北土橋舖東南卓刀泉縣南李家橋新館皆與城犄角地也大江上游則石嘴又上則金口鎮宜練土著立水哨船其大江西岸屬漢陽東岡白人磯沌口宜各就對岸設防令相呼應若漢口以上宗三廟湏口則宜拒守下水路則黃花淖油湖澗口五潼口陽羅當立聲援陸設保柵水列竹排上施拒馬機器伏弩禁賊舟不得順流近岸其城內則分為十二營城西北外近江分五營東北城倚山立濠東門外建立大關兵一營南二大營建石關於漢陽門外

曰北關保安門外曰南關包羅臨江五門招致武士親教技擊習水師間語其子議霧曰流賊徘徊穀城志且在武昌吾欲因守禦練成一旅可以制江之上下則大江以南安枕亡慮矣未幾卒諸務漸廢後二年流賊果入武昌

邦士集

舒孟華字去華靖安人邑貴顯招之合譜孟華與父廬崢毅然謝去踵蘇明允例獨修支譜以傳前後七試鄉闈不遇崇禎初貢成均授青田丞孟華曰此固郁離子著作之地也郁離不高安丞乎日手一編伊唔不置丞專司鹽兼督糧鹽苦積盜糧苦蠹役暗加孟華設方畧捕獲渠魁且痛革猾胥之漁獵者士民手額以誦秩滿遷楚衛參軍卒青邑舉祀名宦所著有念梅館集二十四卷

人物志

朱統鎔字時卿以王孫封奉國中尉僻處城東賓客罕至傾
祿入以購祕冊得輒讀讀輒歷歷不忘每舉子試二三場
畢持試目問所出鎔必備註其語出某書某卷某葉事則
出某代某年取而質之無片言隻字之牴牾也由黃帝堯
舜迄三代若蘇轍之古史劉恕之外紀金履祥之通鑑前
編並稱該洽著古史記四十卷志居其半余寅有同姓名
錄僅三卷鎔推而廣之得十六卷又有六書微詩解頤錄
牡丹志寧獻王事實皆瞻博可觀同上

汪思湛字元淵新建人崇禎癸酉鄉舉值天下方亂流寇長
驅所至攻城陷邑士大夫多持祿養交鮮有慷慨任事者
思湛心竊痛之會詔廷臣舉堪任守令各一人都諫李汝
璨薦思湛累詔趣詣京師以母春秋高辭不赴會丙子歲

饑奸人挾宗室無賴子弟望屋而掠諸大家皆拒戶自保
思湛亟謁閫帥沈壽崇曰亂國用重典今亂矣尚得忌器
耶壽崇悟密請於巡撫解學龍擒斬首亂者數人徐發賑
勸施以活飢民境中遂定丁丑下第歸卒於維揚客舍思
湛年二十九喪偶即不娶平居無邪視無戲言雖燕處威
儀肅然著四書解詩解山房語錄史類等書及古文詞數
十卷子懋勲康熙庚戌科進士同上

朱謀敖字用莊明宗室授封鎮國中尉重封奉直大夫善詩
文書畫兼工篆隸著有閒閒閣藻城南草并註六書正譌
周史籀文諸書行世敖賦性孝義制行端謹第三子統鉅
中丙子經魁庚辰進士同上

龔尚升字公起南昌人崇禎間以經明行修舉任廣西南平

知縣清貞律已不名一錢有富民因訟屬庫吏進千金重懲庫吏麾去之為政崇獎名節務以移風易俗為先士庶為建醮祈嗣百里內有屠宰者眾羣毆之其得人心如此卒於任建祠以祀同上

李汝璨字用章南昌人崇禎進士知蘄水縣以廉卓稱先是蘄士三脫科汝璨為建文峯塔立興賢莊置田以供課給賞已而周壽明輪元同榜得雋者七人擢刑科給事中諫疏數十上忤上意又以小犢破犁糾時相遂下刑部獄及赦歸田里聞國變衰絰向北哀慟稽首作祈死文遂絕粒卒所著有四書周易講義詒塾小箋幼儀歌掖垣諫草同上

史垂譽字望之豐城人崇禎進士改庶吉士是年以闖賊警臚傳後期迨館選則距甲申無幾矣城破時垂譽為賊所得受酷拷濱死者數絕而復蘇逸出城外伏水溝中五晝夜南歸負創跣行遂終跛履絕意仕進家居以壽終榆墩外集

陳美字在中新建人崇禎時由鄉舉為常山知縣母憂歸服闋起官宜城兵燹之餘民生彫瘵及張獻忠據穀城人情益懼美安輯備至獻忠陷襄陽遣兵來犯美偕守備劉相國迎擊賊中伏敗去巡按御史上其功撫治都御史王永祚以六等課所部有司美居上上薦於朝未及擢用十五年冬李自成連陷洛陽南陽汝寧長驅犯襄陽左良玉先奔永祚及知府以下俱遁賊入城鄉官羅平知州蔡思繩福州通判宋大勳殉節賊分兵寇宜城棗陽穀城光化均

州美守宣城固拒八晝夜城陷抗罵不已竟為賊支解白志

按人物志時有督師標下官徐準具題癸未奉旨褒卹
贈光祿少卿宜城民立忠烈祠祀之云

熊洪字開先新建人年十九督學拔冠通郡文名蔚起家貧
屢困場屋崇禎庚午仲子文舉舉於鄉洪時年方五十餘
遂棄去諸生專工吟詠明年文舉成進士由合肥令陟銓
曹每持議論頗不愜於柄人適同鄉某通書政地雜以隱
語波及洪柄人遂借以相中洪間關對簿事得白歸里著
足庵詩藁人物志

魏時光南昌人善舞雙刀崇禎九年夏為廣濟典史邑遭殘
破長史設排兵三百人委之教練其冬賊據蘄州河口憚

時光不敢渡時光募死士夜襲其營手殺數賊俄賊大至
部卒皆散時光單騎據高坡又殺數人賊還繞之剗斷被
執不屈死其兄陳於上官却不奏兄憤發病死友人收殮
之哭盡哀曰弟為國死兄為弟死吾獨不能表暴之乎具
牘力陳乃奏聞贈廣濟主簿予卹典白志

唐良懿字我來新建人崇禎進士知宜寶縣時滇蜀爭界當
事者閣筆數年良懿按行其地爭立解考選工曹陞營繕
郎纂修本部實錄陞徽寧道副使解組歸絕跡城市以不
緇名其軒衣大布食脫粟蕭然自得也卒年八十有三人
物志

傅冠字元甫進賢人祖炯南京刑部尚書天啓二年冠舉進
士第二授翰林編修崇禎中累官禮部尚書兼東閣大學

江西通志 卷之十一
士誤判章奏引罪放歸唐王時以原官督師巡視江西江西失守寇寓居泰寧被門人汪亨龍所執死於汀州血漬地久而猶鮮汀人歎其忠所著有寶綸樓集 白志

饒元珙字仲璨進賢人崇禎癸酉舉人授工部主事歷官郎中繕營房飭守備勤慎罔懈司廠臨清相沿陋規革除畧盡解組歸戊子七月避兵鶴仙峯元珙被執子宇柁從匿所急出請以身代父子并死 同上

羅儀則字鶴在南昌人性樸重崇禎時以歲貢廷對特賜進士知三水縣辛巳水災田廬盡沒請於制府力行賑卹親督築堤郊居連月是秋遂大有又開文明門築青雲路建文昌閣自是邑士文學日興後竟以樸率去官邑民立祠祀之一在河旁廟右一在青雲庵迄今尸祝焉 廣東名宦

志

王錫字子美新建人崇禎進士授四川巴縣令甲申正月搖黃賊巨萬薄巴城錫整銳力戰賊大潰追斬劇賊黑虎馬超等搖黃以平夏五月獻賊深入重慶破墊江錫毅然率兵往復之賊恨甚遂集巨萬以六月十六日攻重慶錫逆戰銅鑼峽用火砲擊沈賊艦數百艘賊乃首蒙巨叛來穴城錫令澆以井油多爛死尋城角樓火發賊伏入遂蜂擁而前同時被執者七人瑞藩以避亂至與焉錫顧而謂曰時至此死耳膝不可屈賊問爾即巴縣王知縣乎是曾殺我官損我將士堅壁不降者今何說錫挺然曰弗克殲爾以報朝廷我之恨也尚何說厲聲罵不已賊怒令拔其舌仍含糊搖首作詈罵狀賊益怒箠其股按令屈膝不屈砍

江西通志 卷七十一
之且刳左臂明日昇至武場縛樹上射之又鬻而烙之不
令遽絕又火其骨不令裹尸還葬蓋其部民逃者述其所
見如此聞者莫不哀之 何一泗傳

周定仍南昌人崇禎進士與萬文英胡奇偉舉兵保廣信城
破皆死之 白志

朱統飾字章華瑞昌王之孫中天啓辛酉鄉試崇禎戊辰會
試選庶吉士授簡討充展書官召對記註編纂六曹章奏
陞右諭德經筵日講纂修玉牒大明會典五經註書乙亥
冊封襄藩庚辰分禮闈壬午典試江南陞南國子監祭酒
以父老疏辭奉旨南雍亟資造士不得以私情陳請遵旨
赴任而歿生平清介自守居家以孝友稱每休沐惟閉戶
讀書恂恂如書生貫穿經史習國典熟朝報能成誦在宮

詹日極承宸眷凡奏疏幾盈尺兩試所拔多名雋著有我
法居集 人物志

按明宗室在江西者多好學茲所采外尚有石城王孫
謀塚字藩甫工詩有集今不傳

劉大猷字克敬南昌諸生少孤事母至孝感神刳股以愈母
疾力學工古文詞明季避兵新吳卒所著詩文燬於兵燹
人多惜之以子良玉貴贈承德郎兵部主事 白志

按列朝詩傳有熊夢祥字自得號松雲道人余詮字士
平萬白字孟素俱豫章人皆有詩名無事實可采附此
劉斯陞字士雲給諫一爨子弱冠為諸生有文名時海內壇
坵蔚興斯陞與里中萬羨叔陳士業徐巨源甘禹符鄧左
之余小星李平叔並主文社四方名俊莫不望走其門學

使者至江右必與之上下議論交若等夸體素羸病消渴
卒年三十六子賡順治辛卯舉人 白志

羅大任字小遜豐城人崇禎進士改庶吉士授檢討陞國子
司業晉右中允管理誥敕典順天試得士為多癸未冊封
益藩便歸里門生平坦易無城府和而有介節優游林壑
屢聘不起年八十餘以壽終 同上

衷崇寅南昌人崇禎舉人司李梧州公明敬慎案無留牘遇
事必洗心滌慮究悉周詳故大讞多所平反舊例府僚歲
理廠務一季寅辭以為明刑不關錢穀其清介持風紀如
此 廣西名宦志

葉二蘭字馨季新建人幼失怙年十六即館江南月附米商
舟歸以奉母主人憐其貧贈百金辭不受後以歲薦歷新

城萬年教諭時歲歉督課急諸生請寬于郡邑不得乃罄
橐中得百四十金代輸之秩滿授邑令以母老辭職歸養
縣志

劉浚字恒南南昌人崇禎拔貢生博極羣書以母老絕意仕
進教授生徒一時節義文章之士皆出其門母卒奉父柩
合葬廬墓三載時年已七十餘所著有大易瑣言嚴軒集
壽八十卒學者私謚孝德先生崇祀鄉賢 白志

熊培元字大初豐城人崇禎鄉薦庚辰特用授朝城令時歲
大飢盜賊蠭起培元盡法賑卹撫字多方修築城池峙備
戎具盜賊無所得逞以勞瘁卒官 縣志

龔仲泰進賢人天啓甲子舉於鄉任崇仁教諭崇禎七年巡
按兩薦邊才擢知歸州時全楚已被李賊蹂躪仲泰倉皇

赴任勞來招集百務維艱未幾荆襄失守渡江掠歸州土
豪內訌執仲泰獻賊囚於襄陽不食而死 忠錄紀畧

周必顯字宗人寧州人賊攻城父母年老不能行必顯曰仲
弟無嗣季弟有子而稚宜急去我有二子當護二親賊至
索金燔其背其母泣救受刃必顯執刃泣曰苟全我親我
命奚恤賊弗為動竟殺之同城諸生陳嘉容遇賊賊持刃
向其母嘉容給以金母得脫賊怒殺之又州人溫奇梧以
尋母為賊所殺 白志

朱統鏞字司烜南昌舉人崇禎十二年以臨安府別駕署石
屏州事卹民疾苦異龍湖有水壩魚梁壅塞水道鏞改築
堅堤數百丈以砥之湖水東流淤田復墾捐給傭值絕不
擾民合州永食其利建祠祀之 雲南名宦志

國朝

李明睿字太虛南昌人明天啓進士選庶吉士歷坊館罷閒
六七年廷臣交薦用宮允起田間時闖賊覆秦京師震動
總憲李邦華密疏請太子監國南都備不測上疑不決而
明睿特請面對太子幼必上自出乃可有為不用其策及
寇逼范景文等重理前說不及事矣順治初為禮部侍郎
未幾以事去官卒年八十有七所著有四部藁 白志

甘文奎豐城人明天啓間以選貢授南陵令改昭平陞刑部
主事順治初累官荆襄道以計擒賊首王魁等解京其黨
深銜之乘署政泣任防少懈即破城擒文奎極刑逼之降
厲聲罵不屈死之事聞

贈光祿卿廕其子 豐城縣志

黎元寬字博庵南昌人明崇禎進士授工部主事權浙南關
 歷兵部郎中浙江提學副使明亡絕意仕進構草草廬於
 谷鹿洲日與及門講磨周秦以來古文之學順治初有薦
 之者以母老固辭年八十以壽終并有進賢堂稿 白志

羅憲汶字植于南昌人明崇禎癸未進士選庶吉士遭闖變
 被拷掠順治中為祕書院檢討陞司業轉翰林院侍讀學
 士歷晉詹事以母老致仕歸養所著有漢柏居集 安志

朱徽字子美進賢人明崇禎進士歷官刑科給事順治元年
 以原官陞都給事乙酉請告南歸壬辰以年例外轉固原
 兵備副使致仕歸所著有測蠡草及耕道集 白志

劉弘祚南昌人舉人知連平州順治四年內管營兵與城守
 把總賀炳為亂弘祚力禦不克投南門方井死 廣東新志

諶名臣字令輿南昌人順治丙戌舉人司鐸盱郡陞國學由
 戶部郎擢刑科給事中歷禮工二科請終養歸以慟母卒
白志

朱紱字五任進賢人順治己丑進士選庶吉士改御史巡視
 七省漕務又視河東鹽課惠商革陋一如視漕之潔陞太
 僕少卿累遷都察院左僉都御史致政歸里 白志

辜正煥字敏生南昌人明崇禎舉人性孝友讓產諸弟順治
 初任河南濟源知縣清滯獄闢荒蕪以勞瘁卒官貧不能
 殮士民賻助乃得持喪歸子光旦癸巳舉人 同上

朱師聖字堯民進賢人都諫徽子事親盡孝戊子金聲桓叛
 兵至師聖解所著衣勸父暫避父避而師聖遂被執抗不
 屈膝受刃眼光突出數尺照人聞者哀而壯之 安志

按安志孝義傳尚有南昌喻以正李九漢秦文琰新建熊登華程宗曾進賢宋天寧附錄姓名於此

歐陽斌元字憲萬新建人幼竒慧讀書日十行下終身不忘為諸生受知蔡懋德侯峒曾兩學使以國士禮之同邑姜曰廣清江楊廷麟尤相推重廷麟稱斌元竒才博學景畧流亞與樂平王綱南昌彭士望為兄弟交勉礪德業規切過失講求經濟嘗為南左司馬呂大器草疏特糾馬士英二十四大罪又嘗佐督師史可法幕府可法特薦推官贊畫士英知呂疏出斌元手銜之不用歸隱順治己丑卒年四十四

彭士望書十交贊後

王猷定字于一南昌人時熙子以詩古文詞自負對客講論每舉一事原原本本聽者心折兼有筆札喉舌之妙書法亦擅名一時所著有四照堂集

人物志

陳弘緒字士業新建人道亨子性警敏好學家集書萬卷兄弟友朋日夜講習以任子薦授晉州守時真定屬邑多殘破閣臣劉宇亮出督師欲移師入晉州坐拒不聽被叅緹騎逮問士民哭闕下頌其保城功得釋謫湖州經歷署長興孝豐二縣事有惠政尋為巡按劾罷後屢薦不起移居章江輯宋遺民錄以見志所著有石莊集恒山存藁寒夜集周易備考詩經尚書義若干卷

白志

徐世溥字巨源新建人良彥季子幼隨父任學殖日富年十六補博士弟子員時東鄉艾南英以時文奔走一世聞世溥名與約為兄弟江南若錢謙益姚希孟里中若萬時華康小范輩無不以杓斗歸之世溥才雄氣盛一往自遂兼

工書法戶外屨常滿繼而屢困鎖闈旋值滄桑之變匿景杜門絕意進取順治辛卯壬辰溧陽柄政欲修徵辟故事直指使者親式其閭又作手書遣司理持禮幣往山中致之堅拒不納司理去後盜乘夜入室索其禮幣不知初未嘗受也盜不之信以火災之至死乃去所著有榆溪集外集及詩若干卷

系虛宜所撰徐徵君傳

林時益字確齋南昌人本明宗室名議霽與彭士望為友國初江洪間數被兵兩人謀卜居士望亟言金精諸山可為嶺北耕種處乃變姓名攜家以往康熙七年

詔明故宗室子孫衆多竄伏山林者歸還田廬姓氏皆復其舊而時益寄籍寧都久弗樂歸寧都人亦習呼之曰林確齋先是父統鑽以崇禎丁丑進士令江夏卒官嘗修城支

幣數萬金黠吏匿其籍時益覩縷追憶條寫而日算之無所爽攝印者歎以為神然自是得嘔血疾比遷寧都已盡破其產結廬冠石傭田而耕非其力不食子楫孫門人吳正名任安世任瑞輩皆帶經負鉏冠石宜茶時益以意製之香味擬陽羨所謂林芥者也工書喜為詩晚又好禪以疾故未嘗一他適頽然耆龐見者目為老農老僧如是三十年卒著冠石詩集五卷

贛州府志

熊鼎華字梅卿新建人順治甲申年僅二十父文舉遠在京師祖洪居里門為地方官拘禁幾斃鼎華挺身赴縣願代卒於逮所祖得無恙巡按張嘉以順孫具題旌表

府志

彭士望字躬莽南昌人少有雋才好經濟有用之學崇禎己卯父哲病且革閱邸抄見漳浦黃道周平臺召對語拊枕

嘆曰鐵漢也顧謂士望當以為師士望經理喪事畢即裹糧行謁道周道周則已為解中丞學龍薦重觸帝怒繫獄士望傾身營護會太學生涂仲吉上疏下詔獄杖辭連士望禍幾不測後道周論戍事乃解尋參揚州幕未久辭歸與林時益徙家寧都時江右學者星子曰髻山南豐曰程山寧都曰易堂所講習皆以名節詩文相砥礪士望尤以躬行為本名其文曰恥躬堂集鄉人有死節者其子幼被掠士望傾橐贖之為娶婦其急風義篤故舊至老不衰云

壽七十四

贛州府志

朱天寧字文靜進賢人以五經中式順治丁亥進士授長山令戊子盜殺其母馳歸哭訴於縣為發徒擒盜首梟示天寧取其心肝祭母復單騎縛盜十餘人盜蜂聚遂遇害

安

志

杜果新建人順治丁亥進士授翰林院庶吉士改御史巡按浙江多政績累官濟寧兵備道致仕家居二十餘年甘貧樂道既歿以故衣敝衾斂聞者傷之

崇祀錄

楊西狩字華覲進賢籍南昌人順治壬辰進士初任工部主事陞員外轉兵部郎中擢陝西提學道居官丰度端謹以清廉名卒於任所著有存笥藁

白志

郭曰燧字遂人順治乙未進士由郎中出守台州時海寇陸梁曰燧身先士卒捍城緝賊多方招撫民得安堵郡舊有方正學祠久廢請址捐修搜刻遜志齋文集在任七年兩攝道篆善政不可枚舉念母年高海氛既熄力請終養歸里三十餘年杜門不履城市以課訓後學為樂孫文正康

熙甲子鄉薦任福建沙縣知縣

洪若臯政績錄序

賈國與字非珉順治丁酉舉人授陝西華亭知縣請豁積逋

五千兩秦民感悅未幾致仕歸卒年八十

白志

鄒度珙字謙受新建人順治戊戌進士改庶吉士授檢討為

文自出機杼庚子典試楚闈會元金德嘉侍講鄭之謐太

僕楊佐國皆其所取士也生平不樂仕進急流勇退晚節

益高日以觴詠自娛所著詩文多散軼

同上

羅士毅號恕齋新建人順治戊戌進士知廣東信宜縣多善

政鬻產捐贖民欠二千餘兩審豁冤獄死罪十餘人高州

移鎮兵馬有攜民妻子去者蠲俸贖回信宜民立同春祠

祀之報最稱粵東第一陞河南陝州旋致仕歸率僮僕耕

作飭粥不供怡然不以介意所著有適園詩文等集

安志

劉崑字隱之南昌人順治己亥進士知東鹿縣擢雲南同知

吳三桂反不屈被杖遣戍騰衝衛滇南平以原銜補登州

同知陞常德知府致仕歸卒年七十九

白志

陸履敬豐城人順治己亥進士例授縣令自以體弱不勝簿

書不赴凡令於豐者有興革必造廬商榷滇黔告警城中

人驚竄入山令禁止之履敬曰愚民懾於虛聲耳寬其出

入則遷者返矣請出示聽民自便令懸三日民果復歸家

食數十年著有豐邑志前後藥餘草小雲間集碧蓮園課

若干卷

同上

吳志灝字方程南昌人順治己亥進士授零陵知縣癸丑滇

逆叛永鎮兵聞風亦變志灝不屈於賊奉百歲老母入山

避焉逆平出謁例得彙題補以母喪辭歸林下二十餘年

著有素素山房藁立誠集

同上

張焜字大啓南昌人順治鄉舉知永壽縣縣七被寇躡城久
湮焜至僦居麻亭寨築城結茅民始寧宇俗質朴諸生百
四十餘年不一雋焜為之建學月課已酉壬子登賢書者
三人邑故無井澗飲病渴焜披榛步尋得泉山巔疏通入
城父老相傳此宋呂公大防惠民泉涸廢數百年一旦復
之是歲境內穀多雙穗至有六穗八穗者逆桂反滇隴蜀
動搖莫洛經畧漢中檄焜叅贊軍務以勞成疾卒

同上

傅弘烈字竹君進賢人少負大畧明季父應期令粵西弘烈
隨任遂官滇黔尋自投歸照品調府同知陞慶陽知府首
發吳三桂逆謀謫戍廣西甲寅之亂復陷於賊弘烈密通
款於

朝備陳賊可滅狀悉用其謀賊平即軍中授廣西巡撫時梧
柳諸郡猶未下加撫蠻滅寇將軍使規取象林以討賊弘
烈感激知遇拜表即行辛酉兵次柳州投誠人復叛挾弘
烈如賊營賊本欲得而甘心弘烈罵不絕口遂遇害

贈兵部尚書謚忠毅

安志

李永昌字鳳山奉新人以把總守南豐閩賊犯城永昌同子
名芳奮勇出戰斬賊四百餘級追至沙洲賊衆數千猝出
衝擊名芳馬陷泥中遇害永昌戰益力弦絕矢盡猶手刃
數十人而刎事聞永昌贈叅將名芳贈都司僉書

予祭葬廕子弟一人

黃贊珣戰紀事

萬中雋南昌人父季誠有隱德巡按某聞而造焉脫簪贈曰
為後人朝簪兆明年生中雋弱冠學使黃貞父奇之順治

辛卯舉於鄉教諭廬陵士經其指授者多得雋尤賞張貞生引與朝夕磨礪未幾貞生冠南宮

崇祀錄

熊一瀟字漢若南昌人康熙甲辰進士選庶常授御史在職十二年直聲播中外戊午典試江南所拔取多知名士宋學士衡楊宮諭大鶴並出其門尋陞太僕少卿順天府尹疏豁地租以甦民困向來北闈號舍片蓆覆頂一瀟捐貲易之以瓦至今鄉會兩場士子賴之游歷吏兵刑工四部卿貳肅銓政慎刑獄免逃人之株連清河工之積弊兩任工部尚書在朝四十餘年以病乞歸卒

賜祭葬著有浦雲堂詩文集并奏疏行世子大彬官行人本丙戌進士官編修孫學熹乙酉舉人學烈癸未進士戶部

郎中

白志

丁蕙豐城人父文達孝友厚德蕙亦極孝父病刺血和藥以進夜分自館歸恐叩門驚母露坐達旦康熙丁未進士改庶吉士累官福建學道登萊副使所至有聲家居捐貲挑濬沙湖修邑郭大岸渡河西之蘆花港鄉人德之

崇祀錄

張應辰號三垣奉新人少孤依於叔父母後叔無嗣每歲時祭祀必涕泣致奠年未冠為縣諸生先為邑宰黃虞再所知後黃為學使考校時謂應辰曰吾知子而子不一來謁有守士也季子懋能孝友廉謹康熙丙戌進士官翰林檢討丁酉為浙江副主考既而科場弊發出會質眾獨信其無浼已而果然猶以失察鐫秩調國子博士轉行人司司副未展其用以卒年僅五十一人皆惜之前官翰林時遇癸巳

覃恩應辰得贈文林郎如子官崇祀鄉賢 同上

裴琅字玉聲新建貢宋淳熙進士萬頃後湛深經學尤邃於

易工小楷又善作擘窠大字母朱歿逾九十琅齒亦週甲

號泣如孺子樞前有馴雉之祥所居雙江待以舉火者百

餘家舉鄉飲大賓子君弼康熙丁丑進士刑科都給事中

琅累封朝議大夫吏部驗封郎中 白志

曹家甲字為質號安峯新建人康熙丁丑進士性剛毅任福

建龍溪知縣不肯俯仰上官督府以恃才劾去素敦孝友

經史學外尤精形家言通籍後足跡半天下舒眺名勝識

解益超著地理原本四卷

聖祖仁皇帝特召相視蒙古地形時欽天監監副員缺理藩院

赫公將奏請官之以老病力辭歸年六十九卒 朱太傅誌

銘

萬姓蘇豐城人登封邑令奉檄清丈除莊瑩之額遺愛無窮

白志

彭佑字承吉南昌人自少力田讀書年四十始有四方之志

客粵東值甲寅兵興之際間關戎馬為封疆畫策多奇中

諸大帥皆倚重之濟人之厄功成不居海寇犯肇慶持兩

端制府強佑往招降至則露刃相向佑直入注視呼其名

立解甲歸順蓋其人嘗居廣城為眾所困佑解之且畀之

金為生計故一見而屈以功將題授監司力辭歸課諸子

以明經孝友承先澤為務葬四世十喪族親之貧者皆推

解之年九十二卒 方苞撰墓志

周萬達號蒙泉新建人雍正癸卯舉人少孤事母孝悲愉忻

戚惟母是視友愛諸兄無間言為諸生數十年言規行矩
 顰笑舉止無少錯人敬憚之尤謹取與律已甚嚴遇人以
 恕姍姍恩洽門庭整肅酌儀禮涑水家儀紫陽家禮與近
 今相宜者行之於家以型於鄉酣貫經史老學不倦以子
 學健貴封翰林院庶吉士 家傳

江西通志卷第七十

江西通志卷第七十一

人物六

瑞州府

晉

黃輔字萬碩建城人事親以孝聞州郡舉孝廉穆帝時仕至
 御史清直有節操以晉政不綱權臣擅命遂棄官隱遁焉
 子仁覽入仙釋 豫章書

按漢之建城縣即今高安縣在晉代只合稱建城黃輔
 林志不載

唐

應知頊建城人隋末蕭銑林士弘亂豫章知頊於華林山屯
 兵置柵保障一方武德五年李太亮宣撫江南知頊歸之

因表置靖州命為刺史功德及民民愛之如父母
同上
 按靖州即今瑞州府志云城西六十里有應使君宅而
 氏族大全謂應知頊者九江人徙居靖州生為刺史歿
 為城隍神云人物志既載入高安又訛入南昌白志削
 彼存此又明一統志知頊作智頊

鄧文瑞高安人四世同居五百餘口長幼嫺睦衣無常主開
 元中詔旌其閭
氏族大全

李思元字文成高安人好學擅文行誼峻潔年十六舉進士
 為文林郎時滕王元嬰鎮豫章請為師友
豫章古今記

鄧璠高安人元和間自江西節度使權知袁州在任興學化
 民有古循吏風詔令再任僖宗時所在兵起吏無能名獨
 璠有政聲
林志

宋練高安人為長沙掾四世同居以孝行聞咸通中觀察使
 裴休上其行義詔旌門賜束帛
豫章書

廖洪筠州人父母亡捧土為墳結草廬居有青蛇白獸來止
 廬側咸通中表其門
同上

按唐書孝友總傳以廖洪為萬載人考唐時始分高
 安縣地置萬載縣屬筠州唐時無萬載縣史家從後書
 之耳

鍾傳洪州高安人以負販自業時王仙芝猖狂眾推傳為長
 乃依山為壁至萬人自稱高安鎮撫使仙芝黨柳彥璋掠
 撫州不能守傳入據之言諸朝詔即拜刺史中和二年逐
 江西觀察使高茂卿遂有洪州撫民危全諷聞傳之去竊
 州以叛僖宗擢傳江西團練使俄拜鎮南節度使檢校太

江西通志 卷十一
保中書令爵潁川郡王又徙南平傳率兵圍撫州天火其城士民謹驚諸將請急攻之傳曰乘人之險不可乃祝曰全諷罪無害民者火即止全諷聞謝罪聽命廣明後州縣廢貢舉惟傳歲薦士行鄉飲酒禮率官屬臨觀資以裘齋故士不遠千里走傳府傳少射獵醉歸夜遇虎與鬪虎搏其肩而傳亦持虎不置會人至斬虎然後免及既貴悔之乃畫搏虎狀以示子孫戒之曰士處事尚智謀勿效吾搏虎陷危也子匡時嗣

唐書

按元和郡縣志江西八州高安縣初隸洪州寰宇記南唐保大十年置筠州高安屬焉即今瑞州也瑞既別為郡鍾傳係高安人自應入瑞州舊志或訛為萬載人兩郡重出白志據史傳

辛南容高安人貞元中進士試第權衡賦與柳子厚同年子厚有送歸聯句序曰比詞聯韻奇藻逸發爛若編貝燦若貫珠雖枚生長卿無以尚之屢遷國子祭酒德行孚於鄉孫軾有祖風咸通七年中三史科

豫章書

任濤高安人性慧超羣詩名早著時常侍李鷺觀察江西聞其詩有露溥沙鶴起人臥釣船流之句特免其役鄉民有援例訟之者鷺大書判云江西界內如有詩似濤者並與免役無敢應者咸通中登進士

林志

蔡劔字純鈞新昌人以平黃巢功為左散騎常侍江南西道節度副使子郊字貺夫為行營判官高駢忌之付以羸兵歿於王事

同上

歐陽持字化基高安人天復進士為太學博士昭宗遷洛持

江西通志 卷七十一
知朱全忠有異志遁歸西山楊行密奏除為左拾遺未幾
察行密心不在唐乃歸田不起 人物志

南唐

沈彬洪州高安人唐末浪跡湖湘隱雲陽山好神仙善賦詩
烈祖輔吳表授祕書郎與元宗遊俄懇還以吏部郎致仕
元宗遷南都彬年八十餘來見厚賜粟帛以其子為祕書
省正字先歲彬常策杖郊原手植一樹識之語其子曰吾
當藏骨於此及卒伐樹掘地至丈餘得一石椁製作精麗
光潔可鑒蓋上有篆云開成二年壽榘舉棺就之廣袤中
度子麟性至孝慮墓感慈烏來巢之異 陸游南唐書

按沈彬一人也稽神錄以為吳興人一統志載彬墓在
京口丹陽縣豫章書則以為宜春人江西新舊志袁州

宋 瑞州重複互載今據南唐書定為高安人 原跋

易延慶字餘慶筠州上高人父贊仕南唐至雄州刺史延慶
以父蔭為奉禮郎顯德四年周師克淮南贊歸朝授道州
刺史延慶亦授大名府兵曹參軍後為大理評事知臨淮
縣乾德末贊卒葬臨淮延慶居喪摧毀廬於墓側手植松
柏數百本旦出守墓夕歸侍母紫芝生於墓之西北數年
又生玉芝十八莖本州將表其事延慶懇辭或畫其芝來
京師朝士多為詩賦稱其孝感服闋以母老稱疾不就官
母卒後橐殯數年延慶出為大理寺丞嘗司建安市征及
母葬有期私歸營葬掩壙而返知軍扈繼昇言其擅去職
坐免官復廬墓側數年母平生嗜栗延慶樹二栗樹墓側

二樹連理蘇易簡朱台符為贊美之後知端州卒子綸大
中祥符元年進士及第 宋史

按易延慶林志載在後五代白志據史改入宋

鄒渠字勇夫新昌人因世亂與蔡劔同起義兵討賊有功授
節度使後仕南唐宋乾德中隨李後主來歸授銀青光祿
大夫仍畀節鎮卒贈尚書右僕射少傅英國公 林志

蔡用之字宗野新昌人天禧進士嘗獻萬言書真宗稱為天
下奇才出其文以示諸學士曰此江南夫子也促赴闕詔
下而卒 林志

劉渙字凝之筠州人舉進士為潁上令以剛直不屈於上棄
官歸家廬山之陽時年且五十歐陽修與渙同年進士也
高其節作廬山高詩以美之居山三十餘年環堵蕭然饘

粥以為食而游心塵垢之外無戚戚之意以壽終 東都事略

按朱文公守南康為凝之作壯節亭記謂其高懷勁節
可以激懦律貪立祠祀之

劉恕字道原筠州人父渙恕少穎悟俊拔年四歲坐客有言
孔子無兄弟者恕應聲曰以其兄之子妻之一坐驚異年
十八試經義說書皆第一釋褐為鉅鹿簿遷和川令司馬
光修資治通鑑奏請同編修恕於魏晉以後事尤能精詳
考證前史差謬尤悉委而取決焉王安石與恕有舊欲引
修三司條例恕以不習金穀為辭因言天子方屬公以政
事宜恢張堯舜之道以佐明主不應以財利為先安石不
能用遂與之絕方安石用事呼吸成禍福高論之士始異
而終附之口順而心非之者皆是也恕奮厲不顧直指其

事或面刺安石至變色公議其得失無所隱以親老告歸南康乞監酒稅以就養居母喪未除而卒年四十七著十國紀年四十二卷資治通鑑外紀十卷同上

劉義仲字壯輿恕之子也幼敏慧博洽嘗摘歐陽修五代史誤作糾繆司馬光以其父有修通鑑功乞蔭其子補郊社齋郎清介有父風歷鉅野德安簿政和間以蔡京薦召為宣教郎編修官至京師絕不造謁一人昌言曰吾但知天子有命不知有薦我者竟棄官歸廬山自號漫浪翁或通刺但書江南劉義仲又數年卒朝廷聞其太初曆甚精密詔就其家索之人物志

按志以劉恕父子為星子人白志從史

陳世昌高安人該貫羣書兩中博學宏詞科調復州錄事叅

軍致仕自號大田農著有漢韻一千六百字及老農集林志

吳太元字一翁高安人景祐進士以大理評事為開封戶曹以司馬光薦陞鄆州掌書記富弼器之後守潯州入為尚書都官員外郎改漕湖北同上

蔡曾字子飛新昌人淹貫經史入太學劉丞相沆請為子弟師一日語云欲以郊祀恩例浼子曾不答明日束裝歸闕南園築亭榭植花木自稱東郭居士黃山谷有記同上

按蔡曾山谷之姑夫字子飛詳見南園記中林志字飛卿者訛

劉平伯高安人漢建城侯之裔高蹈好文名士推之二蘇兄弟過訪並有賡詠子瞻寫墨竹以贈今猶珍藏其家人物

志

按劉平伯名姓不見於兩蘇公集姑存之

阮薦字仲元新昌人少敏慧嘗以所為文謁邑宰劉滂滂一見大奇之後入太學中舍會日者謂薦曰君宜隱居薦即幡然南歸以詩酒自娛無復仕進意乾道中漕使芮燬辟為本州學正堅辭不就同上

按阮薦林志作薦未詳孰是

李師愈字好古高安人博學多聞負笈從劉子澄講學於匡廬山中乾道間領鄉薦漕使芮燬舉師愈應制科未及赴而卒林志

鄒致字至之新昌人博洽強敏授諸子各一經時號鄒五經事母孝母卒廬墓有五色芝產於旁子及登進士同上

按鄒致人物志以為元人據科目考鄒及乃高宗建炎二年進士南宋初距元尚百四十餘年及致子也子為宋進士父為元人可乎今從林志原跋

雷孚字保信新昌人政和進士以通直郎宰上高宜春俱有惠政倅虔州齊述倡亂緣坐三千人郡將欲盡殺之孚力爭得釋秉性純厚好德尚義居家清白官至朝散郎以子孝友貴贈太子太師同上

龔端字德莊新昌人元符進士立朝未嘗隨世俯仰靖康間極論時事之失徽廟將禪位遣端馳驛陝右密諭督軍赴國難明年謁淵聖皇帝除將作監時金人犯順以端為河東路奉使叅議官未幾京畿戒嚴端憂恚成疾請老不允及聞兩宮北狩憤惋而卒人物志

劉愿字恭叔新昌人博學負重名宣和進士歷鼎永二州倅廉介有為時盜賊徧天下惟愿所至盜弭民安趙鼎張浚交薦於朝除守沅州命下而卒

林志

雷孝友字季仲孚子乾道己丑以詞賦魁南省任南劍教授再調國學錄光宗即位除國子祭酒既而擢給事中進御史中丞除知樞密院兼叅知政事高安縣開國公不諧於時屢乞骸骨以觀文殿學士知福州卒贈太師謚文簡

同上

蔡謹字伯恭新昌人力學不仕築義方書院有志於學者俱廩給之里有爭不愬於官而決於謹有王烈之風號無為居士

同上

趙像之字明則高安人紹興進士授臨川司戶較藝廬陵得

周益公楊誠齋為門生仕至軍器少監像之為詩文平淡簡遠雖持節秉旄而家猶貧焉

同上

邱泰字仲義高安人淳熙間父山疾泰剗股以進尋愈轉運使趙彥操聞於朝孝宗御筆書付史館後更名高

同上

按林志陳友直高安人親歿廬墓三年稱孝子張茂馮忠孝皆上高人嘉熙間父母病篤皆剗股以進又有剗股救父者李德勝聶汝清黃顯吳應發盧十一仇大任晏十二等救母者王文旺吳仲三雷大年劉信伯戈廷秀等安志孝義傳有蔡嵩蔡岑高安人類記備考

蔡滢字慶崇新昌人乾道進士初調湘潭簿雪旁邑冤獄却餽贖憲臺薦其廉明調巴州教授改安化令庭無留訟尋倅金州為人靜愨清介平居飲酒賦詩當官辨治整暇與

上官論事有不可必力爭之

人物志

按蔡滢林志作淙未詳孰是

趙不黯字稷臣高安人宋太宗六世孫舉進士歷官至二千

石後退居錦水孝宗以近臣薦擢拜爲大宗正仕至開府

儀同三司寶慶二年入祀樂善書院

林志

唐允功字汝賢高安人資穎好學於經史百家無不通貫時人號爲書廚丞相趙鼎嘗大書潛心居士四字贈之所著有飴經倦錄

同上

按允功人物志作允恭考府縣志與林志同

幸元龍字震甫高安人慶元進士初尉京邑時万俟卨之孫與岳飛家爭田歲久不能決府委元龍裁斷積案如山元龍並不閱視即擬云岳武穆一代忠臣万俟卨助檜逆賊

雖籍其家不足以謝天下尚敢與岳氏爭田乎田歸於岳卷畀於火時論驛之改知當陽縣擢通判郢州忤史彌遠劾令致仕紹定辛卯秋京師災彌遠私第獨存元龍自家上封事云天火曰災人火曰火陛下即位以來虛已以聽宰相若火出於天臣知宰相獲罪於天若火出於人臣知宰相獲罪於人且言彌遠負寧考付託竊陛下威福使天下知有丞相不知有天子願陛下戮其首以謝天下籍其家以調天下然後斷臣之首以謝彌遠則災自弭矣明年卒子溥中嘉定進士廉介有父風知鬱林

人物志

按豫章書以幸元龍爲嘉泰間進士鄂州通判與此不同所著有桂巖松垣二集

幸當時高安人元龍弟授光化軍司戶襄帥趙范檄往唐州

收買軍需未幾武守郭勝叛當時不從被殺事聞朝廷嘉
愍贈京秩官其一子

林志

陳仲微字致廣高安人嘉泰進士調莆田尉臺閩委以縣事
時歲凶部卒并饑民作亂仲微立召首亂者戮之一境以
肅遷海鹽丞鄰邑有疑獄郡命仲微按之一問立決改知
崇陽縣通判黃州遷知贛州江西提典刑獄忤賈似道罷
久之起太府寺丞時國勢危甚仲微上封事其略曰悞襄
者老將也失襄之罪君相當分受其責天子若曰罪在朕
躬大臣宜言咎在臣等宣布十年養安之往繆深懲六年
玩寇之昨非救過未形固已無及追悔既往尚愈於迷轉
敗爲成在君相一念間耳出爲江東提點刑獄德祐元年
遷祕書監益王即位海上拜吏部尚書給事中厓山兵敗

走安南卒年七十有二

宋史

按陳仲微所著有文溪集六十五卷

阮寅字公亮新昌人嘉泰進士初調龍陽尉以薦改知房州
轉朝請大夫鼎澧辰沅靖沿邊都大巡檢使馬步軍都總
管節制湖北軍馬知澧州所至能保障撫循一方戴德焉
子恕字伯寬以蔭宰分寧改善化

林志

羅之紀字國張高安人自幼穎悟超羣嘉定時奏入箠授孝
感縣尉攝邑雲夢持身廉謹遇事精審上官少不爲禮因
雪壓竹賦詩云吾道非邪真可恥此君豈是折腰人遂飄
然棄官歸自號筠心居士

同上

按羅之紀所著有易傳及文集

胡仲雲字從甫高安人年十三悉通書史入太學率諸生伏

闕上書論罷京尹余晦蔡適為祭酒仲雲與弟仲霖師之盡得朱氏之學寶祐登進士監行在倉時丁大全用事欲鈎致以館職不就以江萬里薦除太學正因忤賈似道出倅臨江既而家居起為國子監簿攝吏部左侍郎遷樞密院編修官攝尚書右司黜為浙東提刑兼權紹興安撫既至減月椿錢三之二復追還買燈錢五萬吏贓三萬六千分諸貧民越有僧殺人賈黨匿之仲雲嚴限寘於法會母憂去歲餘聞九江失守辟地南海攜家泝流至廬陵而卒

同上

按胡仲雲所著有六經蠹測周易見一四書管窺歷代遺論宋朝政論及文集三十卷

朱昫筠陽人理宗朝中神童科號荷山先生有文集傳於世

子資深以文學為搢紳推重補西澗山長孫逢原邃於易領鄉薦為湖廣校官事父以孝聞

朱一齋集

劉應龍字漢臣高安人嘉熙進士知崇仁縣淮西失守江西諸州有殘破者縣佐貳聞變先遁應龍固守不去遷司農少卿尋去國景定三年湖南饑起提舉常平以救荒功遷知隆興府兼江西轉運副使奏免和糴二十萬石擢權戶部侍郎時賈似道當國應龍言臣觀邇日以來靖恭自守者以論事為忌指陳稍切者輒聯翩引去恐正臣奪氣鯁臣結舌宜非盛世所有遂忤當路以集英殿修撰知建寧府久之起為江東轉運使辭南海寇作朝廷患之移廣東經略安撫使寇聞應龍至遁南海大治特旨屢召拜戶部侍郎上奏辭免德祐元年遷知贛州兼江西兵馬鈐轄青

海軍節度使力辭隱九峰子元高亦舉進士 宋史

陳元亮字季德仲微從子博學尚氣節補太學升國錄時賈

似道私人洪燾尹臨安倚勢作威元亮率諸生數百人伏

闕上書歷數其姦上為黜燾元亮遂為賈所忌戊辰當對

集英殿太學名士多倖取上第元亮獨恥之有司復希賈

旨置之丙科授慶元府教授再遷御前軍所幹辦官 林志

姚勉字成一新昌人寶祐中狀元授平江節度判官丁父憂

服闋除正字時太學生有因論丁大全而被逐者勉上言

斥逐學宮之士以禁天下之言此蔡京秦檜所為今日豈

宜有此遂歸及吳潛入相召為校書郎輪對言朝廷綱領

惟在用人聽言又及守帥數易之弊後上過東宮勉講否

卦因指斥權姦無所顧避忤賈似道遂諷孫附鳳劾勉為

吳潛黨免歸有雪坡集 同上

劉元高字仲山應龍子長身山立每與姚勉胡仲雲論天下

事輒慷慨激烈時號高安三俊元高淳祐進士初授迪功

郎柳縣簿斷事如破竹當道爭致之幕下以薦除知寧都

縣改候官縣多豪貴一繩以法復以薦為御史卒所著有

漢史意鈔書史續鈔貴華錄三劉家集山居橐 人物志

雷作字大起新昌人為均州錄叅時捕訊者獲茶商十餘人

悞為真盜作理出之太守尹機叅督府謀議選守邊舉府

事屬焉方薦其才作慨然求歸遂致仕 林志

蔡志學字及之新昌人淳祐進士初調興國簿憲使李迪愛

其才檄入僉幕按法訊擬民稱不冤秩滿調武昌節度掌

書記再調太和令獨立不撓剖決如流尋倅清江未幾知

高郵終朝奉郎自號如心居士

劉師尹字堯咨一字元衡新昌人嘗詣闕獻書陳古今理亂

得失之故及足國裕民養才取士選將練兵制勝之策不

報初授長沙司戶參軍再授江陵府察推居官廉潔無私

自號戒得翁竟以直忤上司棄官歸

林志

黃夢炎字如晦新昌人景定進士初調贛縣尉再調饒州軍

判官侍御史曾端子奏舉文華科江東憲使趙與端奏辟

提幹夢炎少與姚勉胡仲雲劉元高齊名號錦江四俊嘗

相與詣書庫借其籍一覽輒焚之乃具紙默疏纖悉無遺

後終於家

人物志

羅天酉字恭甫新昌人師事饒雙峰開慶進士以格非心去

非人對策忤丁大全擯外歷官知懷集縣不期年而治成

丁父憂作詩有三釜為親今莫及萬鍾於我復何加之句

遂不起所著有柘岡文集

林志

蔡汝揆字君審用之七世孫師饒雙峰得道學之傳門人號

愚泉先生所著有希賢錄貫道集友議等書

同上

鄒禮字用和高安人才識明敏當路辟為掾史年三十四歸

隱以養親教子為樂張公疇薦諸集賢賜稱德逸處士

同上

胡希是仲霖子幼通經史十五遊京師一時名公折行輩與

之交常謁江古心得其作文之法下筆有西漢風宋亡隨

父隱遯所著有洪範考訂大學稽疑太極圖說史論及於

山集

同上

熊襄字贊國新昌人以蔭初授無為簿再調湘潭司法以正

直忤上官拂衣歸以郊祀恩授迪功郎監潭州糧料院秩滿家居結義兵以保鄉井劇盜不敢近乙亥邑人姚文龍自九江引兵先闖鄉郡而遣其弟諭降襄殺之次年兵至衆潰見執文龍詰之襄曰去年我殺卿家今年殺我丈夫何恨之有遂死

人物志

李長庚字子西新昌人初任清江尉再調湘潭丞元兵至同寅皆遁獨長庚攜諸司印居守被執不屈死之士友葬於學地并為文表其阡

林志

元

劉秉忠字仲晦初名侃拜官後始更今名其先瑞州人仕遼為官族秉忠生而風骨秀異年十七為邢臺節度使府令史居常鬱鬱不樂一日投筆歎曰吾家累世衣冠乃汨沒

為刀筆吏乎即棄去隱武安山中後遊雲中留居南堂寺世祖在潛邸海雲禪師被召過雲中邀與俱行既入見應對稱旨秉忠邃於易及邵氏經世書至於天文地理律曆三式六壬遁甲之屬無不精通論天下事如指諸掌世祖大愛之遂留藩邸上書數千言皆嘉納焉又言邢州舊萬餘戶兵興以來不滿數百彫壞日甚得良牧守如真定張耕者治之猶可完復朝廷即以耕為邢州安撫使由是流民復業升邢為順德府世祖即位問以治天下之大經秉忠采古制之宜於今者條列以聞於是下詔建元紀歲立中書省宣撫司朝廷舊臣山林遺逸之士咸見錄用秉忠雖居左右而猶不改舊服翰林學士承旨王鶚奏言秉忠久侍藩邸忠勤勞績宜崇以顯秩帝覽奏即日拜光祿大

夫位太保參預中書省事秉忠既受命以天下爲已任凡有關於國家大體者知無不言言無不聽如頒章服舉朝儀給俸祿定官制皆自秉忠發之爲一代成憲卒年五十九贈太傅封趙國公謚文貞成宗時贈太師謚文正仁宗時又進封常山王其詩蕭散閑淡類其爲人有文集十卷
元史

按劉秉忠志書俱不載元時瑞州人物見於史傳者無多秉忠兄弟雖隸籍邢州本瑞州人也白志采補

劉秉恕字長卿好讀書年弱冠受易於劉肅遂明理學兄秉忠事世祖以薦士自任嫌於私親獨不及秉恕左右以聞召見遂同侍潛邸世祖嘗賜秉忠白金千兩辭曰臣山野鄙人僥倖遭際服器悉出尚方金無所用世祖曰卿獨無

親故遺之邪辭不允乃受而散之以二百兩與秉恕秉恕曰兄勤勞有年宜蒙茲賞秉恕無功可冒恩乎終不受中統元年擢禮部侍郎邢州安撫副使遷吏部侍郎三年升邢州爲順德府賜金虎符爲順德安撫使轉官法行歷彰德懷孟淄萊順天太原五路總管淄萊府有死囚六人獄已具秉恕疑之詳讞得其實六人賴以不死他所至皆有惠政召除禮部尚書出爲淮西宣慰使歷湖州平陽兩路總管年六十卒於官
元史

李明德瑞州路上高縣人讀書有志操孝行篤至亂兵陷袁州因抄掠上高執其父欲殺之明德泣告曰子豈不能代父乎願勿害吾父也兵遂殺明德而免其父
元史

陶復亨字仁叔新昌人性超達善古文詞咸淳間試補國學

元初充興國教授文行相稱有梅花百詠行於世

人物志

按陶復亨人物志載入宋白志改定

吳楚字方叔高安人性狷介博洽經史至元間授四會縣尹

後更上杭建寧浦城所至輒以廉能稱鋤強植弱救荒禦

寇活人至數萬閩人號曰吳廉訪

林志

姚雲字聖瑞高安人宋咸淳進士初調高郵尉後除龍興察

推再除工刑部架閣以宋故官授承直郎撫建兩路儒學

提舉秩滿家居尤工詞調風韻不減秦淮海有江村遺橐

行於世

人物志

塗謙字伯益高安人至元間以功授本府判官累遷懷遠大

將軍謙雖貴為連帥而雅澹沖約益勵操行投老家居自

號雲溪道人黃冠野褐日容與山水間子濟亨字古甫克

紹家學筮仕寧州判官知永新州所至以廉能稱

同上

漆希范字文翁高安人仕本縣文學陞靜江路教授湖廣省

聞其賢辟為掾廉謹修飭陞臨江路知事清望益著識與

不識皆稱為平溪先生

林志

吳起孫字誠甫高安人九世同居素無恒產資醫術以供食

至大中本省以聞至今稱為義門

同上

涂源字原叟高安人早失父事母幸氏盡孝延祐三年除知

黎州以母老不肯赴母強之出至州聞訃徒跣奔歸既葬

廬墓三年

同上

熊師說高安人讀書好義家裕於貲歲歉輒周貧乏鄉里稱

為義翁後至元間撫州進賢飢告糴於其家發粟八千石

賑之不受直子志文與同邑胡浚孚俱以賑飢得旌府志

楊浚字子元高安人博洽書傳精練吏事至元間辟為掾史活人甚多壯年即投筆杜門惟以養親為樂趙子昂為書紫源二字贈詩有紫源賢功曹四十已投筆之句同上

伍良臣字雲從高安人駙馬都尉興甫之子致力經籍為詩文暢達清潤遊京師不諧於俗後辟為臨江經歷八十日即棄去人物志

按伍良臣所著有中流一壺集

毛忠吾新昌人至正壬辰紅巾賊陷新昌張子忠李子鈞克復州治越五日州復陷子忠罵賊而死忠吾保逍遙山招郭克敬合兵援州治復之甲午歐祥復陷上高忠吾退守古陽寨七年間大小百餘戰皆捷鄉境賴以保全豫章書

明

胡璉字商用高安人父死括蒼兵興道梗璉艱險萬狀負骨歸葬人以孝稱之大明兵至江西天完將劉敬欲退守新昌璉說曰今真主已出不降何待瑞且不可守况新昌乎宜亟為一郡生靈計劉素聞璉名忻然從之璉為奉書詣軍門降一府十萬戶賴以安全洪武初應通經舉為本府學訓導陞句容教諭引疾歸杜門觴詠所著有易學會通及子史百餘卷豫章書

羅君友高安人洪武初應辟舉赴京師任本府學教授而歸讀書講學於清溪之上以維持綱常為已任朱一齋集

按羅君友林志不載人物志作均友白志據一齋所撰清溪書院序改正

李仲德上高人洪武中以賢才應辟任龍江提舉攝河南道

事清儉執法陞大理評事改刑部主事捐俸餘以濟公用
同僚高志明等忌之以事誣仲德廷爭不屈觸上怒被誅
既而察其誣特旨賜祀

人物志

鄒用字惟信新昌人讀書好義元末大亂與毛忠吾等糾義
兵保鄉曲屢破賊將陶九於郡境撫流亡宜豐賴之復說
天完袁州守將歐祥附迎高皇於隆興洪武四年命從宜
春侯黃彬收集鄉寨頭目論功授雄武衛管軍百戶子寧
智勇有父風洪武二十三年征進都勻明年又從征平州
牙州龍海等處俱有功已又征威清八番紀績通敘授昭
信校尉命襲偏橋百戶

同上

冷曦字景暘新昌人洪武中為御史剛正不阿劾去都御史

劉觀及壞法御史六員官震恐

林志

劉謐字成式高安人聰慧倜儻善屬文朱學士善見而器之
為作藜耀軒記洪武間貢授吏科給事中彈劾無所避忌
竟以此忤權貴謫戍甘肅

同上

按朱一齋前後二集無藜耀軒記

徐振字伯起高安人繇舉人歷晉江教諭長沙教授生徒遇
有貧而勤者輒捐俸資給之所成就多一時名士以祭酒
蔡清為最

同上

孟充字實夫高安人博洽書史為文有理致繇舉人授敘州
府學訓導陞福安知縣朝夕吟詠所著有山樓集

府志

朱益字易亨高安人永樂鄉舉己丑中乙榜例授學職率同
榜者十二人上言道未明未可以教悞人也乞卒業辟雍
為祭酒胡儼所重乙未登進士授刑部主事命於沛縣董

運木植事集而民不勞以尚書吳中薦陞郎中卒於官檢
所餘俸僅給棺衾而已 人物志

潛溟字彥鵬高安人美丰采兩目如懸珠永樂進士授監察
御史文皇選使北平面命十數事既出追還詰問對無遺
上器之後果稱旨受知益深事之難決者輒曰付虎眼御
史謂溟也方將大用而扼於忌者出為廣東按察副使後
又以事左遷運判終知杭州府 同上

按潛溟所著有青雲集嘗從梁本之學扁其居為筠陽
讀書處其兄用之有序

楊潤字伯玉高安人永樂進士授南御史有坐法餽金求庇
者潤執其人寘諸理仁廟獎以為能陞山東僉事剿巨盜
劉雄黃虎陞四川叅議平敘田彝重慶大旱發官庫賑濟

全活者數萬歷官三十年囊橐蕭然居家惟務讀書考古
卒年九十一卒後數日鄰居火子贊祝曰若先君無愧願
全歸之俄而火反樞得免 府志

况文字應奎上高人永樂進士擢御史巡按至湖州嘗夜夢
一人被髮從老翁來且泣且訴詰且有巨蛇伏於廳事乃
召官吏詢之意必有冤者既而廉得歸安民嘗毒殺人方
匿屍山澗中捕訊盡伏辜人咸稱為神明正統己巳都御
史以扈從北行推掌都察院事出為廣東叅政 人物志

王綱字存紀上高人永樂進士下第與蕭時中等具奏考試
不公文皇復親策副榜舉人綱與時中等十八人皆賜冠
帶令祭酒司業親教之後科果登上第巡按福建廣西河
南正統間官至山西右布政使歷任四朝始終翼翼歸休

於家罕接官府 同上

况琛字宗魯高安人永樂進士聞母喪奔歸哀痛幾毀服闋赴京道經九江聞弟喪遂乞歸養除永平教授不欲赴解學士縉有詩贈行勉強之任然拙於逢時尋歸杜門多著

述府志

朱廣明字則誠高安人穎悟工詩文繇舉人歷山陽增城諭寧海學正所至從遊甚衆求文者無虛日 人物志

按朱一齋集有贈筠陽朱誠則序稱郡文學朱溟疑即其人俟再考

易輓字仲載高安人永樂進士以言忤權貴謫武定州同知尋改判杭州時仁和賊大肆剽掠輓用計入其營擒巨魁賊遂平陞高州知府 林志

陳鑑字貞明高安人宣德進士授行人擢御史出按順天言京師風俗澆漓其故有五一事佛過甚二營喪破家三服食麗靡四優倡為蠹五博塞成風章下禮部格不行改按貴州麓川思機發自大軍再征窮竄屢上書哀訴乞宥罪通貢王振不許復大舉遠征時雲貴軍民疲敝苗乘機煽動舉朝皆知其不可懲劉球禍無爭者鑑抗章言賊酋遠遁不為邊患宜專責雲南守臣相機剿滅無遠勞禁旅振大怒欲困之改鑑雲南參議使赴騰衝招賊怒未已撫鑑為巡按時嘗請四川播州安撫司改隸貴州以為鑑罪令兵部劾之逮下吏論死繫獄景帝嗣位乃得赦尋授河南參議致仕歸卒 白志

按陳鑑所著有易菴集

况暹字鼎元上高人繇舉人歷萊陽漢川歸安諭光祿寺署
正制行純潔文章典雅周旋禮度俱可為法間志三十年
以讀書自娛卒祀鄉賢 明一統志

馮瑀字汝瑀新昌人宣德中以邑掾任溧陽縣丞吏胥不得
為奸秩滿所部數千人詣闕保留陞本縣知縣行事愈勵
於前在官十五年卒 人物志

周廣榮字仲仁新昌舉人任崇慶州知州廉介有為豪強屏
跡改邳州蘄州愛民節用民心懷之陞都督府經歷屢言
時政得失推薦林俊王相終雷州知府 府志

賈信字順夫高安人初為臬掾財不苟受事不避難正統間
辦事南京司刑名者多待以脫橐尚書趙翊器重之薦授
本部主事陞工部郎中廉州知府 同上

况真字彥珍高安人繇歲貢歷工部刑部主事福建僉事正
統己巳鄧茂七黨寇汀州偕指揮馬雄討之有功明年因
星誤降大使天順間復官僉事致仕 府志

毛倫字時敘新昌人初授南太常博士歷陞兵部職方郎中
服官二十餘年廉慎敏決尚書魏驥嘉之上疏薦陞本部
侍郎致政歸 人物志

敖鉞高安人宰宿松二載兩奏水患去任三年復疏荒糧補
潛江甫經十月歲旱題請蠲賑民賴其惠所去見思為御
史再劾近侍巡按貴州致仕 府志

袁彬字文質新昌人正統末以錦衣校尉扈車駕北征及帝
蒙塵從官悉奔散獨彬隨侍不離左右周旋患難未嘗違
忤夜則與帝同寢天寒甚恒以脅溫帝足也先將獻妹於

帝彬請駕旋而聘帝竟辭之居漠北期年猶骨肉也及帝還京景帝僅授彬錦衣試百戶天順復辟擢指揮僉事尋進同知帝眷彬甚奏請無不從賜予優渥時召入曲宴敘患難時事歡洽如故時進指揮使遂掌衛事以平曹欽功進都指揮僉事時門達恃帝寵勢傾朝野廷臣多下之彬獨不爲屈達誣以罪請逮治帝欲法行語之曰任汝往治但以活袁彬還我達遂鍛鍊成獄賴漆工楊墳訟冤獄得解然猶調南京錦衣衛帶俸閒住英宗崩達得罪貶官都勻召彬復原職仍掌衛事未幾達徵下獄充軍南丹彬餞之於郊餽以贐成化初進都指揮使先是掌錦衣者率張權勢罔財賄彬任職久行事安靜十三年擢都僉事莅前軍都督府卒於官

白志

朱漢字景雲高安人成化進士授太常博士太常寺官多出身道流漢上疏極論之陞南道御史劾罷尚書倪謙侍郎錢溥歷陞河南僉事陝西副使兵備漢中風裁凜然奸貪縮首盜賊屏跡民至今懷之歲時報祀

人物志

熊傑字貴顯高安人成化中以太學生通判保寧府嘗按豪惡母文信獄竭誠感奇夢論死者四十三人上司減其半羈傳食以配徒一夕火發盡死蜀人神之松茂運梗設法隄備餉足西民便居官廉明簡易尤能禮士夫善僚友著有守齋集

同上

王相字樂用新昌人成化進士授御史未幾以親老歸養林居二十餘年與羅一峰張東白莊定山爲友一峰往來尤密弘治間膺薦復起爲御史陞廣東僉事壽終於家

林志

陳政字以正新昌人成化進士歷吏部郎中左右通政工部
左侍郎督營茂陵修蘆溝橋京通二倉疊奉璽書優勞弘
治間河決張秋運道梗兼僉都御史總理之卒於官 府志

黃山字允高高安人成化進士授行人屢奉使不以毫髮自
汙弘治間擢御史何文鼎以忠諫得罪山上疏力爭巡按
浙江湔宿弊懲奸貪雖親故無所假借陞廣東僉事 林志

吳堂字廷器上高人成化間由監生任泉州推官性喜淡薄
節嗜欲嚴取與嘗自勵曰居官不清白何顏覩士夫後解
組歸行李蕭然林下二十年士論高之 同上

黃景字文昭上高人成化進士歷禮部郎中奏對稱旨陞通
政尋遷禮部左侍郎弘治初以時議不合致仕正德間坐
事謫戍燉煌尋宥歸卒景嘗奉詔保定河間賑荒計慮周

悉活人甚衆又嘗勸憲宗以養心之學及建議裁抑西僧
之為民害者持論侃侃綽有足觀云 同上

游輝字公憲高安人成化貢生任龍泉知縣地多刁訟輝恩
威兼濟民皆感德去任日哭聲載路居鄉孝友慈愛閭里
宗黨無間言有不平事咸請質人比之王彥方云 府志

陳祥字應和高安人弘治進士初授上虞知縣以內艱歸復
補華亭時劉瑾專恣趨附者衆及瑾敗上搜餽籍無祥名
行取山東道御史巡按四川淡素如寒士時有御史素以

賄聞而依憑城社祥發其私詔免秩及報命以論堂官忤
當路出知惠州桶江巨寇作亂命王守仁往征之祥滅其
二巢績奏加正三品服俸歷官右副都御史 人物志

劉允中字叔彝高安人成化進士讀中祕書改工科給事歷

禮科都給事多所建明憲廟倚眷目爲劉長子始允中入朝墜馬創巨乃奉旨總理西寧糧儲力疾驅馳冒寒暑不避疾轉劇乞骸骨歸父子好行其德一切俸入盡輦分族之貧者有逋課輒代之輸或偶忿爭必曲爲解勸以故劉氏凜凜德讓爲閭里所稱同上

蔡時字純中新昌人正德進士初知麻城縣晉大理評事武宗有詔南巡時偕舒芬余廷瓚等危言極諫請斬賊臣江彬以保聖躬上大怒下錦衣衛械繫獄中罰跪午門外七日至五日京師陰霾晝晦宮城內海子水溢橋下鐵樹七齊折於是有旨將時同林大輅等於午門前加杖五十調南京都察院照磨世宗登極召還大理擢浙江僉事提督兩浙及蘇松等處屯田水利事豪右數侵太湖悉奪而歸

之水利始通尋以病歸家居數年杜門著述嘉靖己亥安南不庭上追念忠鯁才略俾副毛伯溫往征之命下卒同上

朱實昌字士光高安人郎中益之孫正德進士授旌德令改海鹽應召擢山東道御史上遊獵建儲除奸佞等疏議大禮忤時相廷杖改南道歸養都御史屠滹奏起補北道歷按蘇松三吳大飢奏緩歲賦三十八萬有奇俟歲稔帶徵後復奏請蠲之以直言觸當事降淮安知府居官廉靜士民悅服有臥鎮淮陽去思遺碑未幾致仕卒同上

陳益字啓行高安人以六經教授弟子學者稱行素先生所著有敝帚集白志

李文字顯道上高人由舉人知乳源介潔自持興學校崇禮

劉志方字端夫高安人由舉人授僊居知縣時歲饑民有路攘富室之粟者守悉置之死志方曰愚民無知苟延旦夕耳非越人於貨者比守悟活者數十人又有偽獲盜布者志方詰之皆曰婦織之耳命各取織筥來驗之則盜果偽事獲釋其為政慈祥慎密類如此陞和州同知致仕所至輒有去思 府志

陳拯字方周高安人由舉人署奉化訓導勤學善教人才多所成就陞邛州判官清而有惠嚴而不苛家居十年化成鄉黨焉 同上

簡方字德馨上高人弘治進士任南刑部主事陞兵部郎中性耿介執法明允權勢無所假借卒於官 林志

朱繼祖字孝思高安人成化進士授兵部主事守山海關轉武庫郎中出為廣西知府會竹子山盜發督兵剿之逾月奏捷改知楚雄在任二年以直忤時貴告休 同上

聶珙字周贄上高人正德進士授刑部主事歷官福建僉事會倭寇興泉躬冒矢石民賴保安擢山東兵備副使致政歸 府志

吳雲高安人為府掾正德己卯李蕃李貴集叛黨助宸濠謀逆雲從別駕胡某於石鼓潭擒之濠敗王文成紀績奏聞有旨赴京聽選雲以母老乞終養恩賜冠帶養親 同上

劉公泰高安人性孝友好施予成化庚子歲饑發私粟六百石以賑正德間年百歲副使李夢陽檄府為立坊 林志

傅興高安人性至孝父疾感夢百里外徒跣求醫得撫州絕

嶺古井水調藥而愈祖母曹氏孀居為華林賊所掠欲殺之興渡水以救賊用巨鏡壓之鏡忽斷賊驚異釋之事聞詔冠帶表其門

明一統志

謝麟字秀瑞高安人太學生積學能文屢試不售正德壬申華林賊肆虐劫其家麟負母踰垣以避賊追尋益迫家人速之走麟曰母在顧棄之去乎既而賊執其母麟奮力奪之母得免麟為賊所殺

府志

吳山字曰靜高安人嘉靖十四年進士及第授編修累官禮部侍郎入西苑供奉青詞改吏部尋代王用賓為禮部尚書加太子太保山與嚴嵩鄉里嵩子世蕃介大學士李本欲與為婚姻山不可帝欲用山內閣嵩密阻之大學士靳貴妻早寡及老有司奏請旌表山不可徐階為之言山正

色曰相公慮閣老夫人再醮耶階默而罷裕景二邸並建國本未定帝忽諭禮部具景王之藩儀嵩知帝激於郭希顏疏欲覘人心諷山留王山曰中外望此久矣立具儀以奏王竟之藩四十年二月朔日當食微陰曆官言日食不見即同不食帝以為天眷喜甚嵩趣部急上賀侍郎袁煒亦為言山仰首曰日方虧將誰欺耶仍救護如常儀帝大怒禮科給事中李東華等震懼劾山請與同罪帝乃責山賣直沽名停東華俸嵩言罪在部臣帝乃貫東華等命姑識山罪吏部梁夢龍等見帝怒甚又惡專劾山乃并吏部尚書吳鵬劾之詔鵬致仕山冠帶閒住時皆惜山而深快鵬之去穆宗即位召為南京禮部尚書堅辭不赴卒贈少保謚文端

白志

江西通志 卷之十一
劉子立字以中高安人天性孝友年十五失怙母吳氏病失
明不離左右者十餘年吳卒廬墓側仲弟季弟天卒撫其
孤為己子尤博洽經史聚徒至百餘人一時搢紳多出其
門嘗受學於鄒東廓與鄧元錫傅明應論道後園書社交
相砥礪憫筠俗棄女作育女文以勸之感而舉女者不可
勝紀憂邑賦偏重仗義與吳會廖寶等極力條陳得改南
折筠人德之 人物志

傅明應字國卿高安人嘉靖戊午鄉試第二人時年十五父
繼孟客滇南母歐陽氏寢疾不起日夜侍側憂形於色母
強之學湯藥餘閒不廢誦習尤潛心理學師事鄒東廓羅
念菴二先生時奉旨廉天下孝行江西四人明應居其一
將徵用尋因父喪冒暑卒 同上

藍璧字完卿高安人嘉靖進士改庶吉士遷戶科給事中改
禮科時上意修元璧以忤旨廷杖出為湖廣叅政歷四川
按察使山東廣東布政使俱有治績在蜀蘇淹獄在粵清
番稅人尤稱之 同上

熊相字尚弼高安人歷官御史有能名居鄉尤為月旦所重
凡百公事有利地方者力任不辭前知府鄺璠修郡志皆
相所裁定士類至今稱其人 同上

鄒璉新昌人嘉靖進士授工部主事歷任承天知府湖廣副
使雲南左布政應天府尹所至清聲茂著陞巡撫浙江副
都御史楚中科臣有忌之者調南京歸里杜門不出 同上
廖暹字曰佳高安人中嘉靖鄉試任武康令調詔安政務寬
平尋罷歸嘗從鄒東廓講學構西郊書院為筠士發明良

知之旨郡邑名士若况叔祺輩皆出暹門子性之字道夫
嘉靖辛酉經魁弱冠隨父從東廓先生學篤信謹守初授
陽信教諭轉松陽縣令陞路南知州致仕歸同上

况叔祺字吉夫高安人弱冠登進士授刑部主事曹署清暇
益肆力學問與東吳王元美南昌余德甫遊從以聲詩相
唱和歷禮部郎中貴州提學副使貴州僻處蠻方士多弗
力於學叔祺至日為諸生講說經義士知嚮方攝司篆平
山寇叔祺負才名伉直不諧於俗遂棄官歸卜築藥湖之
傍興至買棹下章江訪德甫諸名士徘徊龍沙南浦間弔
古賦詩所著有大雅堂集林志

按是時王李之學方盛行海內稱詩家惟所進退元美
又好為評騭有後五子廣五子續五子末五子之目尋

又廣為四十子於南昌取兩人焉以余德甫冠後五子
之首朱用晦則在續五子之列顧獨不及况吉夫大雅
堂集世亦罕有傳者原跋

范伋高安人嘉靖進士歷官叅政致仕歸杜門掃軌一切不
與世事惟以孝友敦睦訓子姓俸餘盡給親族不留以遺
子孫卒年八十四人物志

吳學詩字伯興上高人嘉靖進士改庶吉士累官山西副使
少穎敏篤學好古經史過目成誦歷仕三朝所在令聞昭
著事母最孝時上高大旱學詩作祈雨文柳冠縞衣步率
士民禱於城隍三日甘霖如注僉以為誠敬所感同上

敖銑高安人嘉靖進士改庶吉士歷官國子祭酒贈禮部右
侍郎性醇雅生平無疾言遽色應事接物婉而曲中然義

江西通志 卷七十一
所當任確不可回從歐陽文莊公講理學潛心力踐人爭
賢之少保吳文端為之傳 同上

况澄字仲源高安人曾祖琛永樂進士官永平教授有廉名
澄能述其家學為諸生從學王文成公嘉靖辛卯特詔拔
異才澄膺選第二初知壽張縣調考城築堤興水利以耿
介忤上左遷建寧教授陞鳳陽通判歸而屏迹公庭事關
地方利病者則獨持議侃侃郡邑咸利賴焉 府志

劉尋字子儀高安人年十九中嘉靖乙酉鄉試授臨城令廉
介自持遷通州守諸武弁貴戚占田宅者幾半民籍錦衣
陸炳家奴數百以徵租為名漁獵州縣莫敢誰何尋褫其
衣冠驅出境炳深銜之使人伺其陰事卒無可乘三年以
憂去後補茶陵知州惟一僕自隨尋卒於官 人物志

李借字少峯上高人嘉靖鄉舉授大田令方下車逋盜為亂
嚴治塹堡以威鎮之歷任三載俸資外分毫無取陞太僕
寺丞去日民携金帛為贈和顏慰辭之後官至廣東兵備
道平寇有功所著有李氏家藏二十四集併諸疏稿 福建
名宦志縣志合撰

鄒誠字一純高安人由舉人授慈谿知縣縣多貴宦誠御以
禮法無少假借民之無告者多方哺育之不忍傷焉人稱
其一清僅足自存執法多可傳後卒于官 安志

黃美字石龍上高人性剛介嘗讀書白鹿洞歷知嘉興秀水
所在稱治故事坐堂日供黃絹一匹美曰民脂膏也去之
有吳生鵬才而貧美厚恤之及美致政歸不十年而鵬開
府江西會有令營薦者知美最善鵬持千金以請美愕然

曰求薦豈好官耶麾去弗顧江南巡撫聞其高具金綺聘之不赴乃寄以詩有不羨金龜好偏乘白鹿遊之句卒祀

鄉賢 縣志

劉文光字月山高安人由舉人歷官叅議工詩古文與少師夏言中翰呂柟時相倡和卓冠一時著霍案錄 安志

熊子臣字應州新昌人嘉靖進士以工部郎出知處州性敏達能斷疑獄人以不冤捐修學宮集諸生肄業資給膏火

輯郡志稱善本擢雲南副使 浙江名宦志

黃居德字惕齋上高人倜儻有大志任靈山清河有聲擢知邳州攝高郵有治河績將晉秩念父年九十請歸養弗許

居德曰豈可以官而忘親也拂衣去督河潘季馴扁三知堂贈之蓋知忠知孝知止云卒祀鄉賢 縣志

漆登字汝高高安人少孤事母孝嘉靖舉人授貴州永寧知

州陞馬湖府同知因其俗陋加意造士捐俸資給之麻陽

寇亂協剿告捷以薦兩與蜀黔考試告養親歸 府志

傅孟春高安人嘉靖進士授常州府推官累官刑部侍郎先是督北畿學政時尚操切孟春獨以寬著值有毀書院之

議捐數百金贖之事定還為書院署刑部事雪郎撫李材

之冤獲從末減生平和易若於世油油然而中實涇渭分

明有大臣之度 人物志

漆文昌新昌人嘉靖舉人授沅江知縣調繁應城陞廣西柳

州府同知補雲南永昌府會撤回募征緬兵八千衆兵引

例索路費無厭官不能給遂鼓譟永昌城外城門閉者七

日文昌單騎出城諭以順逆歷程十八日軍民無犯所過

並尸祝之擢廣南知府提督迤西等處設關堡以拒緬夷
初運米至緬石價至數金民不勝困文昌冒煙瘴屯種其
後石米僅三錢遠近甦息陞貴州副使推叅政告歸人物志

漆元中字維嵩新昌人嘉靖舉人初令湘鄉有主粟使者臨
邑凌轢長吏漕卒橫索鄉賦人人色沮元中獨抗顏力諍
以此致忤改浙江海鹽教諭當路重其賢委署崇德桐鄉
兩篆並著聲無何拂衣歸同上

陳汝錡字伯容高安人早為諸生問學淹博尤矩矱自持以
貢授建陽訓導在官一年而卒為諸生時遊白下值海剛
峰總憲南臺汝錡直稱布衣上書規以止足之義海感其
言即日杜門乞休所著有周史總長短書一名甘露園集

同上

按陳汝錡事詳見劉願人所撰真吾先生傳中

馮貴吉字含章新昌人幼孤事兄貴善如父初苦貧稍拮据
生業尋奮然志學以古人自期不由師傅而經史百家靡
不淹博為諸生大有聲弟子問業者多成就為時用所著
有雲峰集多格言同上

黃鎡字文叔上高人隆慶庚午亞魁任西和知縣清操不染
生平恬澹無求惟以詩文娛志接人溫恭有禮言論不激
不隨年九十卒有娛閒詩集同上

蔡文範新昌人隆慶進士初任刑曹疏忤江陵相星變考察
左遷閩鹽官擢兵部郎陞湖廣提學叅粵藩所著有縉雲
齋橐甘露堂集同上

王京字來覲上高人隆慶進士授同安知縣諳練經略海倭不敢南犯尤加意造士倅衡陽擢守徽郡下車以禮讓默化士民允服竟以絕交權貴致政歸田同上

潘仕紳字以書上高人隆慶恩選初授五湖知縣招撫流移剖劉大海等冤獄眾稱神明擢羅定知州猺獞獷悍殲其渠魁餘孽斂跡讞反側疑獄二囚編氓安堵陞廣州同知葬溺屍修戰艦皆政績之可紀者府志

范雋字國士高安人萬曆進士授義烏知縣徵授御史時上久不視朝雋陳時政十事言甚剴切先是慈寧宮災給事中鄒元標疏六事忤上意而雋疏適入上恚曰向未罪元標致雋復爾當重懲之申時行等擬鑄秩帝猶怒將各予杖是夜大雷雨明日朝天門外水三尺餘上怒稍解乃斥

為民明年給事中張維新請推用謹謫諸臣詔許量移惟雋不敘自是屢薦不起里居數十年卒白志

按鄒范同時出國門曾健齋亦以言被譴長安有西江三鳳之稱焉

范世美字敬之高安人萬曆進士授揚州府推官會偽錢恣行商賈罷市饑民以米戶閉糴執竿叫呼聚黨數千人世美適行縣聞之躬詣亂所開諭禍福羣黨立解陞南京兵部郎中出守潤州潤故有織造諸羨銀又有公莊諸稅歲萬金舊皆太守公費世美悉以備賑陞山東兵備副使辛卯總計天下循吏奏清苦第一人物志

朱崇遂號竹亭高安人年二十棄舉子業篤志理學萬曆戊子瑞郡飢疫崇遂破產調恤鄉里免流亡者二千餘家撫

接將疏於朝力辭早歲艱嗣鄉人共禱祈曰朱某生平善行而終絕嗣乎未幾連舉兩子朝綬朝縉皆擅才名多隱德曾孫軾康熙癸酉江西解元甲戌進士歷官清介現任大學士人皆謂積善之報 朱氏家傳

朱吾弼字諧卿高安人萬曆進士授寧國推官徵授南京御史奏請建國本簡閣臣補言官罷礦稅不報山西巡撫魏允貞為稅使孫朝所訐吾弼乞治朝欺罔罪廣東稅使李鳳乾沒奸人王遇桂請稅江南田契吾弼皆疏論其罪雷震皇陵吾弼請帝廷見大臣講求祖宗典制與天下更始尋復言陛下孝敬疎於郊廟惕厲弛於朝講土木盛於宮苑榛蕪徧於殿庭羣小橫於中外正士困於囹圄閭閻以礦稅竭郵傳以輸輓疲流亡以水旱增郡縣以徵求困草

澤生心衣冠喪氣公卿不能補牘臺諫無從引裾不可不深察而改圖也未言禮部侍郎郭正域疾惡嚴居已峻不可以楚事棄請詳勘且言王既非假何憚於勘遂為首輔沈一貫所惡移疾去居三年起南京光祿少卿召為大理右丞齊楚浙三黨用事吾弼遂辭疾歸熹宗立召還累遷南京太僕卿天啓五年為御史吳裕中劾罷 白志

陳邦瞻字德遠高安人萬曆進士授南京大理寺評事歷南京吏部郎中出為浙江叅政進福建按察使遷右布政使改補河南分理彰德諸府開水田千頃建滏陽書院集諸生講習以右副都御史巡撫陝西上林土官黃德勛弟德隆及子祚循叛德勛投田州土酋岑茂仁茂仁納之襲破上林殺德勛掠妻子金帛守臣問狀詭言德勛病亡乞以

江西南通志 卷七十一
祚洵繼邦瞻請討於朝會光宗嗣位即擢邦瞻兵部右侍郎總督兩廣軍務遂移師討擒之海寇林莘老嘯聚萬餘人侵掠海濱邦瞻扼之不得逞舉夷築室青州奸民與通時侵內地邦瞻燔其巢召拜工部右侍郎未上改兵部進左天啓二年五月疏陳四事中言客氏既出復入乃陛下過舉輔臣不封還內降引義固爭致罪謫言者再蹈拒諫之失其何解於人言疏入忤旨譙讓尋兼戶工二部侍郎專理軍需明年卒官詔贈尚書邦瞻好學敦風節服官三十年吏議不及同上

按邦瞻所著有皇王大紀宋元紀事荷華山房摘橐陳邦科字雋卿高安人萬曆進士初知江都縣擢南御史首陳十事次請建儲又申救彭遵古顧允成諸壽賢三進士

之濫黜訴李中丞材之誣獄按部江上賊挾貧民稱亂疏請寬賦以摧其黨守保寧河間尤多惠政會有東倭之警上議倭寇屬國天津隸海門戶條備禦十餘事多奇中年四十六卒於官有片玉集白志

按陳邦科申救彭遵古等三人事人物志不詳白志採訂

敖文禎字嘉猷高安人萬曆進士改庶吉士授檢討累官禮部侍郎教習庶吉士再進講幃以足疾求假不獲請復日進講義遂不起贈禮部尚書諡文穆人物志

胡大成字集化新昌人弱冠舉春秋魁萬曆進士授陳州知州賑荒大得民心以忤上司調四川潼川州戍外計撫按舉卓異權人竟中以拾遺歸里杜門讀書者二十年疏

食布袍泊如也以哭父成疾卒

同上

按胡大成所著有翠柏軒集

曹汝蘭字斯馨上高人萬曆進士授江津知縣行取南御史天啓初首進保護聖躬疏報聞又條議舉刺大體不激不同得進言之法至嘉惠桑梓如建義社倉津北糧解闔邑賴之

府志

况于梧字汝材高安舉人授天長知縣數月政聲鵲起調繁儀真時苦淮水泛溢大為河患遂條陳開便河修築高家堰陞嘉興府判以河工未竣題改淮安竟厥功居民號况公河功成陞邵武同知

人物志

陳元琛字仍玉高安人以貢任南康府訓督學駱日升聘主白鹿洞倡明經術多士景從咸謂江右徵君章潢以後一

人遷建昌教諭從遊講學者益衆陞汀州府教授致仕家居讀書疏水自樂學者稱見南先生

同上

陳邦儀字開甫高安人與兄邦屏弟邦瓚俱工舉業有名庠序邦儀尤篤志自勵族兄大司馬邦瞻亟稱之八入鄉闈不得志遂肆力於詩歌晚益瀟灑自得有陶元亮之風所著有彈劔草

陳氏家傳

范世芸字陽華高安人幼有至性稍長以古人自期內行淳備宗黨無間言里人司馬陳邦瞻宗伯敖文禎早以問學相友而見解強記每推讓世芸及二公鼎貴終其身無交利囑子之私士論高之晚以貢謁選授廣東始興訓造士有蘇湖之風尋解歸

人物志

馮文盛字士蒙新昌人萬曆舉人署教新建知高苑縣陞南

大理評事轉寺正持大獄毫無阿徇出知廣南府撫按廉其品委署大理府本金穴也文盛為革宿弊不受一錢人多其介丁艱補岳州府治濱洞庭多盜悉心防護民賴以安擢貴州備兵副使楚中忌者有言遂抗辨歸同上

趙應選號太初萬曆進士筮仕寧陵薦剡累牘僅主繕部政

管理兩宮皇城等工費省功倍壘書褒嘉轉副郎督臨清磚廠轉都水郎督淮黃中河疏濬隄防河流安其故道陞

山東憲副提督七省漕儲府志

王綦字宗盛高安人與弟莘同舉萬曆壬午榜授沭陽諭分

典蜀闡擢令麻陽廉介有聲獠苗龍警服同上

胡用賓字其佐新昌人生而廣額豐頤氣度偉如初就塾即以聖賢自期許為諸生構舉子業發明道術不作流俗語

以求合於時尤斤斤於義利之際嘗夜拾遺金候至明還其人少婦私挑毅然絕之平居澄神默坐胸中空洞不著一物久之靈慧漸露見人動止文字即能定其終身以子觀察貴贈中大夫蒼霞草

按胡用賓生平詳見葉臺山所撰胡松菴傳中至與胡敬齋並稱謂其學以躬行實踐為正的造次不苟云

鄒維璉字德耀新昌人萬曆進士授延平推官行取授南京兵部主事進員外郎遼左用兵疏陳數事尋以憂去天啓三年起職方郎中刑部主事譚謙益薦妖人宋明時能役神兵復遼左地魏忠賢陰主之維璉極言其妖妄海內方用師將帥悉賄進職方尤為穢穴維璉素清嚴請寄加絕因極論債帥之弊譏切中官大臣吏部尚書趙南星知其

賢調稽勲郎中時言路橫恣凡用吏部郎必咨其同鄉居
言路者給事中傅櫬陳良訓章允儒以南星不先咨已大
怒共詬誅維璉及維璉調考功櫬等益怒交章力攻又以
江西有吳羽文例不當用兩人迫羽文去以窘辱維璉維
璉憤拜疏求罷即日出城疏中以章惇攻蘇軾蔡京逐司
馬光爲言櫬等愈怒櫬遂顯攻魏大中左光斗以及維璉
自是朝端水火諸賢益不安其位矣維璉欲去不得詔留
視事乃嚴覈官評無少假借楊漣劾魏忠賢被旨切責維
璉抗疏略言忠賢大奸大惡罄竹難書今陛下以太阿授
忠賢非所以爲宗社計疏入責其瀆奏及趙南星去國維
璉願與俱去忠賢即放歸無何張納劾南星追論維璉調
部非法詔削籍復構入汪文言獄下吏戍貴州崇禎初起

南京通政叅議就遷太僕少卿疏陳卜相久任納言議
籌兵五事擢右僉都御史代熊文燦巡撫福建海寇劉香
猖獗遣遊擊鄭芝龍擊破之海外紅夷據彭湖挾互市後
徙臺灣漸迫廈門維璉屢檄芝龍防遏之不聽明年夏芝
龍剽賊福寧紅夷乘間襲陷廈門大掠維璉急發水陸進
芝龍亦馳援焚其三舟官軍傷亦衆寇乃泛舟大洋轉掠
青港荆嶼石灣諸將禦之銅山連戰數日始敗去維璉在
事二年勞績甚著會溫體仁雅忌維璉而閩人宦京師者
騰謗於朝竟坐是罷官敘却賊功召拜兵部右侍郎講疾
不赴卒於家 白志

按鄒維璉人物志失載白志采輯增入所著有願學編
宦遊達觀樓等集

戴九元字大圓新昌人萬曆進士歷知棗強臨安會稽文安
 四縣陞工部員外尋歸杜門吟詠所著有工部彙匡山社
 集酒人游饑驅草陸沉集落花吟十餘種天啓中給事魏
 大中忤逆璫斃詔獄者即九元所取士也卒祀鄉賢府志
 胡維翰字良甫高安人萬曆丁酉鄉薦宰泰寧鄖西二邑皆
 有惠政性剛毅不能委蛇隨時竟拂袖歸里閉門謝客親
 授經於子若孫甘守清貧以壽終同上
 陳如綸字元泉高安人萬曆恩選就竹山令有善政苦節自
 持竹之人士尸祝之念母在堂乞歸事奉克孝至老不衰
 林泉二十餘年與老宿結社吟詠風月春秋九十終人物志

馮士元字廷對新昌人生而穎悟嗜學不厭諸生時每試

冠兩中省闈乙榜以貢司訓靖安陞河南府授解官歸
 二三昆季色養北堂吟詠自適有測史剩語行世孫垣登
 崇禎庚辰進士授御史殉闖賊難同上

按吳邦策國變錄被賊夾死者凡七人馮垣登其一也
 吳甘來字和受新昌人與兄泰來同舉鄉試崇禎改元甘來
 成進士後三年泰來亦成進士甘來擢刑科給事中伉直
 敢言戶部尚書畢自嚴下獄抗疏救之帝重法繩下朝士
 坐大辟者累累甘來疏請停刑蕪湖設關商舟多覆沒甘
 來請罷征西北大旱疏言秦晉間人相食父子兄弟不相
 顧陛下發粟以賑猶恐被澤者少乃山西難民半為總兵
 官張應昌等殺以冒功中州諸郡畏曹變蛟兵甚於賊臣
 實痛之又言封疆之罰武與文二內與外二士卒與將帥

二受命建牙或逮或逐以封疆罪罪之而跋扈將帥罪狀已暴止於戴罪偏裨不能令士卒將帥不能令偏裨督撫不能令將帥將聽賊自來自去誰爲陛下剪凶逆者帝納其言爲下令申飭憂歸服闋起吏科進兵科右給事中乞假歸十五年起戶科都給事中列上練兵足餉十事一日帝詰戶部尚書倪元璐餉額甘來元璐門生也進曰臣科與戶曹表裏餉可按籍稽臣所慮者兵聞賊而逃民見賊而喜恐不特無餉之患宜急輕賦稅收人心帝領之賊薄都城時兄泰來已官禮部員外郎甘來屬歸事母而已誓必死明日城陷有言駕南幸者甘來曰上明且決必不輕出乃疾走皇城不得入返作絕命辭畢盡取疏草焚之曰當賊寇縱橫徒持議論無益毫末留之鈞後世名罪爾大

耳正衣冠北向拜投繯死南都贈太常卿謚忠節

本朝賜謚莊介 白志

陳儒字鑑韋高安人進士知潞安府改建長治學創書院與紳士會講多所發明又置學田修西城水插以備蓄洩擢山西憲副值歲侵郡邑多盜單騎往來撫輯輒解散之官至雲南參政卒年八十餘有文集二十卷 山西名官志吳

山來傳合撰

陳泰來字剛長新昌人崇禎進士知宣城縣擢戶科十五年冬都城戒嚴陳守禦數策總督趙光忭言泰來與同官荆祚永素晰邊情行間奏報宜敕二臣叅預報可泰來又自請假兵一萬肅清輦轂帝壯之即改授兵科出視諸軍戰守方略至軍中奏界嶺失事狀劾副將柏永鎮論死遷吏

科右給事乞假歸福王時起刑科左給事不赴唐王用爲太僕少卿再擢右僉都御史李自成敗走武昌其部下散掠新昌境泰來大破之初益王起兵建昌泰來欲從之同邑按察使漆嘉祉舉人戴國士持不可已而新昌破國士出降泰來惡之會上高舉人曹志明等兵起泰來與相結復上高新昌寧州殺國士妻子遂取萬載新昌再失泰來走界埠志明等從上高移軍會之俱敗死

袁一修高安人任四川遵義衛經歷值奢酋作亂一修督兵没于陣總督朱燮元奏卹之

安志

按安志孝義傳尚有高安吳勁朱達善吳一恂朱繼德朱吾菁況子杞袁文煥弟文道文謨新昌劉用忠熊邠畿漆公範劉凡正附錄姓名于此

國朝

漆園號劔潭新昌人明崇禎進士知福清縣著廉聲以勦海寇功優擢丁內艱補寶坻調繁密雲撫按會薦行取癸未遭外艱歸

白志

舒弘緒字芭孫明高安諸生工詩一時名輩咸推之屢試弗售恣遊吳越間後客皖江死

同上

胡寧號一菴高安人甘貧力學明崇禎鄉薦受知於馬世奇甲申馬殉難寧傷悼誓老邱壑年八十終

同上

梁維新號鍾石高安人明崇禎鄉薦授遂寧知縣中途聞闖賊陷都城未抵任而返隱居銅湖卒

同上

劉九巖字岳生高安人明崇禎舉人甲申之變薙髮國蓮寺易名性槩築潔菴於城南復築慟城志所歸也天才奇放

晚年究心性命之學著有髮聲存年行世同上

按漆園以下前志編入明末今改正

漆嘉祉新昌人明崇禎辛未進士二齡失怙依寡母為命比成名以母節上聞得旌如例除順德令廉明多善政改潮陽山寇劉香掠城堡多方捍禦賊不敢逞擢雷廉道以母老乞歸順治丁亥邑侵散粟賑飢者鄉人德之崇祀錄

王國琦字石公新昌人明崇禎進士授建陽令政尚寬仁歲侵捐俸建倉積穀以備賑隣邑浦城巨寇數萬剽掠三省國琦時攝浦事用奇計降之邑以寧兩舉卓異調山東滋陽甲申二月召對稱旨特授吏科給事尋以母病辭後終身不仕僑寓金陵年七十八卒縣志

劉欽隣也隣臣新昌人順治進士知廣西富川縣吳逆之變

粵西將軍某脅州縣從之欽隣獨守孤城不從未幾城為逆黨所破執欽隣械至桂林義不肯降誘以官爵不屈囚于獄賦絕命詩自盡總制金光祖奏

聞贈太僕卿

賜祭葬同上

朱家繩字季直高安人穎異博學為文下筆立就順治鄉試本房擬元以名第不肯居次寧置副榜後以應貢先期卒著有義山集藏於家白志

朱極光號竹坡高安人崇遂之孫大學士軾之父幼孤食貧藉館穀以養母承色笑如嬰孩拮据甘脆不令母知困憊狀性儉樸而敦厚生平無疾言遽色雖犯不校自軾通籍後立宗祠置祭田敬祀事刊譜系恤貧族修塚墓之無主

而圯者葺道路梁筏之傾壞者汲汲行善人以為克繩祖武云 家傳

陳世齡字小房高安人邦義孫家學淵源天資穎異早入邑庠性至孝晨夕膝下不忍稍違三十年如一日著有縛翠園存稿 白志

江西通志卷第七十一

